


BS2675
.8.A53

~~CONFIDENTIAL~~

Compt
S.L.



RARE

Divis

SCB

Section

#8-169

No.



Il n'est pas possible de sçavoir quand S. Paul fut
ravis. Si l'a écrit la 2. Ep. aux Corinth. l'ay 60.
ce raviss^{mt} se termine l'ay 46. ou l'ay 45. Je connois
un hœ, dit S. Paul, il y a 14. ans passé. Il est
vrai qu'on pût donner une autre explication à ces
paroles. Je ne saurois croire q' on eût raviss^{mt}
surviva, cœ quelq^s uns se le l'imaginent, dans les 3. jours
qu'il fut à Damas, sans voir, sans manger, & sans
boire. d'ici dans son Philop. (Si l'a vrai du
moins q' n'ouvrage soit de Lucie) avoir ouï
parler de ce raviss^{mt}. car il fait d. d'un Chrétiⁿ
not^{re} Trioplon qu'il avoit été renoué le d'au l'eau
par ce Galiléa, qui avoit été élevé dans l'au,
jusqu'au 3.^e C'est S. qui y avoit appris des esps
admirables.

Ce que les Grecs appellent extase, c'est le transport
de l'âme hors de la situation naturelle,
durant lequel l'âme étant uniquement occupée de la
vue intérieure de l'objet qui lui est présent, l'homme
ne fait alors aucun usage de ses sens, cœ Ezéch. 8: 3.
Act. 10: 10. apoc. 1: 10.



LE
RAVISSEMENT
de
S. PAVL.

(2. COR. XII. 1-5.)

Expliqué
EN QUATRE SERMONS



m. amyraut.

A. SAVMVR:
Chez ANT. ROUSSELET.
M.DC.LX.

THE UNIVERSITY

OF

2. PAUL.

2. COR. XII. 1-2.

EXPOSITION

ON QUINTALFE SERMONS



A. SALVIA :

CHURCH OF THE UNIVERSITY

W. D. I. N.



A MADAME
MADAME
LA
MARQVISE
DE
GOVVERNET.



ADAME

*Lors que ie me mis il y aenuiron vn
mois à mediter ces quatre petits Sermons, ie*

EPISTRE.

n'auois aucune pensée qu'ils deussent iamais aller au delà de l'estenduë des parois de nostre Temple. Et maintenant qu'à la priere qui m'en a esté faite, ie leur permets de se faire ouïr plus loin, i'aduouë que ie ne les en trouue pas moy-mesme fort dignes. C'est pourquoy, *MADAME*, i'ay esté en doute si ie prendrois la liberté de mettre vostre nom au deuant. Car encore que i'eusse une grande passion de vous donner quelque témoignage public de l'estime toute particuliere que ie fais de vos excellentes qualitez, ie craignois que ce ne fust pas un assés considerable present, & ie voyois bien qu'il n'approchoit nullement, ny de ce que vous meritez, ny de ce que ie desirerois faire pour vous faire voir le respect que ie vous porte. Mais enfin pourtant, *MADAME*, i'ay mieux aimé vous offrir moins, & le vous offrir plustost, que d'attendre plus long-temps à m'acquitter de ce deuoir, & à me satisfaire moy-mesme. Les obligations que i'ay à Monsieur le Controlleur general,

EPISTRE.

Et à Madame vostre mere, meriteroyent
 bien que i'en fisse icy mention. Mais elles
 sont telles qu'à peine trouueroy-je des pa-
 roles pour en exprimer mon ressentiment:
 au moins certes vne petite lettre comme cel-
 le-cy, ne seroit elle pas capable de represen-
 ter la moindre partie de ma gratitude. Et
 peut estre que quelque iour Dieu me fera
 la grace d'en donner des preuues plus au-
 thentiques que celles que ie pourrois mettre
 icy. le m'arrestera donc à vous, **MADAME**,
 Et me contenteray de dire que
 ce m'a esté vne singuliere matiere de ioye Et
 d'edification, lors que i'ay eu l'honneur
 de vostre conuersation, de voir en vous en
 l'aage où vous estes, parmi les attraits du
 grand monde, Et les faueurs de la Cour,
 vne pieté si sincere, vne vertu incorruptible,
 vne modestie exemplaire, Et vne bonté si
 grande qu'à peine s'en void-il de telle dans
 le rang que vous tenez. le prie Dieu de
 tout mon cœur, **MADAME**, qu'il vous
 augmente de plus en plus les graces de son

EPISTRE

Esprit, & qu'il continuë de les accompagner de toute autre sorte de benediction,
C'est,

MADAME,

vostre tres humble & tres-
obeïssant serviteur,
AMYRAVT.

LE RAVISSEMENT DE
SAINT PAVL

OV
SERMONS

SVR CES PAROLES DE LA II.
aux Corinth. Ch. 12. V. 1. 2. 3. 4. 5.

*Certes il ne m'est point conuenable de me vanter:
car ie viendray iusques aux visions & reuelations
du Seigneur. Je connois vn homme en Christ
il y a quatorze ans passés, (si ce fut en corps ie ne
sai, si ce fut hors du corps ie ne sai, Dieu le fait,)
qui a esté raiui iusques au troisieme Ciel. Et
sai qu'un tel homme (si ce fut en corps, ou si ce
fut hors du corps, ie ne sai, Dieu le fait) a esté
raui en Paradis, & a ouy paroles inenarrables,
lesquelles il n'est possible à homme d'exprimer.
D'un tel homme me vanteray-ie, mais de
moy-mesme ne me vanteray-ie point, sinon en
mes infirmités.*

PREMIER SERMON.

FRERES BIEN-AIMEZ EN NOSTRE
SEIGNEVR.

Il y a dans la Parole de Dieu, & mes-

mes dans les liures de la nouuelle Alliance, vne tres- grande quantité de choses, & qui sont d'une merueilleuse variété : mais il y en a de deux sortes considerables entre les autres, à sçauoir, celles qui sont remarquables pour leur merueille, & celles qui sont excellentes pour leur extraordinaire vtilité. Je mets en ce second rang les dogmes dont la Religion Chrestienne est composée, & les histoires sur lesquelles ils sont fondés : comme celles de la naissance de nostre Seigneur, de sa passion ignominieuse, de sa resurrection d'entre les morts, de son ascension là-haut aux cieux, & de l'enuoy de son saint Esprit en la terre. Car il est bien vray que ces choses-là sont souverainement admirables, & que la puissance & la sagesse de Dieu y paroissent avec vn extraordinaire éclat. Mais neantmoins, parce que c'est de là que resulte nostre iustification deuant Dieu, la consolation de nos cœurs, la sanctification de toutes nos affections, & l'esperance de la resurrection & de l'immortalité bien heureuse, nous auons accoustumé de considerer ces histoires-là plustost par l'incomparable vtilité qui nous en reuient, que par ce qui les rend

capables de donner de l'admiration à nos
ames. Je mets au premier les miracles que
nostre Seigneur Iesus Christ a faits ; sa
transfiguration sur la montagne , les cho-
ses extraordinaires qu'il a donné à ses
Apostres d'exécuter , avecque leurs vi-
sions & leurs reuelations celestes. Car il
est bien vray encôre que ces choses là sont
telles ; qu'en les bien considerant on en
peut tirer de tres-grandes vtilités. Mais
neantmoins , nous auons accoustumé de
les cōtempler plustost par l'endroit par le-
quel elles paroissent merueilleuses. Et ce
que ie viens de lire deuant vous , mes
freres , est de cette nature-là. Car on ne
peut mediter attentivement cet en-
droit des Epistres de S. Paul , où il parle
de son transport au troisieme ciel ; qu'on
n'en remporte vn grād fruit d'instruction
& d'edification : & toutesfois ie m'assu-
re qu'il n'y a personne d'entre vous , qui
quand il iette les yeux sur cette histoire,
ou qu'il l'entend lire à autrui , ne soit en
quelque sorte plus touché de sa merueille
& de son estrangeté , que cōsolé ou satisfait
des auātages qui s'en recueillēt. Or sçaués-
vous qu'en ces actions nous auons accou-
stumé de vous expliquer plustost les choses

* *Sermon I. sur le chap. 12.*

esquelles consiste l'esperance de vostre salut, & où nous pouuons trouuer des motifs efficaces pour vous porter à la sanctification, que celles qui peuuent contenter la curiosité de vos esprits, ou vous recréer de la contemplation de quelque merueille. Mais nous auons creu pourtant que nous pouuions bien arrester quelque temps & vos esprits & le nostre à la meditation de ce qui est contenu icy, & deferer à la priere qui nous a esté faite par quelques-vns, d'expliquer le Rauissement de S. Paul en trois ou quatre actions publiques. Car nous ne le faisons pas de nostre propre choïs. Mais de cette matiere que nous prenons à traiter à la suggestion de quelques particuliers, j'espere que moyennant la grace de Dieu il reüssira quelque chose pour l'edification commune.

Il y a donc en ces cinq versets quatre choses principalement considerables. La premiere est la Preface de tout ce propos, où l'Apostre dit qu'il ne luy est pas ou permis ou conuenable de se vanter, auéc la raison qu'il en rend. La seconde est l'histoire de son rauissement en Paradis, & ce qu'il dit des paroles qu'il a entenduës. La

de la 11. aux Cor. v. 2. 3. 4. 5. 5
troisieme est le doute où il est, si cela luy
est arriué ou en corps ou en esprit, & la
declaration qu'il fait qu'il n'y a que Dieu
seul qui le sache. Et enfin, la quatriéme
est la closture de ce propos, qui a beaucoup
de ressemblance avec la Preface. Or quant
à la premiere de ces choses, vous sçaués
tous quel a esté S. Paul. C'a esté vn
Apostre de nostre Seigneur, excellent
en connoissances & en reuelations, ini-
mitable en sainteté & en charité, & in-
comparable en zele. Et neantmoins on
pouuoit considerer en luy trois choses
qui luy estoient desauantageuses : c'est
qu'il auoit esté grand persecuteur de l'E-
glise de nostre Seigneur : qu'il auoit esté
appellé à la connoissance de Christ, & à
la charge de l'Apostolat, long-temps apres
les autres Apostres, qui auoyent eu l'hon-
neur de viure & de conuerser familiere-
ment avecque Iesus Christ quand il estoit
icy bas. Et enfin, que sa presence corpo-
relle n'estoit pas extremement majestueu-
se, comme vous saué qu'il dit en quelque
lieu, que ceux qui ne l'aimoyent pas, luy
reprochoyent que *la presence de son corps
estoit foible, & sa parole contemptible*. Selon
donques que les ennemis le cōsideroyent

¶ *Sermon I. sur le chap. 12.*

diuerfement, les qualités produisoient en eux des pensées fort différentes. Car les grandes & admirables qualités causoient en eux de l'enuie ; & cette passion produit naturellement la haine, & le desir de nuire à ceux qu'elle se propose pour obiet. Et ces choses qui estoient moins auantageuses en luy, fournissoient l'occasion à leur médifance, & leur donnoient, ce sembloit, le moyen de rauler la dignité de son Apostolat, & de rabaisser son autorité. Si donc il n'eust esté question que de sa personne, il eust fait peu de considération de leurs discours : mais cela touchant son Apostolat, & par consequent estant preiudiciable à l'Euangile de nostre Seigneur, il est obligé d'opposer quelque chose à ces detractions, & de dire quelques verités à son auantage. Or y auoit-il de trois sortes de choses desquelles il se pouuoit vanter : dont les vnes luy estoient communes avec plusieurs autres hommes ; de sorte que la vanterie ne luy en pouuoit estre imputée à vanité. Les autres luy estoient particulières, tellement que s'il s'en vantoit, il y auoit danger que sa vanterie ne receust quelque mauuaise interpretation. Neantmoins,

de la 11. aux Cor. v. i. 2. 3. 4. 5. 7

parce qu'elles estoient accompagnées de diuerses infirmités & de diuerses souffrances, qui deuant les yeux du monde causent plustost du mespris que de l'admiration, il n'y auoit pas tant de peril à en faire commemoration. Enfin, les autres lui estoient tellement particulieres, qu'elles estoient toutes glorieuses, de sorte qu'il n'en pouuoit parler & se les attribuer, que ses ennemis n'en prissent suiet de dire que c'estoit vn homme vain & vn fanfaron & qui pour quelques choses qui luy estoient singulieres, s'esleuoit orgueilleusement au dessus de ses compagnons. Il ne fait donc pas difficulté de se preualoir des premieres. Car voicy comment il parle dans le chapitre precedent. *Puis que plusieurs se vantent selon la chair, ie me vanteray aussi. Sont-ils Hebreux, dit-il en parlant de ses ennemis? Ie le suis aussi. Sont-ils Israelites? Ie le suis pareillement. Sont-ils de la semence d'Abraham? Ie le suis aussi.* De sorte qu'ils n'ont point à s'esleuer au dessus de moy, en ce qui est des auantages de la Nature. Et pour se vanter de la sorte, on ne le pouuoit pas accuser d'estre vn glorieux, parce qu'il ne s'attribuoit rien qu'il n'eust commun avec beaucoup d'autres. Seule-

ment il vouloit faire voir qu'en cela il n'estoit point inferieur à ses ennemis. Pour les secondes, il en parle à la verité. Mais en se vantant, il les tourne de telle façon, qu'en ne celant pas du tout ce qui luy est auantageux, il presente neantmoins à contempler ce qu'il y peut auoir capable d'exciter de la compassion ou du mespris, plustost que de l'admiration ou de l'enuie. C'est pourquoy il poursuit en cette sorte. *Sont-ils Ministres de Christ? Je le suis par dessus: en trauaux dauantage, en battures par dessus eux, en prisons dauantages, en morts souuentes fois. I'ay receu des Iuifs par cinq fois quarante coups moins vn. I'ay esté battu de verges par trois fois, i'ay esté lapidé vne fois, i'ay fait naufrage trois fois, i'ay passé l'espace d'un iour & d'une nuit entiere en la profonde mer. En voyages, en perils des fleuves, en perils des brigands, en perils de ma nation, en perils des Gentils, en perils en villes, en perils en desert, en perils en mer, en perils entre faux freres. En peine & en trauail, en veilles souuent, en faim & en soif, en iensnes souuent, en froidure & en nudité. Là on void bien qu'il entend qu'on face quelque reflexion, tant sur la cause pour laquelle il souffroit toutes ces choses,*

que sur la patiēce & la vertu avec laquelle il les enduroit. Et de fait il adjouste incon-
tinēt. *Outre les choses de dehors, il y a ce qui me tient assiegé de iour en iour, asçauoir le soin de toutes les Eglises.* A quoy il adiouste quel-
que chose de sa charité & de son zele, qui fait qu'il participe aux foibleſſes de tous ses freres, & que si quelcun est scandalisé de quelque chose, il en est quant à luy brulé. Mais neantmoins toutes ces choses-là, desquelles il se vante, sont telles, qu'il n'y auoit auēun de ses ennemis qui eust voulu y estre exposé. Tellement que ce ne sont pas des obiets d'enuie à les regarder par le visage par lequel il les presente à contempler. Et c'est pourquoy il adiouste encore ; *S'il se faut vanter, ie me vanteray des choses qui sont de mon infirmité.* Puis il recite l'histoire de quand le Gouverneur de Damas ayant mis guet en la ville des Damasceniens pour le saisir, il fut contraint, pour échapper de ses mains, de se faire deualer de la muraille par vne fenestre en vne corbeille, ce qui monstre bien que sa personne estoit en vn tres-grand & comme ineuitable peril. Mais quand il vient à cette troisieme sorte de choses, où il n'y auoit ny trauail ny dou-

leur, ny ignominie, ny misere, ny danger ou de flectrissure ou de mort, & où tout estoit illustre & avantageux pour luy, il n'y vient qu'avec beaucoup plus de timidité, & ne se resout à les mettre en avant qu'apres auoir employé la precaution de cette Preface. *Certes il ne m'est point conuenable de me vanter; car ie viendray iusques aux visions & aux reuelations du Seigneur.* Le mot que nous traduisons *conuenable*, signifie aussi *expedient*, & peut estre que comme cette signification est plus propre, aussi est-elle plus à propos en cet endroit. Car l'Apostre veut bien dire peut-estre à la verité, que s'il se vante de ces choses, il ne gardera pas toutes les regles de la bienseance, & ne se tiendra pas tout à fait exactement dans les termes de la modestie qui conuient à vn Apostre du Seigneur. Mais si nous tournons *expedient*, nous supposerons que l'Apostre a eu à peu près cette pensée. Soit que ie regarde mes ennemis, soit que ie me considere moy-mesme, il est malaisé que i'euite qu'il ne m'arriue quelque chose de fascheux, si ie me vante de mes visions. Car quant à mes ennemis, ils en prendront occasion de me reprocher à leur ordinaire, que ie

suis superbe. Et pour ce qui est de moy-
 mesme, ie crains qu'en cette infirmité
 humaine, la pensée & la commemoration
 de ces choses ne me donne quelque eleua-
 tion d'esprit. Or ny l'un ny l'autre ne me
 sauroit estre utile. Car le premier inte-
 ressera ma reputation ; & le second inte-
 ressera ma modestie, & par consequent
 ma sanctification. C'est pourquoy ie
 m'en abstiendray tout à fait : ou si abso-
 lument, pour la defense de l'autorité de
 ma charge, ie ne puis me dispenser d'en
 parler, i'y apporteray vn tel tempera-
 ment qu'il paroistra bien que ce n'est pas
 la presumption qui me gouerne, & que
 i'euite tant que ie puis de parler auanta-
 geusement de moy. En effect, pour venir
 à l'explication de l'histoire, l'Apostre la
 commence ainsi. *Je connois vn homme en*
Christ. Là il est certain que ce qu'il dit il le
 dit en parlant de soy-mesme, & neant-
 moins vous voyés qu'il le fait comme s'il
 estoit question d'un tiers. Et c'est que d'un
 costé il est necessaire qu'il raconte icy l'hi-
 stoire de ce merueilleux rauissement : & de
 l'autre, il voudroit bien ne donner point
 d'occasion à ses aduersaires. Il se dispose
 donc à dire que la chose est arriuée : mais

s'il estoit possible il voudroit bien faire qu'on la conceust sans penser à luy. Ou s'il est impossible d'empescher que l'on y pense , & mesmes s'il est necessaire qu'on entende cette merueilleuse histoire de luy , tant y a que s'il y a quelque chose de magnifique pour sa personne , il s'en dépouille volontiers par ses paroles , & ne veut pas qu'on luy en attribuë rien de grand. En quoy , comme en toutes autres choses , il imite nostre Seigneur. Car bien que souuent en l'Euangile il parle de soy-mesme en premiere personne , si est-ce qu'il luy arriue souuent de s'en exprimer comme sous le nom d'un tiers. De sorte que dans le seul Euangile selon S. Matthieu , il y a vingt cinq ou trente endroits , où au lieu de dire , *Je* , ou *Moy* , il dit tousiours , *le fils de l'homme* , & s'attribuë en tierce personne , ce qu'il deuoit dire en la premiere , à parler regulierement. Et S. Iean , le disciple bien-aimé , en vse à peu près de la sorte , & quand il veut parler de luy-mesme , il se sert de cette façon de parler , *le Disciple que Iesus aimoit* , ou de quelque autre semblable circonlocution. Et il n'y a gueres de gens , de ceux qui sont un peu circonspects ,

de la II. aux Cor. v. 1. 2. 3. 4. 5. 13
à qui il n'arriue assés souuent de parler
ainsi d'eux-mesmes, lors qu'il est question
de dire quelque chose d'auantageux.
Quant à ce qu'il dit qu'il connoist vn hom-
me en Christ, cela ne veut rien dire si-
non qu'il connoist vn homme Chrestien.
Car estre en Christ, & auoir creu en luy, &
embrassé son Euangile, c'est au Nouveau
Testament, vne mesme chose. Et cela
est ainsi exprimé pour seruir au dessein de
nostre Apostre. Car il pouuoit bien dire,
Ie connois vn Apostre de Christ. S'il eust
voulu se glorifier, il pouuoit s'exprimer
ainsi; ie connois vn vaisseau d'election, vn
homme mis à part dès le ventre de sa me-
re pour prescher l'Euangile entre les na-
tions, vn personnage appelé de Dieu à
cette fonction par des miracles & par des
reuelations de Christ : enfin vn instru-
ment illustre de la grace du Redempteur,
qu'il a enrichi & ennobli de mille belles
connoissances. Mais outre que cela estoit
fort esloigné de son naturel, de faire ainsi
parade de ses tiltres & de ses qualités,
c'eust esté iustement donner à ses enne-
mis la prise qu'ils demandoient, pour
insulter à ce qu'ils appelloient son arro-
gance. Il prend donc seulement la qualité

de Chrestien ; qui est souverainement glorieuse à la verité : mais parce qu'elle estoit commune à vne infinité d'autres, & que ses ennemis mesmes, quoy que ce fust à fausses enseignes, se l'attribuoyent, il ne craint pas qu'ils en prennent occasion de le calomnier de vaine gloire. La circonstance du temps vient apres à estre considerée en cette histoire. *Il y a*, dit-il, *quatorze ans passés*. L'on peut suiure deux manieres de ioindre ces paroles avecque celles qui les touchent ; c'est à sçauoir, ou pour faire vn mesme sens avec celles qui les precedent, & dire qu'il y a quatorze ans passés qu'il est Chrestien : ou pour en faire vn mesme avecque celles qui les suivent, & dire, qu'il y a quatorze ans passés que ce rauissement luy est arriué. Mais bien que quelques vns embrassent plustost cette premiere interpretation, & qu'il est certain qu'à suiure bien le fil de l'histoire Apostolique & du temps, lors qu'il a escrit cette seconde Epistre aux Corinthiens, il y auoit quatorze ans qu'il auoit esté appellé à la connoissance de Christ, i'estime pourtant que cette obseruation de S. Paul seroit à peu près inutile. Car si vous aués égard à l'histoire, cette

circonstance n'estoit pas necessaire à remarquer, qu'il y auoit desia quatorze ans qu'il estoit Chrestien. Et si vous regardés au dessein de l'Apostre mesme, qui est, en rapportant cette histoire, d'esloigner tant qu'il pourroit de luy, tout soupçon de presumption, il n'y seruoit du tout de rien qu'il nous aduertist qu'il n'estoit pas nouveau profelyte, & qu'il y auoit desia plusieurs années qu'il auoit embrassé le nom de Christ. Mais si nous suiurons la seconde interpretation, cette circonstance du temps seruira tant à ce dessein de l'Apostre, qu'à l'histoire mesme qu'il raconte. A l'histoire premierement. Car la remarque du temps est vne des plus belles lumieres de toutes telles relations, & l'vne des choses qui sont les plus necessaires pour les faire croire. Au dessein de l'Apostre aussi. Car puis qu'il y auoit desia quatorze ans que ce merueilleux accident luy estoit arriué, & qu'il auoit laissé passer tout ce temps-là sans que personne en eust iamais ouï parler, on ne pouuoit pas croire que ce fust la vanité qui le luy fist reueler en ce temps-là, & il falloit necessairement qu'il y eust esté comme forcé par la conjoncture des choses. Assurémēt il fal-

loît qu'il y eust vne retenue & vne modestie extraordinaire en ce saint personnage-là, puis qu'il auoit caché si long-temps vne chose qui luy estoit si glorieuse. Car les hommes vains garderoyent aussi-tost vn charbon ardent en leur sein qu'un secret de cette nature, & les modestes mesmes, s'ils ne possedoyent cette qualité au point extraordinaire auquel la possedoit S. Paul, auroyent beaucoup de peine à le retenir. Apres cela l'Apostre dit qu'il a esté *raui* : & ce terme merite qu'on le considere. Car dans nostre version Françoisse nous nous en seruons quelques fois pour signifier ce qu'on exprime autrement par le terme d'*extase*, quand il se fait vne telle abstraction de l'ame d'avec tous les sens extérieurs, qu'ils ne font point leurs fonctions, & que cependant la fantaisie, qui est vn sens interieur, agissant, on voit des choses extraordinaires & miraculeuses. Ainsi est-il dit de S. Pierre, au chapitre dixieme des Actes, qu'estant en la ville de Ioppe, & ayant monté sur la maison environ les six heures pour prier, *il luy survint un ravissement d'esprit*, c'est à dire, vn tel transport de son ame; qu'encore qu'il ne dormist pas, si est ce qu'elle abandonna

ses sens externes, & que cependant il vid. le ciel ouuert, & un vaisseau descendant sur luy comme un grand linceul lié par les quatre bouts & deuantant en terre. Ce qui fut sans doute représenté interieurement à son imagination. Et au premier chapitre de l'Apocalypse, S. Iean, selon nostre version Françoisse encore, dit qu'il fut ravi en esprit un iour de Dimanche, & qu'il ouït derrière luy une grande voix comme d'une trompette. Ce qui fut sans doute vne operation extraordinaire de l'Esprit de Dieu, qui retirant l'ame du Prophete des organes des sens externes. formoit dans ses sens interieurs des sons de cette nature qu'il s'imaginait ouïr. Et ie' voy que quelques vns interpretent l'histoire que S. Paul nous rapporte en cet endroit, comme s'il estoit question de cette sorte de ravissement. Car en suivant le plus exactement qu'ils peuvent le fil de la Chronologie en l'histoire des Apostres, ils trouvent que cette Epistre a esté écrite l'an 13. de l'Empire de Claude. Tellement qu'à conter quatorze ans en retrogradant, il se trouuera que le commencement en sera l'an dernier de l'Empire de Caligula, qui fut proprement le temps de la Conuersion

de S. Paul. Ils disent donc que cela doit estre rapporté à ce qui se trouue au neuuiesme chapitre du liure des Actes, où le saint historien nous raconte comment Christ apparut à Paul, quand il alloit à Damas, & que Paul estant premierement tombé à terre, & puis apres demeuré aueugle de l'éclat de l'apparition, il fut emmené dans la ville, où il fut troisiours sans voir, & sans manger, & sans boire. A quoy ils adjoustent que ce fut pendant ce temps-là, que son ame estant en exstase, l'Esprit de Dieu luy donna les instructions qui luy estoient necessaires pour faire les fonctions de l'Apostolat auquel il estoit appellé, & entre autres choses luy fit voir cette admirable vision qu'il nous recite en ce passage. Je ne m'arresteray pas encore, mesfreres, à examiner cette opinion. Cela trouuera son lieu lors qu'il faudra considerer ces paroles, *si ce fut en corps, ou si ce fut hors du corps, ie ne sçay, Dieu le sçait.* Je diray seulement que le mot dont l'Apostre se sert en l'original, & que nous auons traduit, *ravi*, a vne particuliere emphase. Car il signifie vn transport réel d'un lieu en vn autre, & encore qui se fait ou avec quelque espece de violence,

de la II. aux Cor. v. 1. 2. 3. 4. 5. 19
ou avecque grande célérité. C'est ainsi
qu'il se prend en cet endroit du liure des
Actes, où il est dit que le Capitaine de la
forteresse de Ierusalem craignant que
Paul ne fust mis en pieces par les Iuifs,
*commanda que les gendarmes descendissent, &
qu'ils le rauissent du milieu d'eux, & qu'ils
l'emmenassent en la forteresse.* C'est ainsi qu'il
est pris au douzieme chapitre de l'Apoca-
lipse, où il est dit que le fils masse qu'auoit
enfanté la femme qui estoit reuelluë du
Soleil, & qui auoit la Lune sous ses pieds,
& vne couronne de douze estoiles sur la
teste, *fut rani à Dieu, & au trône d'iceluy.*
C'est ainsi encore qu'il est pris en cet en-
droit de l'Euangile où il est dit que les
troupes *vouloyent rair nostre Seigneur pour
le faire Roy* ; & ainsi en quantité d'autres
lieux semblables. Si donc cela s'est fait
seulement en cette sorte de vision, où
l'ame n'est point effectiuement separée
du corps, mais seulement rauie en extase,
au moins faudra-t-il que l'Apostre S.
Paul ait creu voir que Dieu le transpor-
toit là haut dans le ciel, pour y ouïr les pa-
roles inenarrables dont il nous parle. Mais
quand Ezechiel, au huitieme de ses Re-
uelations, nous raconte qu'il a esté enleué

de cette façon-là, la main de Dieu l'ayant pris par les cheveux, & emporté entre le ciel & la terre, dans la ville de Ierusalem, il nous aduertit expressément que cela s'est fait *dans les visions de Dieu*, afin qu'on ne pense pas que ç'ait esté vn transport reel; au lieu que l'Apostre ne nous disant rien de tel, il semble qu'il nous ait voulu donner à entendre que ce ravisement a esté vn enlèvement effectif, ou de son ame, dans le ciel, ou de sa personne toute entiere. Quoy qu'il en soit, car ie n'examine pas encore cette question, il designe icy le lieu auquel il a esté ravi, par deux noms, assavoir le troisieme ciel, & le Paradis. Et pour ce qui est du premier, les Astronomes font vn beaucoup plus grand nombre de cieux qu'il n'en est icy designé par nostre Apostre. Car ils en assignent premierement vn à chaque planete, & il n'y a personne qui ne sache qu'il y a sept astres qu'on appelle de ce nom. Puis apres ils disent qu'il y a le ciel des estoiles fixes, c'est à dire, qui sont tellement arrestées chacune en leur place, que ceux qui les regardent ne remarquent iamais de changement en leur situation. Et quoy qu'on les voye tousiours en mesme dispo-

fiction, à les regarder chacune à part, si est-ce que parce qu'on a creu que la sphere toute entiere où elles sont attachées, a encore quelque autre mouuement que celuy qui l'emporte d'Oriēt en Occidēt en l'espace de ving-quatre heures, on en a recueilli qu'il faut qu'il y ait encore vne autre sphere au dessus, qu'on appelle le premier mobile, & qui donne l'impulsion à toutes celles d'au dessous. D'autres qui sont venus depuis, & qui ont essayé d'apporter encore plus d'attention que les precedens à la speculation des phenomenes celestes, se sont imaginés qu'ils auoyent encore obserué vn autre mouuement là-haut, qu'ils appellent *d'approchement & de reculement*, ou, *de trepidation*: ce qui leur a fait conclurre qu'il faut qu'il y ait vne dixieme sphere qui le produise, & ainsi ils ont fait dix cieux. Et au dessus de ces dix, les Theologiens mettent encore vn autre ciel immobile, dans lequel Dieu habite en gloire, & où est la demeure des bien-heureux. Les Hebrieux n'auoyent point accoustumé de reconnoistre plus de trois cieux. Car ils appelloient ainsi premierement tout cet espace qui est entre la surface de la terre, & ce qu'on nomme les spheres

celestes. Et de fait toute cette estenduë-là s'appelle du nom de cieux en l'Escripture, comme quand les oiseaux sont si souuent appellés les *oiseaux des cieux*. Et nous-mesmes quelquesfois appellons *signes des cieux* les notables impressions des nuées, les meteores vn peu extraordinaires, & les Cometes que l'on croid se former & s'enflammer dans la region elementaire, au dessous des globes où les astres sont attachés. Après cela ils appellent ciel l'assemblage de tous ces globes, comme s'ils n'en faisoient qu'vn. Car soit qu'ils ayent creu qu'effectiuement il n'y en a qu'vn, & que les estoiles s'y meuuent comme les poissons se meuuent en l'eau & les oiseaux en l'air; soit qu'ils ayent estimé qu'il y en ait plusieurs, comme de fait ceux d'entr'eux qui se sont messés des choses celestes, l'ont ainsi creu, & ont nommé ces spheres d'vn nom pluriel, qui denote particulièrement leur volubilité, tant y a qu'ils ne les ont considerées que comme vne seule machine, dans laquelle il y a plusieurs rouës enchassées les vnes dans les autres tres-artificiellement. Enfin, ils ont appellé du nom de Ciel le domicile de la gloire & de la felicité, qui est au dessus

de tous les autres. Ils ont nommé l'un le premier, & celuy d'embas: l'autre le second, & celuy du milieu: & enfin le dernier ils l'ont nommé le troisieme & celuy d'enhaut. Dans le premier sont les nuées, & les meteores qui s'y forment; dans le second sont les astres, qui enuoyent leur lumiere & leurs influences icy bas: dans le troisieme sont les Anges alentour du trône de Dieu, pour y recevoir ses commandemens. Et c'est-là où S. Paul dit qu'il a esté ravi. L'autre nom dont il le nomme icy est celuy de Paradis. Et ce mot est né en Orient, les Grammairiens Grecs mesmes ayant remarqué qu'il est Persien d'origine. Les Hebreux pourtant s'en sont seruis: car il se trouue en quelques endroits du Vieux Testament. Les Grecs l'ont adopté dans leur langage, & luy ont donné leur pli ordinaire & leur terminaïson. Enfin les Latins, comme Cicéron & Aulugelle, l'ont traduit vn iardin bien planté & bien cultivé. Non simplement vn parterre, comme sont ces broderies & ces compartimens qui ne seruent qu'à donner de la recreation à la veüe par leurs figures, & leur symmetrie, & par la varieté de leurs fleurs: mais vn

iardin ou vn verger où il y a de toutes sortes de plantes qui produisent des fruits utiles, & qui donnent du contentement au goüst. Et parce que le iardin d'Eden, où Dieu mit l'homme en sa creation, estoit de cette nature, & qu'outre les delices de la veüe, il fournissoit toutes sortes de fruits excellemment bons à manger, les Iuifs l'ont nommé de ce nom de Paradis, & les Septante interpretes, qui estoient Iuifs de nation, se sont seruis de ce terme pour le designer dans la version qu'ils ont faite du vieux Testament en langue Grecque. Mais apres ils ont porté l'usage de ce mot plus auant. Car ils ont ainsi nommé le lieu de repos où sont recueillies les ames des fidelles apres leur separation d'auecque le corps: comme il paroist par les formules de leurs prieres & de leurs vœux, qu'ils font à l'heure de la mort de ceux qu'ils estiment gens de bien. *Qu'il ait, disent-ils, part dans le Paradis, & dans le siecle à venir. Et derechef, que son ame iouisse de repos, & que son dormir soit en paix: ouurés-luy les portes de Paradis.* Et ils appellent ce mesme lieu là du nom de iardin d'Eden; cōme en ces mots, *Que son ame soit dans le iardin d'Eden: & en au-*

tres façons de parler semblables qui ont
ont esté remarquées par les gens doctes.
Non, selon toute apparence, qu'ils ayent
esté si grossiers que de s'imaginer que le
lieu où les ames des fidelles sont recueil-
lies, soit vn iardin semblable à celuy d'E-
den. Car c'est vne pensée plus digne de
l'ignorance du Paganisme, comme de fait
chacun sçait comment les Payens conce-
uoient & descriuoient leurs champs
Elisées: que de ceux qui estoient nour-
ris sous la discipline de Moyse & dans
l'Ecole des Prophetes, qui leur dōnoient
de meilleures instructions. Mais c'est
qu'ils ont pris plaisir aux façons de parler
allegoriques, & qu'ils ont creu, en quoy
ils ont eu raison, qu'ils ne pouuoient re-
presenter la felicité de ce lieu par vne al-
legorie plus conuenable, que par celle de
ce deliceux iardin qui auoit esté au com-
mencement formé de la main de Dieu
pour y rendre l'homme bien-heureux. Et
de fait quelques auteurs attribuent aux
Esséens, qui estoit vne secte d'entre les
Iuifs, des allegories de cette nature. Sur
quoy qu'ils se soyent fondés, Iesus Christ
& ses Apostres se sont seruis de ce terme
de Paradis pour signifier le lieu de la feli-

citée celeste, où les esprits des fideles sont recueillis apres la mort. Car vous sçaués que nostre Seigneur parle ainsi au larron qui se conuertit à ses costés, comme il estoit en la croix : *Tu seras auiourd' huy avec moy en Paradis.* Et au deuxieme de l'Apocalypse il dit : *A celuy qui vaincra, ie luy donneray à manger de l'arbre de vie, qui est au milieu du Paradis de mon Dieu.* Et S. Paul, comme vous voyés icy, après auoir dit qu'il a esté raiu au troisieme ciel, qui est sans doute le lieu de la gloire & de la felicité, adioust qu'il a esté raiu en Paradis, pour signifier la mesme chose. Et de cela, mes freres, on peut rendre deux raisons. La premiere est, que Christ & ses Apostres n'ont point fait de difficulté de se seruir des façons de parler qui estoient vsitées en l'Eglise Iudaïque, non plus que de la monnoye qui auoit cours de leur temps. Ce qui paroist non seulement en ce que nostre Seigneur s'est ordinairement nommé *le Fils de l'homme*, & qu'il a appellé son Eglise, & l'establissement de sa Religion en la terre, *le Royaume des Cieux*, façon de parler dont les Iuifs se seruoient communément pour nommer le Messie qu'ils attendoyent, & la reuelation de son regne:

mais encore, qu'il appelle de ce nom de gehenne le lieu où les demons & les damnés doiuent estre tourmentés: parce qu'en- core qu'il signifie proprement la vallée de Hinnon, lieu qui n'estoit pas fort esloigné de la ville de Ierusalem, si est-ce qu'il estoit alors ordinairement employé pour signifier ce que nous appellons les enfers, où sont les ames damnées. La seconde est, que la chose mesme donnoit vn fonde- ment assés authentique à cette appella- tion. Car c'est vne chose assés ordinaire que les noms des types sont donnés aux choses qu'ils representent, & au contraire, que les noms des choses représentées, sont employés à la signification des types. Comme vous sçaués que S. Paul appelle nostre Seigneur Iesus Christ de ce nom de *Pasque*, & qu'il nomme du nom de *Christ* le rocher dont les eaux decoulerent au de- sert. Or on ne peut pas douter que le Paradis terrestre n'ait esté vn type de ce- luy du Ciel. Dans le premier, l'homme, s'il fust demeuré en son integrité deuoit estre immortel: dans le second, la vraye immortalité est destinée aux fidesles. Dans le premier, l'homme deuoit iouir d'vne felicité terrienne: dans le second

nous en attendons vne celeste. Dans le premier, l'homme deuoit estre rempli d'vne parfaite sainteté, mais naturelle pourtant : dans le second, nostre sainteté doit estre & parfaitement accomplie & surnaturelle tout ensemble. Dans le premier, l'homme deuoit auoir la iouissance de toutes sortes de contentemens corporels : dans le second nous aurons la possession de toutes sortes de delices spirituelles. Et quand nostre Seigneur Iesus Christ parle de l'arbre de vie qui est au milieu du Paradis de son Dieu, il a sans doute quelque egard à cette representation typique, & à ces rapports allegoriques qui sont entre le premier Paradis & le second. Quelques vns ont dit que les quatre fleues dont il est parlé dans la description de l'Eden, au commencement de la Genese, & qui sortoyent d'un mesme principe pour arrouser le iardin, ont représenté la Sapience, la Iustice, la Sanctification & la Redemption que nous auons en nostre Seigneur Iesus Christ, & qui coulent de luy comme de leur vniue source. Et de fait, bien que ces choses-là soyent commencées à manifester & à communiquer en cette vie, nous n'en

de la 1^e l. aux' Cor. v. 1. 2. 3. 4. 5. 22

aurons pourtant ny vne entiere iouissance, ny vne parfaite reuelation sinon quand nous serons là haut au Ciel. Mais si ces fleues ont eu cette signification typique, ou s'ils ont esté destinés à représenter quelque autre chose dans la felicité de là-haut, c'est ce que ie ne pretends pas maintenant examiner, parce que cela est trop abstrus & trop esleué, & que ie me suis assez estendu là-dessus pour expliquer la signification de ce terme & pour en rendre la raison. Cela seroit inutile à mon dessein, qui n'est sinon d'interpreter l'histoire de ce miraculeux rauissement de saint Paul, qui peut fort bien estre entenduë sans nous ietter si auant dans les choses qu'œil n'a point veuës, qu'oreille n'a point ouïes, & qui ne sont point encore montées au cœur d'aucun homme viuant. Je ne passeray pas mesmes aujourd'huy à la consideration du reste de cette histoire, où l'Apostre dit qu'il a ouï des paroles innarrables, & qu'il est impossible aux hommes de raconter, parce que la matiere en est si ample qu'elle ne pourroit estre contenue dans le reste de cette action, & qu'elle merite bien qu'on ne passe pas à la legere par dessus : de sorte qu'il ne me

reste plus sinon à tirer quelques fruits des choses que vous aués entenduës, pour les appliquer plus particulièrement à nostre commune edification. Vous voyés, mes freres, que l'Apostre a esté sujet à l'enuie, à la medisance, à la calomnie & aux autres choses fascheuses & importunes de cette nature; qui ont accoustumé d'estre produites par la passion. De la part de qui donques est-ce qu'illes a experimentées? Est-ce de la part des Payens? Ils l'ont à la verité persecuté. Mais ils ne luy portoyent point d'enuie, & leurs persecutions consistoyent en prisons, en battures, & en autres semblables insultes que l'Apostre prenoit à gloire, parce qu'il les enduroit pour le nom & pour la verité de Christ. Du reste, ils ne prenoient pas à tasche de le déchirer par leurs detractions, ny n'espandre le venin de leurs langues sur sa reputation. C'estoit de la part de ceux qui faisoient profession d'estre Chrestiens qu'il auoit à souffrir tous ces mecontentemens là, & vous pouvés croire, fieres bien-aimés, qu'il luy en estoient beaucoup plus sensibles. Car on n'est pas surpris de se voir mal traité par ceux qui se declarent ouuer-

de la II. aux Cor. v. 1. 2. 3. 4. 5. 31
tement ennemis. Mais de ceux qui se di-
sent freres, qui font profession d'une
mesme religion, de qui on deuroit atten-
dre toute sorte de support & de consola-
tion, se voir harcelé & diffamé, c'est ce
qui met la patience d'un homme de bien à
une merueilleuse espreuve. Mais encore
quels Chrestiens? Sont-ce de ceux du
commun, & des gens de condition po-
pulaire? Non. Ils se disent Ministres de
Iesus Christ, & osent bien faire compa-
raison de leur Ministère avecque celui
de S. Paul: ce qui rendoit encore sans
comparaison la morsure de leurs calom-
nies plus douloureuse. Et c'estoyent ses
grands dons qui luy attiroient tout cela.
Car si ces gens n'eussent rien veu en luy
d'extraordinaire & d'éclatant, ils l'eussent
laissé en repos. Mais parce que la splen-
deur de ses vertus & de sa reputation
estoit grande en l'Eglise de Dieu, ils ne
la peuvent supporter, & autant qu'ils
peuvent ils la ternissent. Et cela mesme
est arriué à nostre Seigneur Iesus Christ.
D'elles-mesmes les troupes auoyent de
l'inclination à l'admirer, & de fait quand
elles suivent leurs propres mouuemens,
elles luy donnent des acclamations, &

remplissent toute la Judée de la célébratiō de ses louāges. C'est par les Sacrificateurs, par les Docteurs de la Loy, par les Phariſiens, par les Gouverneurs & les Conducteurs de la Natiō, que le bruit de ses actiōs miraculeuses offenoit, qui par l'autorité qu'il acqueroit parmy le peuple d'Israël, voyoyent la leur se diminuer & se flestrir, qu'il est si estrangement perlecuté, qu'en fin ils l'amenent à souffrir vne croix ignominieuse. D'autres seruiteurs de Dieu que S. Paul ont encore passé par là; & ce que Chrysostome a eu à endurer en son temps, ne luy est pas venu des Payens, ny du commun des Chrestiens, parmy lesquels il estoit en quelque espee d'admiration: ç'ont esté les Euesques mesmes qui ont esté ou les auteurs ou les ministres de ses persecutions, & qui ont porté les Puissance, ou qui ont esté leurs instrumens, à l'expulser ignominieusement du lieu où par son incōparable eloquence, & par son extraordinaire sainteté, il estoit en souveraine edification à l'Eglise. Et en tous les siècles qui sont venus depuis il y en a tousiours eu quelcun, que la Prouidence de Dieu a permis qu'on exerçast de la mesmes sorte. Tellement que s'il y a quel-

cun

cun qui soit sujet à de semblables accidens, il a vne grande matiere de consolation de voir deuant ses yeux de si illustres exemples. Car si Christ, si S. Paul, si Chrysostome, dont les vertus ont esté tout à fait incomparables, chacun en son temps & en son rang, n'ont pas esté exempts de la calomnie de la part de ceux de qui ils deuoient attendre de l'estime, de la recommandation, de la veneration, & de l'admiration, pourquoy ceux qui leur sont infiniment inferieurs se scandaliseront-ils de se voir exposés à la médisance? Mais comme il y a matiere de consolation en cela, il y a aussi certes dans la façon dont ils se sont comportés en ces tentations-là, beaucoup de matiere d'instruction pour les fidelles Ministres de l'Euangile. S. Paul, comme vous l'aués veu en ce que nous vous auons rapporté de luy au commencement de cette action, defend l'autorité de sa charge contre ceux qui la vouloyent abbaïsser. Et il le deuoit faire, par ce qu'il y alloit de l'intérest de nostre Seigneur qui la luy auoit commise. Il a soin mesme de maintenir la bonne reputation de ses qualités personnelles : & encore en cela il auoit raison:


Car outre qu'il est de la iustice de la Nature, d'opposer en telles occurrences la verité au mensonge, & de conseruer entre les viuans la bonne odeur de son nom, & mesmes de laisser des monumens de son innocence qui puissent estre connus par la posterité, il y alloit de l'edification de l'Eglise de Dieu, que l'on trauersoit en calomniant S. Paul, & en imprimant des flestrissures sur l'honneur de son ministere. Encore donques qu'il fust resolu à marcher tousiours constamment en sa vocation, parmy honneur & ignominie, parmy diffame & bonne renommée, & qu'il le pratiquast effectiuement, sans que toutes les trauerses qu'on luy donnoit le retardassent aucunement en la carriere de l'Euangile, si est-ce que, comme vous voyés, il ne s'abandonne pas soy mesme, mais il maintient la renommée de l'integrité de sa conduite, & laisse dans ses diuines Epistres des enseignes de ce qu'il estoit, afin que la memoire en demeure iusques à la consommation des siecles. Neantmoins il le fait en telle sorte qu'il y garde vne grande modestie & vne singuliere moderation d'esprit. Il esloigne de soy le plus qu'il peut le soupçon de l'or-

gueil & de la vanité, & tafche de contraindre les ennemis & les enuieux mefmes à reconnoiftre qu'il eftoit tout autre qu'ils ne fe s'imaginoient, ou qu'ils ne le vouloyent faire croire aux autres; & donne ainfi à tous ceux qui viendront apres, vne admirablement belle leçon de leurs deportemens en pareilles occurrences. Il eft vray, mes freres, qu'il eft quelquesfois difficile de vaincre fur le champ la malice de la calomnie, & de furmonter les artifices de fes ennemis. Quand noftre Seigneur parle de foy vn peu auantageufement, les Iuifs luy reprochent qu'il fe rend témoignage à luy-mefme, & difent que fon témoignage n'eft point digne de foy. Quand S. Paul raconte les chofes que Dieu a faites par luy ou pour luy dans l'exercice de fon miniftre, les aduerfaires l'accusent d'imprudence, & mefmes de vanité. La conftance, la magnanimité, la liberté de parler, a paffé pour orgueil en Chryfoftome, & eft arriué à plusieurs autres que les chofes mefmes qu'ils difoyent pour feruir à leur defenfe, leur ont efté tournées à blafme par leurs ennemis. Mais tant y a, il faut toujours faire fon deuoir, en imitant les vertus du Seigneur Iefus &

la conduite de ses Apostres. Et bien que la malice de quelques vns se monstre obstinée & inuincible, il ne faut pas laisser de dire, comme fait icy S. Paul, ce qui en seruant à la iustification de nostre innocence, peut outre cela contribuer à l'edification du public. Et comment est-ce qu'y contribuë ce que nostre Apostre dit icy? Certes, mes freres, il illustre la gloire du S. Euangile. Car quelle secte de Philosophes, de celles qui ont esté le plus en reputation dans tous les siecles, se peut vanter d'auoir esté confirmée par de semblables visions? Quelle religion, par qui qu'elle ait esté instituée, a eu des seaux si magnifiques & si authentiques de la diuinité de sa reuelation? Moyse, certes, a bien monté sur la Montagne, & y a eu de fort estroites communications avecque Dieu. Mais autre chose est la montagne de Sinaï, & autre le troisieme ciel: autre les commandemens dont Moyse deuoit former le corps de la Loy, & autre ces paroles inenarrables. Outre cela, il releue l'Apostolat de ce grand seruiteur de Dieu, & le rend ie ne sçay comment plus efficace à la consolation & à l'edification des Gentils, à qui nostre Seigneur

auoit particulièrement destiné l'employ de son ministère. Et il nous importe qu'il soit honorable, & qu'il paroisse que nos ancestres ont esté conuertis par vn homme que Dieu a esleué d'une façon si admirable, qu'il l'a bien voulu admettre à la participation des choses incomprehensibles qui se disent en sa presence dans son sanctuaire de là-haut. Enfin, bien que cela soit arriué au seul S. Paul, & que nous n'en voyons point d'autre exemple, si est-ce qu'il ne laisse pas de nous fournir l'occasion de faire reflexion sur nous-mesmes, & sur les auangousts que Dieu nous donne dès cette vie de la felicité celeste à laquelle nous aspirons. Car il ne nous rait pas au ciel à la verité, mais il fait descendre le ciel en nos cœurs, par les pressentimens qu'il nous donne de son eternelle felicité, & par les asseurances de nostre benite adoption, qu'il imprime dans nos consciences. Comme donques S. Paul s'est glorifié en Dieu de ce qu'il l'auoit enleué en Paradis, glorifions-nous en luy de ce qu'il a la bonté de mettre le Paradis en nos ames. Mais comme il s'en est glorifié en Dieu seul, donnons pareillement à nostre seul Redempteur la

gloire de nostre consolation & de nostre
 esperance. Comme S. Paul s'est soulagé
 en ses ennuis par le souuenir de ces diui-
 nes reuelations, adouciffons l'amertume
 de nos afflictions par le sentiment que
 Dieu nous donne de sa paix : & comme
 S. Paul a pris cette sienne exaltation là-
 haut, pour vn prejugé de sa resurrection
 d'entre les morts, & de sa glorification
 dans le ciel ; prenons les assurences que
 Dieu nous donne de sa dilection en nostre
 Seigneur, pour des arres indubitables de
 la participation de l'immortalité glorieu-
 se. A Dieu, qui nous en a donné l'espe-
 rance, Pere, Fils & S. Esprit, vn seul Dieu
 benit eternellement, soit gloire, force, &
 empire aux siecles des siecles, AMEN.





SERMON SECOND

S V R C E S M O T S ,

Et aouï des paroles inenarrables, & qu'il n'est possible à homme de raconter.

FRERES BIEN-AIMEZ EN NOSTRE
SEIGNEVR.

L'Apoltre S. Paul escriuant 'aux Ro-
mains, en l'onzieme chapitre del'Epistre
qu'il leur a adressée, apres auoir parlé
de la diuerse dispensation de Dieu enuers
les Iuifs & enuers les Gentils; comment
ayant laissé cheminer ceux-cy en leurs
voyes, il a appelé les autres à sa connois-
sance par l'establissement de son alliance
au milieu d'eux: puis apres, de la vocation
des Gentils, & de la rejection des Iuifs,
comment il a fait prescher efficacement
son Euangile à ceux-là, & a retranché
ceux cy de ses alliances; & enfin, de l'es-
perance du rappel des Iuifs apres que la
plenitude des Gentils sera entrée, s'escrie,
*O profondeur des richesses & de la sapience de
Dieu! Que ses iugemens sont incomprehen-
sibles, & ses voyes impossibles à trouver! Cest*

à dire que ce grand seruiteur de Dieu voyant qu'il n'y auoit pas moyen de rendre les raisons de la conduite de la Prouidence de Dieu en cela, parce qu'il ne les auoit pas reuelées, il s'arreste-là comme sur le bord d'un abysme qu'il est impossible de trauerser ny de sonder, & que qu'il le voudroit essayer, se ietteroit en des speculations, & se precipiteroit soy-mesme en des profondeurs où il ne manqueroit pas de se perdre. Peut estre, mes freres, qu'il ne seroit pas si perilleux de rechercher quelles ont esté ces paroles que l'Apôstre a ouïes en Paradis : mais neantmoins on peut dire certainement qu'il seroit autant inutile. Car puis qu'il dit icy luy-mesme qu'elles sont inenarrables, & qu'il est impossible à qui que ce soit d'entre les hommes de les raconter, à quoy pourroit enfin reüssir la curiosité de les sauoir, sinon à ce qui reüssit de tascher d'approfondir des abysmes qui n'ont point de fond ; ou d'essayer à mesurer des choses qui sont infinies ? Mais quand il y auroit en cela plus d'esperance de succès qu'il n'y en a, il ne faudroit pourtant pas y lascher la bride à sa curiosité ; parce qu'en toutes choses la modestie est vne

des plus belles qualités de l'esprit humain : qu'elle est requise sur tout en ceux qui interpretent la Parole de Dieu, de qui quelcun des Anciens a dit qu'ils ne doivent pas estre hardis : & qu'apres vn tel aduertissement qu'est celuy de S. Paul en cet endroit , vouloir aller au delà de ce qu'il nous en a reuelé , ce seroit vne temerité punissable. Je seray donc brief icy, parce que mon texte ne me fournit pas le sujet de parler long temps, & que ie ne prends point de plaisir à sortir hors des bornes du theme que ie me suis proposé ; & particulièrement ie tascheray, moyennant la grace de Dieu , d'y estre retenu & circonspéct , pour ne mettre pas le pied, comme dit nostre Apostre en quelque lieu, dans les choses que ie n'ay point veuës. La premiere chose qu'il dit icy, mes freres, c'est qu'il a ouï : & vous voyés comment nos personnes sont composées. Outre les puissances de nos ames, & les sens qu'on appelle interieurs , nous en auons d'extérieurs au nombre de cinq, à sçauoir l'ouïe, la veuë, le flair, le goust, & l'attouchement. Or de quelque façon que ce rauissement se soit fait, (& S. Paul ne decide point si c'est en corps ou hors du corps,)

le toucher n'estoit pas vne faculté qui deust icy exercer ses operations. Car c'est vn sens trop materiel & trop charnel ; les objets qui s'y rapportent sont trop grossiers, & les voluptés qu'ils causent quand on les reçoit, sont trop animales, pour pouuoir trouuer lieu dans les lieux celestes. Le goust n'y estoit pas propre non plus: car c'est vne espede d'attouchement, & par consequent il est materiel comme luy, & au troisieme ciel on ne boit point & on ne mange point. Et quant à ce que nostre Seigneur dit qu'au royaume des Cieux nous *serons assis à table avec Abraham, Isaac & Iacob*, & qu'à celuy qui vaincra, *il donnera à manger de la manne cachée, & du fruit de l'arbre de vie qui est au milieu du Paradis de son Dieu*, ce sont des façons de parler symboliques, qu'il emprunte des choses qui se font en la terre, pour nous représenter celles du ciel, qui sont d'une nature toute differente, & qu'à cause de nostre foiblesse, il seroit absolument impossible que nous peussions comprendre autrement. Le flair mesme n'y estoit pas bon. Parce qu'encore que ce sens soit plus delicat, & en quelque sorte plus spirituel que les deux autres, si vous

le comparés avec eux, si est-ce qu'à le regarder absolument en luy-mesme, il ne laisse pas d'estre materiel. Et de plus, les bonnes odeurs, qui sont les objets qui s'y rapportent, sont des qualités qui s'exhalent d'une temperature & d'une coction bien parfaite des elemens, quand la chaleur du Soleil les a excellemment bien & meslés & digérés dans les corps qui se sont formés de leur composition. Or il n'y a point là-haut d'elemens de la nature des nostres, & il ne s'y en fait aucun mellange dans la composition des corps. Aussi est-il certain que ce sens-là tient beaucoup de cette condition naturelle & animale qui doit estre abolie en nous lors que nous serons rendus capables de la demeure du Ciel. Mais pour ce qui est des yeux, c'est un sens si spirituel & si noble, & si propre pour acquerir la connoissance des choses, qu'on pourroit icy s'estonner comment l'Apostre n'en fait point de mention; veu principalement qu'il y a là-haut des objets visibles, qui luy pouvoient donner beaucoup de contentement, & luy causer une souveraine admiration. Quelques celebres interpretes de la Bible trouvent icy quelque chose de mysterieux. Car ils disent

que cette vision, & la narration que l'Apostre nous en fait, ont esté dispensées d'une façon accommodée à la façon de laquelle Dieu nous communique sa connoissance par son Euangile: & qu'il y employe non pas les yeux, mais l'ouïe, selon ce que nostre Apostre dit au chapitre cinquième de cette mesme seconde Epistre aux Corinthiens, que *nous cheminons par foy, & non point par veüe*. Et ils y obseruent mesme vne difference considerable entre Moyse & S. Paul. Car Moyse, quand il estoit sur la Montagne, n'oyoit pas seulement les choses qu'il deuoit rapporter au peuple par le commandement de Dieu, il voyoit aussi le modèle de celles qui deuoient estre construites & pratiquées pour le Culte de la Diuinité sous cette alliance-là. La raison de cela est qu'il a deu establir vne Religion dans laquelle non seulement les Israelites deuoient apprendre par l'ouye les choses qu'ils deuoient sauoir, mais où ils en deuoient encore voir d'autres esquelles le service de Dieu auoit à consister. Au lieu que quant à l'Apostre S. Paul, le grand Predicateur de la nouvelle Alliance, il a esté esleué au troisieme ciel, qui surpasse en dignité & en ele-

uation la montagne de Sinaï, autant que l'Euangile de Christ est plus excellent que l'alliance legale. Mais il a ouï seulement; & n'y a rien veu: parce que l'Euangile deuoit estre communiqué à l'entendement humain, par l'ouïe & non par la veüe. Pour ce qui est de la comparaiſon de Moyſe avec S. Paul, nous en parlerons tantost: & quant à celle des deux religions, il est certain que la religiõ qui a esté establie par l'alliance de la Loy, estoit incomparablement plus charnelle & plus visible que celle qui nous a esté reuelée par l'Euangile. Car le Tabernacle, & les vtenſiles qui y estoient; & les victimes qu'on y offroit, & generalement tout ce culte-là, estoit non seulement veü des yeux, mais pouoit estre manié des mains, & estre l'objet de tous les sens & de toutes les puissances corporelles. Au lieu que maintenant comme Dieu est vn Esprit, nous l'adorons *en esprit & en verité*, selon que nous y sommes enseignés par nostre Seigneur Iesus Christ mesme. Et bien que les Sacremens qui font vne partie du seruice de Dieu pariny nous, ayent esté instituez en des elemens qui tombent sous les sens du corps, & particulierement

sous les yeux, c'est neantmoins peu de chose que cela en comparaifon des institutions legales. *La foy*, dit nostre Apoftré, *est par l'ouïe, & l'ouïe est par la Parole de Dieu.* Et c'est la predication de l'Euangile qui est appellée *le miniftre de l'Efprit*, parce que c'est le moyen duquel Dieu se fert pour amener les hommes à la connoiffance de Christ, & du falut dont il nous a donné les promesses. Et ce miniftre, qui se rapporte à nos oreilles, durera iufques à ce qu'estans venus à l'effectiue poffeffion de ce grand falut, nous cheminions non plus par foy, mais par veuë. Neantmoins, si ce rauiffement auoit esté executé pour quelque tel myftere que cela, il femble qu'il eust esté à propos de le difpenfer d'une autre forte. Car il eust falu que S. Paul eust & ouï & veu, parce que nous oyons maintenant, & que nous verrons quelque iour. Mais il eust esté conuenable que les paroles qu'il a ouïes euffent peu fe raconter, pour fignifier que l'Euangile nous deuoit estre reuelé par la predication; & que les choses qu'il eust veuës n'euffent peu fe reprefenter: pour nous donner à entendre que la gloire de là haut nous est abfolument inconnüe iuf-

ques à ce que nous en venions en iouissance. Pour moy, ie ne ferois pas difficulté de dire que l'Apostre S. Paul a & veu & ouï des choses inenarrables. Soit que ce transport ait esté fait en corps, ou qu'il ait esté fait hors du corps, il ne pouuoit auoir la faculté de l'ouïe en estat d'écouter des paroles inenarrables, qu'il n'eust celle de la veüe en estat de voir des choses de mesme condition. Mais ie croy qu'il ne fait mention que de l'ouïe seulement, parce que ce qu'il a veu, il ne l'a veu, quelque glorieux qu'il fust, sinon, par maniere de dire, par accident seulement, parce qu'il ne pouuoit estre enleué là-haut sans y voir des choses émerueillables. Mais ce qu'il a ouï, ç'a esté d'une autre façon, parce qu'il a esté enleué exprés pour ouïr des paroles inenarrables qui deuoient estre directement adressées à sa personne. Car il est tout à fait vray semblable, que c'est à luy que les voix celestes ont parlé. Comment qu'il en soit de cela, il dit qu'il a ouï des *paroles*. Quelques vns tournent icy *des choses*. Et à la verité il ne peut pas estre contesté qu'en la langue Hebraïque, dont le Nouveau Testament imite assés souuent les locutions, vn mesme mot signifie & des

choses & des paroles. Et quand il est dit *que l'homme ne vit pas seulement du pain, mais aussi de toute parole qui procede de la bouche de Dieu*; c'est pour nous donner à entendre qu'encore que le pain soit la nourriture ordinaire des mortels, si est-ce que Dieu n'y a point tellement attaché la vertu de nous nourrir, que toute autre chose ne soit capable de le faire, quand il plaira à Dieu de l'ordonner pour cela. Et la raison est bien aisée à dire pourquoy vn mesme mot, entre les Hebreux, sert à signifier & les paroles & les choses également. Car les paroles sont inuentées pour représenter les choses, & ne seruent sinon à cela. Et les choses nous seroyent absolument inconnuës sans le seruice des paroles: au moins certes celles qui ne peuvent estre apperceuës par nos yeux. Celles que nous pouuons voir peuvent bien estre connuës par nous sans qu'on nous en parle. Mais celles qui sont ou de leur nature inuisibles, ou distantes de nous de tant d'interualle qu'elles sont hors de la portée de nos yeux, ne peuvent entrer dans nostre intellect que par le ministere de la parole, quand elles nous sont rapportées, ou expliquées par quelcun. Et quand

quand ces deux choses là sont iointes ensemble, elles s'vnissent par l'vſage, & par maniere de dire, s'incorporent de telle façon, que les paroles ſont priſes pour les choſes meſmes, & qu'on leur attribue les actions, & les mouuemens, & les operations qui ne conuiennent ſinon aux choſes ſeulement. Ainſi le Nom de Dieu eſt en l'Eſcriture ſainte pris pour Dieu meſme, & dans le Nouveau Teſtament les miracles ſont attribués au Nom de Chriſt, comme ſi c'eſtoit luy qui les fiſt. Juſques-là que là où les paroles manquent, les choſes ſont en la parole de Dieu quelques fois preſumées manquer, & les Apoſtres fondent des myſteres là-deſſus, comme en l'hiſtoire de Melchiſedec. Car dauſant qu'au liure de la Genèſe, où il eſt parlé de luy il n'eſt rien dit ny de ſon pere, ny de ſa mere, ny de ſa naiſſance, ny de ſa mort, l'Apoſtre en l'Epiſtre aux Hebreux conſidere cela comme ſi eſſectiuement il n'auoit eu ny pere ny pere, & qu'il euſt eſté ſans commencement de iours & ſans fin de vie; afin d'en former vn type qui ſe rapportaſt à la perſonne & à la charge du Seigneur Ieſus. Ce n'eſt pas qu'il ſe face en cela quelque choſe de ſemblable à ce que

les Magiciens ou les superstitieux s'imaginent, ny qu'à la prononciation qui se fait de quelques paroles, il se puisse par leur vertu produire des effets miraculeux & surnaturels. Soit qu'on les escriue ou qu'on les prononce, ny les voix articulées, ny les caracteres imprimés, n'ont aucune vertu que celle de leur signification. Encore ne l'ont-ils pas d'eux-mesmes, mais de la volonté des hommes, & du consentement des nations. Ce n'est pas encore qu'il s'y trouue rien qui approche de ce que ceux de la Communion de Rome attribuent aux paroles de l'institution de la sainte Cene, desquelles ils disent qu'elles ont le pouuoir de conuertir la substance du pain & du vin en la substance du corps & du sang de nostre Seigneur Iesus Christ. C'est vne imagination qui ne s'accorde pas avecque la Parole de Dieu, qui choque l'analogie de la Foy, qui renuerse le discours de la Raison, & qui dément le témoignage & la déposition des sens mesmes. Ce qu'il y a de plus remarquable en cette vnion des paroles avec les choses, c'est qu'elle se fait à peu près comme celle d'un verre transparent avec un obiet visible que nous contemplons au trauers.

de la II. aux Cor. v. 1. 2. 3. 4. 5. sz

Car comme encore que le verre soit plus proche de nos yeux , si est-ce que c'est proprement sur l'obiet mesme que nostre veuë se porte, & qu'en son operation nous ne faisons presque aucune consideration du verre , bien que ce soit par son entremise que nous apperceuons l'objet : Ainsi, bien que ce soyent les paroles qui touchent immediatement nos oreilles, & que les choses mesmes n'y entrent, & ne viennent iusques à nos entendemens, sinon par le vehicule des mots, si est-ce que nos esprits ne s'arrestent presque point aux mots , & se portent directement sur les choses qu'ils representent. Il est donc comme indifferent de tourner ce mot par celuy de *choses* ou par celuy de *paroles*, & neantmoins ie croy que nos interptetes ont fort bien fait de s'arrester à ce dernier. Car premierement , la premiere & plus propre intelligence est de signifier des paroles : or il ne se faut point departir de la propre signification des termes, si l'on n'y est obligé par quelque necessité. Puis apres, bien qu'on puisse dire, *i'ay ouï des choses*, si est-ce que ce terme d'ouïr, & celuy de paroles, ont vn plus naturel rapport l'vn à l'autre, que celuy d'ouïr, & de choses,

n'en peuuent auoir. Parce que comme ie l'ay desia dit, la relation des paroles à ouïr, est immediate, au lieu que celle des choses ne l'est pas. De mesmes, il ne seroit pas impertinent de dire qu'il a ouï des choses inenarrables, & qu'il n'est permis à aucun homme de raconter. Mais il est beaucoup plus iuste de dire qu'on a ouï des paroles ineffables ou inenarrables, & qu'il est au dessus de la puissance des hommes de pouuoir exprimer & rapporter. Enfin, il y a dans l'original ie ne sçay quelle rencontre fort agreable & fort elegante entre le mot de *paroles* & celuy d'*inenarrables*, qui ne s'y rencontreroit pas si celuy de *choses* y estoit employé. Car il y a au Grec: *i'ay ouï des paroles qui ne peuuent point ou qui ne doivent point estre parlées*; ce qui n'a point de grace en nostre langue, mais qui fait vn fort beleffect en l'original. Mais voyons desormais en quel sens l'Apostre dit qu'elles sont inenarrables, & qu'il est impossible à tout homme de les raconter. D'abord il faut icy remarquer que ce terme *inenarrables*, & ceux-cy, *qu'il est impossible à tout homme de raconter*, ne signifient qu'une mesme chose, & que les derniers n'ont esté adjoustés que pour

seruir de commentaire & d'explication au premier. Car le saint Apostre a eu quelque crainte que s'il n'employoit que le premier il ne fust pas assés entendu, c'est pourquoy il a adjousté les autres pour l'interpreter : ou que quand il seroit assés entendu, & qu'il n'eust pas besoin d'interpretation, il n'exprimast pas son intention avec assés d'emphase. Apres cela, & l'un & l'autre de ces termes, inenarrable, dije, & qui ne se peut raconter, peuvent auoir deux significations, comme on peut considerer en l'homme de deux sortes de puissances. Car il y en a vne que l'on peut appeller physique, parce qu'elle consiste dans la faculté naturelle qu'on a de faire quelque chose, quand on est muni de la force & des organes necessaires pour cela. Ainsi disons nous qu'il est possible à vn homme de marcher, quand il a de bonnes iambes & de la vigueur dans le corps : mais qu'il luy est impossible de voler, parce que la Nature ne luy a pas donné des ailes. Et il y en a vne autre que l'on peut appeller morale, parce qu'elle consiste en la permission qui nous a esté donnée de faire quelque chose. Ce qui s'exprime ordinairement par le terme de

permis, ou de licite, ou de loisible, si nostre langue Françoisse souffre à cette heure que l'on se serue de ces mots. Mais quelquesfois nous nous seruons de ce terme de *pouuoir* pour l'exprimer. Comme quand nous disons que nous pouuons à cette heure manger de toutes sortes de viandes; ce que les Iuifs ne pouuoient pas autrefois. On peut donc icy prendre les paroles de S. Paul en deux façons, & de fait les interpretes les tournent diuersement. Car quelques-vns traduisent comme ie l'ay leu deuant vous dans la version dont nous seruons, *qu'il n'est possible à homme de raconter*: & les autres le tournent ainsi; *qu'il n'est permis ou loisible à homme de raconter*. De sorte qu'il faut examiner ces deux interpretations l'une après l'autre. Quelques-vns, qui s'attachent à la seconde, font icy vne comparaisn de Moyse avecque S. Paul. Car, disent-ils, Moyse a monté sur la montagne, & S. Paul a esté esleué au Ciel. Moyse a eu sur la montagne vne fort estroite communication avecque Dieu: & S. Paul a esté admis à la participation des choses qui se disoyent dans le sanctuaire de l'Eternel. Moyse a veu sur la montagne, & a receu de Dieu mesme,

la description bien exacte de tout ce qui concernoit la cōduite de l'Eglise d'Israel; S. Paul a receu en Paradis la tablature du gouuernement de l'Eglise Chrestienne tandis qu'elle sejournera sur la terre. Mais tant s'en faut qu'à Moÿse il ait esté defendu de reueler les choses qu'il auoit veuës & ouïes, que mesme il luy a esté commandé de les declarer: ce qu'il a fait tant dans ses Escrits, où il a donné au peuple d'Israel, avec vne exactitude admirable, toutes les ordōnances qui cōcernoyent le seruice de Dieu, la Police, & la Moralité; que dans les conseils qu'il a donnés de viue voix, selon que les occurrences s'en sont presentées. Et quant à S. Paul, non seulement il ne luy a pas esté permis d'en faire de mesme; mais mesme il luy a esté expressement defendu. D'où vient que S. Paul, qui estoit peut-estre plus capable de donner conseil en toutes choses que S. Pierre, ne l'a pas fait: au lieu que S. Pierre, qui n'auoit pas veu de si admirables visions, est celuy à qui il a esté ordonné de fournir à l'Eglise de Iesus Christ toutes les instructions qui sont necessaires pour sa conduite. Vous voyés bien, mes freres, à quoy cette interpretation là tend. On

veut à la verité preferer S. Pierre à S. Paul: mais c'est afin d'attribuer quelque chose à celuy que l'on dit estre le successeur de S. Pierre en son Apostolat, comme si c'estoit à luy que cette pretendue autorité de gouverner l'Eglise de Dieu, fust deuoluë en la terre. Desia, c'est à mon aduis vne erreur que de faire comparaison de S. Paul avecque Moysse en cette occasion, comme si ç'auoit esté à mesme dessein que l'un eust esté esleué au troisieme ciel, & que l'autre auroit esté admis à communiquer avecque Dieu sur le sommet de la Montagne. Moysse n'a point esté en cela le type de S. Paul, mais de Iesus Christ. Car comme il a esté sur la montagne, Christ a esté dans le Ciel. Comme il a eu vne fort intime communication avecque Dieu, Christ a esté là haut au Ciel dans le sein mesme du Pere. Comme il a appris sur la montagne ce qu'il deuoit & faire & sauoir pour instituer la religion dont il estoit le Mediateur, afin de la rapporter au peuple d'Israël, Christ a deu apporter icy-bas, & y a effectivement apporté la reuelation des secrets dont la religion Chrestienne deuoit estre composée. Comme il apportoit de la

montagne vn visage rayonnant, dont le peuple d'Israël ne pouuoit soustenir l'éclat, Christ est descendu de là-haut tout resplendissant des rayons de sa diuinité, & de l'éclat de sa charge, & des lumieres de verité qui en sortoyent, & qui se respan-
 doient magnifiquement autour de luy: mais les Iuifs auoyent les yeux de l'entendement trop foibles & trop obscurcis pour en pouuoir supporter la splendeur émerueillable. Apres cela, mes freres, c'est sans doute estre bien-hardi d'oser ainsi determiner, que comme Moysé a veu toute la delineation du gouuernement de l'Eglise d'Israël sur la montagne de Sinai, S. Paul a pareillement veu au Ciel la delineation du gouuernement de l'Eglise Chrestienne. Puis qu'il dit que les paroles qu'il a ouïes sont inenarrables, & qu'il n'est ou permis ou possible à personne de les exprimer, d'où est-ce que ceux qui mettent cette interpretatiõ en auant, ont peu recueillir que c'est le plan de l'Eglise Chrestienne & de son gouuernemēt qui luy a esté découuert? N'est-ce pas là proprement ce que nostre Apostre condamne ailleurs, s'auancer & mettre le pied dans les choses que l'on n'a point veuës?

S. Paul cache & supprime la connoissance de ces merueilles tant qu'il peut : il met au deuant des barrieres pour empêcher la curiosité de l'esprit de l'homme d'en approcher : & neantmoins on a la hardiesse, non seulement de s'en enquerir, mais de dire determinément ce que ce peut estre. C'est veritablement entreprendre & vouloir sauoir au *delà de ce qui est escrit* : & comme l'on met aux bords de quelques cartes geographiques ; Il n'y a plus rien au delà sinon de profondes sablonnières, ou des mers absolument inconnues, ou des pays inhabités ; on peut dire que hors les termes de ce qui est escrit en la Parole de Dieu, il n'y a, en ce qui touche les matieres de la Foy, sinon des precipices & des abysses où l'entendement de l'homme se perd. Adioustés en troisieme lieu, que non seulement ce qu'ils disent là est tres-incertain, mais mesmes que ce qu'ils y adioustent n'est pas veritable. Car il est bien vray que l'Apostre S. Pierre nous a laissé deux excellentes Epistres dans lesquelles il a mis d'admirablement beaux enseignemens. Et bien que ceux qu'il a donnés au Concile de Ierusalem soyent communs aux autres Apostres, &

mesme à S. Paul qui y assista, ie ne m'op-
poseray pas à ce que l'on die qu'il y en fit
les premieres ouuertes, & qu'ainsi on
ne les luy attribuë en quelque sorte en par-
ticulier. Mais ie soustiens que S. Paul nous
en a beaucoup plus laissé que luy, & dans
vne beaucoup plus grande varieté de ma-
tieres. C'est luy qui nous a appris quelles
doient estre les qualités des Euesques &
des Diacres, & quelle doit estre leur con-
duite en l'Eglise de Dieu. C'est luy qui
leur a donné le modelle, aux vns de leur
administration, aux autres de la maniere
de leur predication, & à eux tous en com-
mun l'aduertissement comment ils se
doient proposer à tous les fidelles en
exemple. C'est luy qui nous a laissé par
escrit la maniere selon laquelle il faut ce-
lebrer le sacrement : c'est luy qui nous a
enseignés comment il faut faire le seruice
en l'Eglise de nostre Seigneur & en quelle
langue. Nous tenons de luy comment il
se faut gouverner en la distribution des
censures qu'il faut appliquer aux delin-
quans & aux scandaleux : & c'est sa sagesse
qui nous a fourni les instructions qui con-
cernent le mariage. Il ne s'est pas cōtēté
de nous exhorter, comme il a fait, viue-

ment à la charité; il a encore prescrit fort soigneusement comment il la faut pratiquer, iusques à monstrier la façon de faire les aumônes & les collectes. C'est de luy que nous tenons les preceptes de la condescendance charitable que nous devons auoir les vns pour les autres, les Juifs pour les Gensils, les Gentils pour les Juifs, les forts pour les foibles, & generally chacun pour son frere & pour son prochain, afin de seruir à l'auancement de sa foy, & à l'edification commune. Mais cela me tire trop loin, & il vaut mieux que ie le die en vn mot; c'est de l'abondance de l'Eprit qui luy a esté communiqué, comme d'une source feconde & inépuisable, que l'Eglise de Dieu a tiré, tant les dogmes de sa foy, que les preceptes de sa sainteté, & les regles de son gouvernement & de l'administration de sa Discipline. De sorte qu'il y en a beaucoup plus dans ses Escrits, qu'il ny en a, non dans ceux de S. Pierre seulement: mais encore en tous ceux des autres Apostres ensemble. Voyons l'autre interpretation, qui tourne nostre texte ainsi, *qu'il n'est pas possible à aucun homme de raconter.* Nous auons posé cy-dessus que ce que S.

de la 11. aux Cor. v. 2. 3. 4. 5. 6.

Paul a ouï ce sont des paroles. Or dans les paroles il n'y a outre le son de la voix, que deux choses à considérer : à sçavoir l'articulation & la signification. Quant à l'articulation, il est malaisé de concevoir comment absolument elle n'eust peu estre imitée. Car à la verité les enfans ont de la peine à bien articuler les paroles que nous prononçons devant eux, & que nous leur voulons faire imiter. Mais c'est qu'ils n'ont pas encore les organes assés-bien formés ny assés accoustumés à cela. Lors qu'une fois nous auons acquis l'habitude de parler, il y a peu de mots que l'on prononce devant nous, que nous ne puissions proferer, si nous y voulons apporter vn peu d'attention ; ou bien il faut que la langue d'où ils soyent tirés, soit tout à fait esloignée de celle que nous parlons ordinairement, & comme barbare à nos oreilles. Mais quand celles que S. Paul a ouïes auroient esté si estranges qu'il luy auroit esté absolument impossible de les prononcer, ce ne seroit pas vne merueille dont l'Apostre deust faire tant de cas qu'il paroist qu'il en fait icy, s'il n'y auoit rien dauantage. Car que nous importe, & à luy aussi, qu'il ait ouï

là-haut de certains mots si sauvages & si éloignés de tous les langages qu'il parloit, qu'il luy eust esté impossible d'en représenter ny le son ny la structure ? Pour ce qui est de la signification, S. Paul a entendu celle de ces paroles ou non. S'il ne l'a pas entenduë, il n'y a rien en cela de fort merueilleux non plus ; & qu'estoit-il besoin qu'il fust ravi là-haut au ciel, pour ouïr quelques paroles dont on ne luy donnoit pas l'intelligence ? Il dit luy-mesme en quelque lieu, en parlant de ce qui se doit pratiquer en l'Eglise de Dieu, que cinq paroles que l'on entend, sont de plus d'utilité, & donnent plus d'instruction & d'edification à l'esprit, que mille que l'on n'entend point, & remarque mesme que c'est comme par punition que Dieu denonce par ses Prophetes de parler & de faire parler aux hommes en langue estrangere & non entenduë. S'il les a entenduës, comment dit-il qu'il est entierement impossible de les rapporter ? Car ie veux bien qu'elles luy eussent mis en l'entendement des idées tout à fait extraordinaires & miraculeuses : Je veux, comme il est vray, que nos conceptions soyent assés souuent telles que les expressions

dont nous sommes obligés de nous servir, ne soyent pas capables d'en représenter toute la force ; Si est-ce neantmoins qu'un homme qui sçait parler, comme l'Apostre S. Paul le faisoit excellemment, s'il y veut apporter quelque soin & quelque application d'esprit, n'a point de pensées en l'entendement, sur quelque matiere que ce soit, dont il ne puisse faire voir vne partie bien considerable dans ses paroles, s'il y employe vne langue qu'il possède parfaitement. Car comme la mesme Nature qui a donné aux femmes la faculté de concevoir, leur a aussi donné celle de produire au monde ce qu'elles ont conçu ; ce mesme Dieu qui nous a donné l'entendement pour recevoir l'impression des idées qui se présentent à luy, nous a communiqué le moyen de les exprimer & de nous en faire entendre aux autres. Et comme encore que les femmes ayent quelquesfois de la peine à produire leur fruit au monde, si est-ce que s'il n'y a quelque desordre extraordinaire dans leurs forces, elles en viennent enfin à bout par les efforts de l'enfantement ; quoy qu'il se trouue quelquesfois de la difficulté à représenter les conceptions de

nostre intellect, si est-ce que si les facultés que Dieu nous a données pour cela, ne sont détraquées, pourueu que nous y apportions quelque application extraordinaire, nous y reüssissons à la fin. Et si apres y auoir apporté ce soin & cette assiduité, nous ne pouuons ny proferer ny escrire les choses que nous auons pensées, en telle sorte que nous nous y entendions nous-mesmes, & que nous y soyons entendus par autrui, il faut que no^s ne les ayons pas assés bien imaginées, & qu'il y ait eu dans l'intelligence mesme de l'embarras & de la confusion. Ioignés à cela, mes freres, que le mot que nous traduisons *inenarrable* peut bien à la verité signifier, ce que la parole ne peut exprimer. Mais neantmoins, qui le considerera dans l'usage des bons auteurs Grecs, (car il n'y a comme ie croy, que ce seul endroit du Nouveau Testament où il se rencontre) trouuera qu'il y est plus ordinairement employé pour signifier des choses qu'il n'est pas permis de dire, & qui encore qu'on les peust exprimer par la parole, doiuent neantmoins estre tenuës cachées sous vn silence sacré. Car ils s'en seruent quelques fois pour signifier cer-

tains

ains myſteres qui ſe celebroyent en telle maniere qu'il n'eſtoit pas permis de les reueler. Et ſ'il y a dans ces auteurs quelque autre intelligence de ce mot, c'eſt pour dire des choſes dont la nature eſt ſi infame & ſi deſhonneſte que meſmes il ne les faut pas nommer. Quant aux paroles ſuiuantes, que l'on traduit, *qu'il n'eſt poſſible à aucun homme d'exprimer*, aſſeurément il ſeroit mieux tourné, *qu'il n'eſt licite à aucun homme d'exprimer*, car c'eſt la ſignification propre & ordinaire de ce terme. Et nous le traduifons ainſi en ce paſſage du douzieme de S. Matthieu, où il eſt parlé de Daud : *Comment il entra dans la maiſon de Dieu, & mangea les pains de propoſition, leſquels il n'eſtoit pas loiſible de manger*. Par tous ces lieux où nôtre S. Paul dit, *toutes choſes me ſont licites, mais toutes choſes ne ſont pas expedientes* ; ce meſme mot ſe rencontre, & en vingt-cinq ou trente autres lieux, où il ſe trouue au Nouveau Teſtament, il a touſiours cette meſme ſignification, ſans qu'il y ait aucun endroit où il puiſſe receuoir vne interpretation diſſemblable. Y ayant donc quantité de belles & celebres verſions où meſmes en ce lieu icy, ce mot eſt tourné per-

mis , il y a quelque sujet de s'estonner comment la nostre a mieux aimé s'y servir du mot de *possible*. Quoy qu'il en en soit , ie tiens pour indubitable ques'il faut tourner ce mot de l'Apostre en cette façon , *qu'il n'est possible à homme de raconter*, on ne doit pas entendre cela de cette impossibilité qui consiste en la privation de la faculté des organes, & de l'habitude de parler , mais de celle qui consiste en ce qu'on n'en a pas le droit. Comment donc enfin prendrons nous cette sentence de l'Apostre ? Il a esté obligé, mes freres, de dire ce qu'il a rapporté icy. Et puis qu'il l'auoit gardé quatorze ans entiers sans le decouvrir, il faut bien qu'il ait esté porté à le faire maintenant par vne necessité inuincible. Or vous saués quelle est la curiosité naturelle des hommes. Si quelcun reuiet d'un voyage bien lointain , comme sont ceux des Indes ou Orientales ou Occidentales, on s'amasse à grandes foules autour de luy pour s'enquerir des choses qu'il y a veües. On luy demande quel est le teint & la façon des habitans de ces pays là, quelles leurs loix, leur coustumes, & leurs maniere de viure. On veut sauoir si le pays est bon, si le climat est sa-

lubré , s'il y fait chaud ou s'il y fait froid, quelle y est la nature des animaux, & quelle celle des plantes. Et neantmoins ce sont choses ou que nous n'ignorons pas tout à fait, parce que nous en avons esté informés par quelques autres relations, ou qui ne nous touchent du tout point, parce que nous n'avons aucun dessein de quitter nos habitations pour aller demeurer aux Indes. Quelle pensés-vous donques, mes freres, que fust nostre curiosité, si nous voyions ressusciter quelqu'un duquel nous fussions asseurés que l'ame auroit esté quelque temps dans les lieux celestes? Car nous savons encore moins des choses qui sont au ciel, que de celles qui sont aux Indes ou au delà de l'Equateur; & elles nous touchent incomparablement plus, parce que nous esperons d'y aller, & que Dieu nous en a donné les promesses. Pour moy i'estime que quand Lazare fut ressuscité, il fut continuellement assiégué & tourmenté par toutes sortes de personnes, pour luy demander des nouvelles de Paradis: & qu'à moins d'avoir dit tout net, ou qu'il ne s'en souvenoit point, ou que Dieu luy avoit defendu de le revealer, ou que son ame pendant l'espace de quatre

iours, auoit esté en quelque autre lieu, & qu'elle n'auoit ny veu ny ouï les merueilles de là-haut, il eust esté accablé de l'importunité des hommes. L'Apostre doncques preuoyant qu'en racontant ce rauissement, il ne manqueroit pas d'exciter la curiosité des Corinthiens, & de tous ceux qui auroient connoissance de ce qu'il en escriuoit, a voulu, comme on dit, couper broche à toutes ces demandes; & dire que ce qu'il a esté enleué là-haut, ce qu'il y a ouï des choses émerueillables, ce n'est pas afin d'en entretenir le monde, & de faire courir apres luy: que les paroles qu'il a ouïes sont inenarrables, & que ce seroit inutilement qu'on le presseroit de les rapporter. Car c'est à peu près comme s'il disoit. Je suis establi Docteur de l'Eglise pour luy enseigner les choses qu'elle doit sauoir icy bas. Si on me demande la maniere d'estre iustifié deuant Dieu: la nature de la vraye sanctification & les motifs qui la produisent: les fondemens sur lesquels est establie l'esperance de la bienheureuse immortalité: la vertu de la communion de Christ mon Sauueur: l'enchainure indissoluble des causes de nostre redemption; & autres choses semblables

qui seruent à l'edification de la Foy, & à allumer la Charité, ie suis liberal de ces enseignemens-là, parce que Dieu m'en a aussi liberalement fourni la connoissance, & qu'il m'a commandé d'en estaller toutes les richesses deuant les yeux de son Eglise, & de ne rien reseruer de son conseil. Mais quant aux merueilles de là-haut, la reuelation n'en appartient pas à mon ministère. Je les ay veuës, ie les ay ouïes; Dieu m'a fait cette grace extraordinaire que de me transporter iusques en son Paradis pour cela. Mais ce sont choses inenarrables, & qu'il n'est ny loisible ny possible aux hommes de rapporrer. Comme elles passent ma charge, ie dois aussi reputer qu'elles passent ma portée, & vous, vous deués arrester vostre curiosité-là. Car c'est à peu près, mes freres, comme quand deux Disciples de nostre Seigneur luy demandent d'estre assis, l'un à la droite, & l'autre à la gauche en son Royaume, lors qu'il en manifestera la gloire. Apres leur auoir fait quelques interrogations, & receu d'eux des responses vn peu inconsiderées, il leur dit; *Vous boirés la coupe que ie dois boire, & serés baptisés du baptisme duquel ie dois estre baptisé.* Mais quant à estre assis à

ma droite & à ma gauche en mon Royaume, ce n'est point à moy de le donner: mais il sera donné à ceux à qui il est préparé de mon Pere. Ce n'est pas qu'il vueille dire proprement, ny que quelques vns d'entre ses disciples ayent cette prerogative par dessus les autres, d'estre assis les vns à sa droite & les autres à sa gauche en son Royaume, ny que ce soit ou que ce ne soit pas à luy de la donner à ceux qui l'auront. Il n'y aura point de telles prerogatives dans le Royaume celeste, & quand nous y aurons esté introduits, l'Apostre S. Paul nous enseigne que Christ remettra son regne entre les mains de son Pere, pour luy estre luy-mesme assujetti. Que s'il y auoit quelque chose de tel à esperer dans le Ciel, ce seroit proprement à Christ à le donner, puis qu'il a esté establi par son Pere le souverain Juge de l'Vniuers, & par consequent le distributeur de la gloire & des recompenses à ses fideles. Son intention a seulement esté de reprimer par cette façon de respondre, l'ambition & la vanité de ceux qui luy demandoient ces priuileges, & de leur faire doucement entendre qu'ils ne sauoient ce qu'ils desiroient. Car comme il a esté fort bien remarqué par de

de la II. aux Cor. v. 1. 2. 3. 4. 5. 72
tres-grands personnages, & mesmes dans
leurs Commentaires sur ces paroles de
Christ, il ne faut pas presser à la rigueur ny
ces affirmations ny ces negations-là, mais
seulement regarder à l'intention de celuy
qui parle, & à cette façon de bonnaire &
pleine de condescendance & de charité,
dont nostre Seigneur s'est quelquesfois
serui enuers ses disciples, comme nous
nous en seruons enuers les enfans, à cause
de leur foiblesse & de leur incapacité. Car
nous eludons ainsi leurs demandes quand
ils nous en font d'impertinentes, ou qui
sont telles que si nous leur y respondions
ils ne nous entendroyent pas. C'est pour-
quoy pour les ramener aux choses qui sont
de leur portée, nous leur faisõs des respōses
qui sont à costé de leurs questions, ou mes-
mes nous ne craignons pas de leur dire
que nous ne sauons pas bien ce qu'ils nous
demandent, afin de leur faire entendre
que ce seroit inutilement qu'ils nous in-
terrogeroyent plus auant. Et alors nous ne
voudrions pas qu'on examinast nos paro-
les seuerement, & esperons qu'on aura
plus d'egard à nostre intention qu'au sens
precis de nos paroles, dont nous nous
seruons alors, non selon toute l'exac̃titude.

de leur signification, mais par vne sage économie, selon les circonstances des personnes & du temps. Et de fait, si nostre Seigneur se fust mis alors à expliquer à ses disciples quelle estoit la nature de son royaume, cōment, si on le considere en tant qu'il s'exerce en la terre, son corps en deuoit estre absent: & cōment, si on le regarde entāt que nous le deuõs posseder au Ciel, ces auantages, d'estre assis à sa droite & à sa gauche, qui sont choses qui ne se pratiquent sinon dans les royaumes de la terre, n'y pouuoient auoir de lieu, il les eust merueilleusement embarassés. Car la foiblesse de leur connoissance ne permettoit pas alors qu'ils comprissent la nature de ce regne, duquel, bien qu'il deust estre tout à fait spirituel & celeste, ils ne s'estoyent point encore iusques alors formé d'idée qui ne fust terrienne & corporelle, comme il se peut recueillir del'Euangile en diuers endroits. Si donques vous appliqués cela aux propos de nostre Apostre, vous trouuerés qu'il y quadre parfaitement bien. Son intention n'estoit pas, comme ie l'ay desia dit, de contenter icy la curiosité des Corinthiens, mais seulement de leur parler de ce miracle autant

qu'il estoit necessaire pour recommander sa personne & par elle son Apostolat, cōtre les attaques de ses aduersaires, & autant qu'il estoit expedient pour l'edification des fideles de Corinthe, & de tous ceux entre les mains de qui cette Epistre tomberoit. Et de fait, s'il se fust mis à leur raconter les paroles qu'il auoit ouïes, cela les eust indubitablement iettés en des questions & en des speculations qui ne conuenoyent nullement à leur estat. C'est pourquoy il estoit plus expedient pour eux, & c'estoit sans comparaison plustost fait à luy, de leur dire qu'il ne luy estoit pas permis de leur en rien reueler, & que cela luy auoit esté defendu au mesme temps que ces paroles luy auoit esté prononcées. Le fruit donques que nous auons maintenant à retirer des choses que vous aués entendues, consiste principalement à pratiquer la leçon que nous donne icy l'Apostre, non pas seulement au sujet duquel il s'agit en ce texte, pour ne nous enquerir pas de ce qu'il nous a voulu tenir caché, mais en diuerses autres occasions, où cet aduertissement nous est souverainement vtile. On s'enquiert ordinairement si l'on se reconnoistra les vns les autres au iour de la re-

surrection, & lors que nous serons recueillis dans le royaume celeste. Et dautant que nous le desirons ainsi, à sçauoir les femmes de reconnoistre leurs maris, les meres de reconnoistre leurs enfans, les bons amis de reconnoistre ceux qu'ils ont tendrement aimés, & generalement tous ceux qui ont eu de vehementes affections, de reconnoistre les objets sur lesquels ils les ont portées, nous nous figurons aisement que Dieu nous donnera ce contentement, & fermerions volontiers l'oreille à ceux qui nous voudroyent dire le contraire. Freres bien-aimés en nostre Seigneur, il n'en sera pas du siecle à venir comme il est de celuy de maintenant. La pluspart de ces affections sont fondées sur des relations qui n'auront plus de lieu alors, parce qu'elles sont accommodées à l'estat de la Nature. Or l'estat de la Nature sera aboli, & par consequent ces relations-là ne subsisteront plus, comme elles ne feront plus necessaires. Si c'estoit vne chose absolument requise à rendre nostre felicité entierement accomplie, nostre Seigneur ne nous la refuseroit pas, luy qui n'a pas espargné son propre sang, pour nous acquerir l'esperance de sa gloire. S'il estoit

conuenable que nous le conuissions encore, ou que nous nous conuissions les vns les autres, comme dit l'Apostre, selon la Chair, il tremperoit là-haut nostre felicité dans la douceur de ces affections dans lesquelles consiste le principal contentement de la vie presente. Mais ne nous mettons point en peine de cela, bornons la curiosité de nos esprits à ce que la parole de Dieu nous dit du salut en general, & nous contentons d'esperer vne felicité inenarrable. On s'enquiert si la gloire sera inegalement partagée entre les enfans de Dieu là-haut, & ie ne sçay si c'est ou l'ambition & le desir de l'honneur, ou la presumption des merites, qui a donné la vogue à cette opinion; mais tant y a qu'il y a long-temps qu'elle a pris pied en l'Eglise. Assurément, comme elle est expliquée par ceux de la Cômunion de Rome, elle n'a point de fondement en la Parole de Dieu. Nous ne nions pas que lors que nostre Seigneur Iesus Christ viendra, il ne distribuë inegalement à ses seruiteurs, selon la diuersité de leurs dons ou de leurs labeurs, les témoignages honorables qu'ils remporteront de sa bouche, pour leur fidelité, & pour leur zele; & ce que

l'Apostre S. Paul dit, *Vous estes ma ioye & ma couronne* pour la iournée de nostre Seigneur, ne conuient pas vniuersellement à tous les fidelles, mais a quelque raison particuliere dans la personne & dans le ministere de S. Paul. Mais il ne s'ensuit pas de là que dans le Ciel mesme il y ait des couronnes & des aureoles distinctes, destinées, comme ceux de la Communion de Rome le pretendent, aux Docteurs, aux Vierges, & aux Martyrs. Nostre vraye gloire consistera en la sainteté, qui sera également parfaite en tous; en la glorification de nos corps, où nous ne voyons point de raison d'attendre de l'inegalité; en la demeure du Ciel, où mesmes objets nous seront offerts à contempler; & en la durée imperissable de la vie, qui doit estre également eternelle. Et quand il y deuroit auoir dans le reste de la gloire que nous attendons, quelque sorte de diuersité, il ne s'ensuiuroit pas de là que l'inegalité du partage qui nous en sera fait, deust estre fondé sur la difference du merite de nos actions. Car ce que nous ne possederons que de la pure misericorde de Dieu, ce que nous n'heriterons que comme enfans qu'il a gratuitement adoptés en nostre

Seigneur Iesus Christ, ce qui ne nous sera communiqué pour aucun autre droit que pour celuy qui nous est acquis au sang de nostre Redempteur, ne peut auoir aucune relation à ces pretendus merites. Mais quoy qu'il en soit, nos soins ne se doiuent pas porter là : c'est à rechercher les moyens de paruenir à la iouissance de ce grand salut, & à tenir constamment & inuariablement les routes qui nous y conduisent. Ne deussions-nous estre sinon portiers dans ce Temple de nostre Seigneur, c'est assés pour y esleuer nos affections, & pour y attirer toutes nos pensées. On demande quels seront nos corps en la resurrection, & à quoy seruiron tant de facultés & tant d'organes dont les vsages sont destinés à cette vie, & qui semblent n'en deuoir point auoir en celle qui est à venir. Chers freres ; tout ce qu'il y a d'animal, de sensuel, de corruptible, de terrestre & de passible en nostre chair ; toutes les infirmités qui ont suivi la corruption du peché ; toutes celles qui viennent en dependance de l'estat de la Nature ; tout cela sera aboli par la resurrection, & il n'en restera trace quelconque dans nos corps quand ils seront recueillis dans

les lieux celestes. Car il faut que cette image du premier Adam, que nous portons maintenant, soit effacée en nous: non pas seulement dans les restes du peché que la mort doit abolir: non pas seulement dans les infirmités qui l'ont suivi, & que la resurrection doit engloutir: mais aussi dans toutes les dependances de ce qu'il a esté fait *en ame vivante*, & dans cette condition naturelle qu'il a communiquée à ses descendans. Pour le reste, ne nous mettons point en peine de la façon de laquelle nos corps seront alors composés, & nous contentons de savoir qu'ils seront rendus conformes au corps glorieux du Sauveur du monde. Ils sont maintenant opaques & tenebreux, & ils seront lumineux alors. Ils sont susceptibles de toutes sortes d'incommodités, & alors ils n'en receuront aucune atteinte. Ils sont maintenant terrestres, & ils seront celestes en ce temps-là: ils sont à cette heure corruptibles, & ils reueestiront l'incorruption; ils sont en cette vie sensuels, & en l'autre ils seront spirituels; ils sont ouuerts & exposés à toutes sortes de maux, & alors ils ils iouïront d'une vigueur immotelle & d'une santé inalterable. Car il faut que

nous portions l'image du second Adam lequel est descendu du Ciel, & qui ayant esté fait en *esprit vivifiant*, doit non pas seulement pour l'ame, mais aussi pour ce qui concerne le corps, cōmuniquer cette nature spirituelle & incorruptible à tous ses fidelles. Quant à la façon des operatiōs de nos sens, quant au particulier de l'usage de nos membres, & à la maniere de laquelle nos actions emaneront de leurs facultés, ce sera le seul iour du Seigneur qui nous en donnera la connoissance. Enfin on se met en peine de la constitution du monde, & de la forme qu'il prendra quand nostre Seigneur apparoitra. Il est sans doute, mes freres, qu'il ne sera pas entierement aboli. L'Apostre nous dit que *le grand & ardent desir des creatures est en ce qu'elles attendent que les enfans de Dieu soyent reuelés : & cela sous esperance qu'elles seront aussi delivrées de la servitude de corruption, pour estre en la liberté de la gloire des enfans de Dieu.* Ce qui ne se pourroit pas ainsi dire d'une chose qui deuroit estre entierement aneantie. Tout le desordre qui y est arriué depuis l'integrité de sa creation, toutes les traces de la colere de Dieu contre le genre humain à cause

de ses offenses : toutes les marques de la malediction que nous auons meritée, & dont nostre Seigneur nous a garantis, tout cela dispañoistra en la glorieuse iournée de sa seconde venue. Les vicissitudes mesmes & les variations qui y arriuent selon le cours qu'on appelle de la Nature, la corruption & la generation autour desquelles les elemens tournent continuellement, les qualités des elemens mesmes, qui subissent à cette heure tant de changemens, doiuent pareillement dispañoistre, parce que le monde sera mis en vn estat surnaturel. Du reste, quelles seront les conditions de la terre : si la mer l'enuironnera encore comme elle fait maintenant ; quelle sera la constitution de l'air ; s'il y aura encore vn feu elementaire proche des sphaeres celestes ; si ces grands globes de là haut tourneront encore autour du monde, & si le Soleil & la Lune & les autres astres auront encore leurs courses & leurs reuolutions ; comment la lumiere se portera en l'vn & l'autre hemisphere, & quelle sera la temperature du Septentrion & du Midy, & des autres plages de l'Vniuers, c'est ce que nous ne saurons point que par l'experience des choses

de la II. aux Cor. v. 1. 2. 3. 4. 5. 81
choses mesmes. Qu'il nous fuffise de fauoit
que toutes choses auront vn tout autre air
que celuy qu'elles ont maintenant ; & que
comme elles ont esté assujetties à vanité à
cause du peché des hommes, elles seront
reftablies en vn meilleur estre à cause de
leur redemption ; afin qu'à proportion de
ce que les corps des fidelles acquerront
par la refurrection vn estat incomparable-
ment plus auantageux que n'est celuy de
maintenant, le monde entier soit renou-
uellé, & mis dans vne constitution sans
comparaison meilleure & plus illustre que
la precedente. C'est ce qui fait dire à l'A-
postre S. Pierre apres les Prophètes, qu'il
y aura *nouueaux cieux & nouuelle terre dans
lesquels la iustice habitera* : de sorte, qu'il
n'y aura vestige aucun ; ny de l'estat na-
turel, ny du peché qui y est suruenu ; ny
de la condition qui est venue en conse-
quence. Quant aux particularités de leur
renouuellement, ce sera encore la mani-
festation de Christ qui les mettra en eui-
dence. Contentons-nous pour cette heu-
re d'apprendre dans la Parole de Dieu les
choses qui nous y sont proposées pour
estre l'objet de nostre foy : cherchons-y ce
qui peut seruir à nostre sanctification :

puisons y dequoy arruuser en nous l'esperance de la bien-heureuse immortalité; meditons sans cesse les promesses qui nous y sont faites & d'où depend nostre ioye & nostre consolation : enfin tirons-en les motifs & les appuis d'une invariable perseverance. Car ce sont-là les moyens d'estre participans de cette bien-heureuse journée en laquelle nous nous trouuerons tous ensemble en la presence de nostre Seigneur, & de partager l'heritage celeste avec luy, & de voir nos corps se reuestir de gloire & d'immortalité, & de contempler en cet Vniuers les beautés de sa restauration, & d'ouïr & de voir en fin à nostre eternal contentement, les choses que l'Apôstre S. Paul nous dit estre maintenant inenarrables. A Dieu, qui nous en a donné l'esperance, Pere, Fils, & S. Esprit, vn seul Dieu benit eternellement, soit gloire, force, & empire dès cette heure & à toute eternité, AMEN.





SERMON

TROISIEME.

SVR CES MOTS,

*Si ce fut en corps ie ne sçay, si ce fut hors du
corps ie ne sçay, Dieu le sçait.*

FRERES BIEN-AIMEZ EN NOSTRE
SEIGNEVR.

L'Apostre S. Paul; dans les paroles que
ie viens encore de lire en vostre presence,
dit expressement; & repete en termes
clairs & emphatiques, qu'il ne sçait si
ce merueilleux rauissement par lequel il
a esté transporté au troisieme Ciel, luy est
arriué en corps, ou s'il luy est arriué hors
du corps. C'est à dire que comme il n'a
pas voulu l'expliquer, il ne veut pas aussi
que nous le decidions. Et de fait, puis
que luy, en la personne de qui ce miracle
s'est executé, ne l'a pas osé decider, qui se-
ra-ce d'entre les hommes mortels qui ait
la hardiesse de l'entreprendre? Ne vous
attendez-donc pas que j'attente aujour;

d'huy rien de tel : car ie suis absolument resolu de me tenir religieusement entre les termes de la modestie de l'Apostre. Neantmoins, ce qu'il dit qu'il ne sçait si c'est en corps, ou si c'est hors du corps qu'il a esté ravi en Paradis, nous donne assés clairement à entendre qu'il a creu que cela auoit peu se faire de l'une & de l'autre façon. Car s'il auoit trouué de l'impossibilité en l'une des deux manieres qu'il propose, il ne s'en seroit pas ainsi exprimé : & cela nous donne la hardiesse & le droit de rechercher vn peu exactement la possibilité qu'il y a eüe que ce grand seruiteur de Dieu ait experimenté ce ravissement ou en corps ou hors du corps : ce qui, comme nous esperons, ne se fera pas sans quelque vtilité considerable. En fin, il ne se contente pas de dire cela vne fois, il le repete encore aux mesmes mots. Ce qui monstre qu'il a voulu arrester extraordinairement l'attention de nos esprits, & qu'en la meditation que nous en ferons, nous apportassions beaucoup de soin & de diligence. C'est ce que de mon costé ie tascheray de faire moyennant la grace de nostre Seigneur : du vostre, i'espere que vous me presterez vne attentue & fauo-

de la II. aux Cor. v. 1. 2. 3. 4. 5. 35
table audience. Je vous disois il n'y a pas
long-temps, mes freres, qu'il y en a quel-
ques-vns qui rapportent ce ravissement
de S. Paul, à ce qui nous ^{est} récité au chapitre
neuvieme des Actes. Vous sçaués l'histoi-
re. Paul estant parti de Ierusalem avecque
lettres & Commission de la part du Sou-
uerain Sacrificateur, pour s'en aller per-
secuter l'Eglise de Dieu à Damas, com-
me il estoit en chemin, & desia proche du
lieu où il deuoit arriuer, il resplendit tout
à coup du ciel vne fort grande lumiere
alentour de luy. L'éclat de cette splen-
deur, & les autres merueilles dont elle
estoit accompagnée, l'ayant esbloui &
estonné, il tomba à terre, & ouït vne voix
qui luy disoit, *Saul, Saul, pourquoy me per-
secutes-tu?* Comme il eut respondu à cette
voix, & que nostre Seigneur se fut mani-
festé à luy, il fut releué par ceux qui l'ac-
compagnoient, mais il se trouua qu'il
estoit aueugle, de sorte qu'ils le condui-
rent par la main iusques à Damas, où il
demeura trois iours entiers sans voir, &
sans manger, & sans boire. On croit donc
qu'en cet estat-là il luy arriua vne exstase,
pendant laquelle Dieu luy fit voir cette
vision, c'est qu'il s'imagina qu'on l'auoit

transporté au Ciel, & qu'il y voyoit des paroles inenarrables. Et ce qui donne beaucoup d'apparence à cette opinion, c'est la rencontre des temps. Car comme ié le vous ay remarqué, à contet du temps que cette Epistre fut écrite, quatorze ans en remontant, la première de ces quatorze tombe iustement en celle en laquelle S. Paul fut conuerti à nostre Seigneur. Mais il me semble qu'il y a icy diuerses considerations à faire. Premièrement, si cela est, que ce dont l'Apostre parle icy, se doiuë rapporter à cette histoire, il n'y a rien plus aisé que de resoudre la question qu'il propose icy comme absolument insoluble. Car il dit qu'il ne sçait, & qu'il n'y a que Dieu qui sache, si c'est en corps ou hors du corps que ce raiissement luy est arriué. Or quand S. Paul fut trois iours sans voir, sans manger & sans boire, dans la ville de Damas, ceux qui estoient autour de luy virent tousiours là son corps, & il ne partit point de deuant leurs yeux. D'où il résulte necessairement que ce ne fut pas en corps qu'il fut raii au troisieme Ciel : ce que neantmoins il n'a icy osé dire. De plus, encore qu'il ait esté là trois iours, sans voir & sans boire, & sans manger, il ne s'ensuit

pas pourtant qu'il fust priué de l'vsage de ses autres sens, & rauï hors de luy-mesme d'une façon si merueilleuse. Car le saint historien ne nous dit pas qu'il fust aussi sans flairer, ny que les opérations du toucher en luy fussent egaleement interceptées. Sur quoy donques nous sonderons-nous pour l'affirmer ainsi hardiment, puis que nous n'en auons rien du tout dans le recit de l'histoire ? Et l'Apostre mesme, en deux endroits du liure des Actes où il nous raconte sa conuersion, ne nous parle du tout point qu'il luy soit alors arriué rien de semblable. Je diray quelque chose d'auantage. Quand pendant ces trois iours là il auroit esté tout-à fait priué des fonctions de tous ses sens, encore n'en pourroit-on pas necessairement recueillir que c'eust esté vne exstase dans laquelle Dieu luy eust fait voir la vision dont il parle icy, ny aucune autre semblable. Car il arriue quelquesfois des syncopes qui empeschent tellement toutes les operations des sens, qu'ils n'en produisent du tout point ; & neantmoins l'ame, comme si elle estoit elle-mesme engloutie dans la pamoison, n'a aucune vision, & ne se souuient point d'auoir ny rien veu ny rien ouï quand la

personne est reuenüe. L'Escriture sainte donques ne nous disant du tout rien en cet endroit-là, qui marque que l'Esprit de Dieu se soit alors desployé dans les facultés interieures de S. Paul, pour luy faire voir de si admirables visions, ie ne voy pas qu'il y ait lieu de l'asseurer, veu qu'elle n'a pas accoustumé de le celer quand elle nous rapporte l'histoire de quelque exstase. Enfin, posé le cas que pendant ce temps-là S. Paul ait eu quelques diuines reuelations, il y auroit pourtant icy deux choses à dire. La premiere, que l'operatiõ de l'Esprit se seroit déployée alors à donner quelques reuelations à S. Paul, & à luy enseigner les mysteres de l'Euangile qu'il auoit à annoncer, afin de l'en rendre capable; comme de fait, il se peut faire que ce fut alors qu'il vid Ananias en vision, & il est certain qu'il commença peu de iours apres à exercer son Apostolat, à la confusion des luifs aduersaires de la verité, & à l'admiration des fideles. Mais il y a vne grande difference entre les doctrines de l'Euangile que l'Apostre S. Paul a deu prescher, & les paroles qu'il a ouïes en cette admirable vision, & qu'il appelle inenarrables. Car

celles-là ont deu estre annoncées par luy à l'Eglise de Dieu, & celles-cy ont deu demeurer supprimées iusques à la consommation des siècles. La seconde, que quelque vision que l'Apostre S. Paul ait veüe alors, tant y a que ç'a esté en exstase seulement; c'est à dire, sans que ny son corps ait esté transporté au Ciel, ny que son ame ait esté separée de son corps pour y estre rauie. Cependant les paroles dont il se sert icy, à les considerer vn peu attentionnement, ont indubitablement cette emphase de signifier, qu'encore qu'il soit incertain en laquelle de ces deux manieres cela s'est fait, si est-ce qu'il faut necessairement que ce soit en l'vne ou en l'autre. Car il ne se seroit iamais serui de ces termes repetés avec tant d'efficace, *si ce fut en corps ie ne sai, si ce fut hors du corps, ie ne sai, Dieu le fait*, s'il n'auoit creu que soit que sa personne toute entiere ait esté transportée là-haut, soit que par quelque miraculeuse operation de l'Esprit de Dieu son ame ait esté tirée pour quelque temps deson corps pour estre enlevée en Paradis, tant y a qu'il faut que cela soit arriué en l'vne de ces deux manieres. Voyons maintenant comment il est possible & en l'vne & en

l'autre. Pour ce qui est du corps, il n'y a nulle difficulté, eu égard à la puissance de Dieu. Il nous est rapporté au chapitre huitieme des Actes, que Philippe s'estant premierement joint au chariot de l'Eunuque de la Reyné Candace, & puis, apres auoir instruit cet Eunuque en la connoissance du Seigneur Iesus, & l'auoir baptisé, quand ils furent remontés hors de l'eau, l'Esprit du Seigneur le raut, & le transporta de la presence de l'Eunuque, tellement qu'il ne le vid plus, & qu'il se trouua en vne ville nommée Azote. Au commencement de l'Euangile selon S. Matthieu, il nous est dit que nostre Seigneur fut emmené par l'Esprit au desert pour y estre tenté; ce qui semble denoter que son corps yfut transporté par l'air, & non pas qu'il y alla à pied, comme il auoit accoustumé de cheminer par la Iudée. Mais ce qu'il est dit dans la mesme histoire que du desert où il estoit, il fut transporté en Ierusalem, & mis sur le pinnacle du Temple, ne reçoit point d'exception. Assurément cela s'est fait par le transport de son corps, par l'efficace d'une cause extraordinaire & surnaturelle. Quant à ce qui se trouue de semblable au Vieux Tes-

tamment, il n'en faut pas tant faire de considération. Car Ezechiel nous dit bien, au chapitre huitieme de ses Reuelations, qu'estant en sa maison en Babylone, il vid la semblance d'un homme qui mit la main sur luy, & qui l'ayant saisi par la chevelure, le transporta iusques en Ierusalem près du Temple, pour espier ce qui s'y faisoit. Mais il adjouste incontinent que cela se fit *dans les visions de Dieu*, c'est à dire, dans vne exstase, & par vne chose représentée à son imagination, & non par vn transport reel & effectif de sa persône. Et il est dit en quelque autre lieu, qu'Abbacuc fut aussi saisi par les cheveux par vn Ange, & transporté entre ciel & terre, côme ondit, depuis la Iudée iusques en Babylon, au lieu où Daniel estoit en la fosse des lions. Mais cette histoire est tirée d'un Escrit Apocryphe, & dont le témoignage n'est point authentique. Quoy qu'il en soit, cela n'est point impossible à Dieu, & peut estre n'excede-t-il pas la force des Anges. Que si quelcun medite icy qu'il y a bien de la difference entre les intervalles de ces lieux-là, pour si esloignés qu'ils soyent, & l'espace qui est entre la terre & le Paradis, ie respondray que l'Apostre S. Paul ne seroit

pas le premier à qui telle chose seroit arri-
uée. Car sous l'Economie de la Nature,
comme on parle, & désauant le Deluge,
Henoca esté transporté en corps là-haut
dans le Ciel: & Elie y a esté pareillement
transporté sous la Dispensation legale.
Enfin, Christ y a esté esleué en la plénitu-
de des temps, & s'y est allé asseoir à la
main droite de son Pere. Vray est que
comme nostre Seigneur Iesus Christ auoit
en sa resurreccion acquis des qualités en
son corps lesquelles il n'auoit point aupara-
uant, afin d'estre en vn estat conuenable
à la nature de ce lieu glorieux dans le-
quel il deuoit entrer, il ne faut pas douter
qu'Henoc & Elie n'en ayent acquis de
nouuelles par quelque transmutation.
Car cet estat naturel auquel ils estoient
n'auoit aucune proportion avec la demeure
du Ciel; selon que S. Paul dit que la
chair & le sang, c'est à dire, les infirmités de
la Nature, *ne peuvent heriter le Royaume de
Dieu*. Quant à S. Paul, il ne s'en peut pas di-
re de mesme. Car depuis qu'il a esté re-
tourné du Ciel, posé le cas que sa person-
ne toute entiere y ait esté transportée, son
corps a eu les mesmes qualités naturelles
que nous auons maintenant, & a esté

acompañé de toutes les infirmirés qui
suiuent inseparablement cette vie sensuel-
le. Mais cela n'empesche pas que l'A-
postre n'ait peu estre transporté en corps.
Parce qu'il a fallu qu'Henoc & Elie ayent
souffert cette transmuatiō pour demeurer
toujours au Ciel, comme cela leur estoit
ordonné. Au lieu que S. Paul n'ayant à
y estre enleué que pour peu de temps &
par economie seulement, il n'a pas esté
necessaire qu'il perdist ses conditions or-
dinaires. Et comme quand Elie & Moyse
sont descendus pour assister à la transfigu-
ration de nostre Seigneur, il n'a pas esté
besoin que leurs corps se soyent dépoüil-
lez de leurs qualitez celestes, pour en
prendre de conformes à l'estat de la vie
presente, parce qu'ils n'ont deu estre sur le
sommet de la montagne que fort peu de
temps : quand S. Paul est monté au Ciel,
il n'a pas esté besoin non plus que son
corps abandonnast ses qualitez terriennes,
parce qu'il ne deuoit estre là-haut que fort
peu de temps non plus. Il est vray qu'il a fal-
lu qu'il ait passé par la moyenne region de
l'air, que l'on dit estre fort froide : & par
celle du feu elementaire, qu'on s'imagine
toucher les spherés des cieux ; & enfin au

trauers des spherés celestes mesmes, dont on a cette opinion qu'elles ont beaucoup d'épaisseur & de solidité. Quant à la seconde regio de l'air, fust-elle encore beaucoup plus froide qu'on ne la croid estre, celuy qui commande aux elemens & qui leur a donné leurs qualitez, en a bien peu garantir le corps de S. Paul, s'il luy a pleu de le faire passer au trauers. Et quand le feu elementaire seroit aussi bruslant qu'est celuy dont nous nous seruons icy bas, le Createur qui a preserué les Compagnons de Daniel au milieu d'une fournaise ardente, sans qu'ils en ayent esté endommagez, a bien peu empescher le feu de là-haut de se faire sentir au corps de saint Paul. Enfin, quand les globes celestes auroyent autant de solidité que l'airin ou le diamant, celuy qui les a tous formés les a bien peu faire fendre par son seul commandement, pour donner à l'aller & au retour, passage au corps de son saint Apostre. Et ce qui s'est fait pour Henoc, ce qui s'est reiteré pour Elie, ce qui s'est executé pour nostre Seigneur Iesus Christ, aura bien peu se faire pour S. Paul, si telle a esté la volonté de Dieu que c'ait esté en corps qu'il ait esprouué

cette merueille. L'autre façon est vn peu moins comprehensible. Car si l'ame de l'Apostre s'est separée d'avec son corps, il semble que cela n'ait peu se faire sans mort. Et si elle s'est reünie à luy quand elle est retournée du Ciel, c'est vne resurreçtiõ. Or nous ne voyons point que ny S. Luc, en l'histoire qu'il nous fait de luy, ny que S. Paul mesme, dans les diuers endroits de ses Epistres où il rapporte assés ponctuellement les choses extraordinaires & memorables qui luy sont arriüées, ait laissé aucune trace d'vne chose si merueilleuse qu'auroit esté celle de sa mort & de sa resurreçtion d'entre les morts. Ayant donc dit tant d'autres choses qui ne sont nullement de l'importance de celle-là, comment & pour quelle raison la nous auroit-il celée? Neantmoins, il y a encore deux choses considerables à dire icy, pour monstrier que mesmes de cette façon-là le rauissement de S. Paul n'a pas esté impossible. Car premierement, posé que cela n'ait peu se faire autrement que par la mort, la mesme raison qui luy a fait supprimer par l'espace de quatorze ans la merueille de son rauissement là-haut, luy aura aussi fait celer la maniere par laquelle

cette merueille est arriüée. Car il ne pou-
 uoit pas dire qu'il estoit mort & ressuscité
 des morts, qu'il ne dist aussi pourquoy
 celà luy estoit arriüé; ce qui estoit propre-
 ment la chose qu'il vouloit taire. Puis
 apres, encore n'est-il peut-estre pas ab-
 solument necessaire que cette separation
 de son ame d'avecque son corps se soit fai-
 te par la mort. Vous voyez, mes feres,
 comment la Nature nous a composez.
 Nous sommes faits d'esprit & de corps, &
 c'est de leur vnion que resulte la constitu-
 tion de nostre estre. Quant à l'esprit, nous
 le tenons de Dieu qui le crée de sa main:
 mais pour ce qui est du corps, nous le ti-
 rons par communication de ceux qui nous
 engendrent. Et avecque cette matiere de
 laquelle nos corps sont composez, vient la
 chaleur naturelle, & l'humeur qu'on ap-
 pelle radicale, qui luy sert d'aliment pour
 l'entretenir, & peut estre encore les facul-
 tez vegetatiues & les sensitiues. Au moins
 y a-t-il des Philosophes, & des Medecins,
 & des Theologiens encore, qui sont
 de cette opinion, que l'ame raisonnable
 n'est point infuse dans le corps sinon au
 quarantieme iour apes sa premiere con-
 ception: parce qu'ils croyent qu'auant ce
 temps

temps-là , le corps ne peut auoir les organes & les dispositions qui luy sont necessaires pour receuoir & pour loger vne forme & vne hostesse si excellente. Si cela est , il faut qu'il y ait dans la matiere du corps, comme elle nous est communiquée par la generation , quelques facultés vegetatiues , & peut estre quelque chose de plus que cela , auant que l'ame raisonnable y soit presente. Or est-il bien vray sans doute que quand cette chaleur naturelle est esteinte , & cette humeur radicale épuisée, l'ame ne peut naturellement subsister dans le corps humain. Il faut necessairement qu'elle s'en separe alors, & c'est en cette separation, quand elle se fait ainsi, que consiste proprement la mort. Mais il ne s'ensuit pas de là que Dieu ne puisse separer l'ame d'avecque le corps, sans que cette chaleur naturelle s'épuise, & que les facultez qui ont naturellement suivi la propagation du corps, soyent également abolies. Car comme elles ont subsisté au corps auant que l'ame y fust, l'ame s'en peut bien separer par la puissance de Dieu, que neantmoins elles y subsisteront encore. Cet estat-là donques n'auroit pas esté à proprement parler vne mort, ny par

consequent la reünion de l'ame avecquë le corps, vne resurrección proprement dite non plus: parce que la vraye mort consiste en l'extinction de cette chaleur, & en l'abolition des facultez par lesquelles les parties du corps ou croissent ou se nourrissent. Ainsi, encore de cette façon-là il n'y a point d'impossibilité en l'exécution de ce miracle. Car quant aux autres considerations que nous auons faites sur les conditions des corps, elles ne touchent point vne substance spirituelle & immatérielle telle qu'est l'ame. Elle n'a point les qualitez terriennes & elementaires qui se trouuent dans le corps tandis qu'il est en l'estat sensuel & animal. Elle n'est point passible ny au froid ny au chaud, ny aux autres actiuitez de l'air ny du feu ny des autres elemens. Enfin, elle ne peut estre empeschée ny retardée en son mouvement par la matiere des corps, quelques grands ou solides qu'ils puissent estre. Mais il se presente icy d'autres difficultez considerables. Soit en corps, soit hors du corps, que ce rauissement se soit fait, (car puis que l'Apostre S. Paul s'en est teu, nous vous auons desia dit que nous ne voulons pas le decider,) comment est-ce

qu'il dit qu'il n'en sçait rien? Car si cela s'est fait en corps, puis qu'il auoit les sens des yeux & des oreilles ouuerts pour voir & pour ouïr des choses & des paroles innarrables, ne voyoit-il pas bien son propre corps, & ne sentoit-il pas qu'il faisoit ces operations par le moyen de ses organes? N'est-ce pas vne chose inseparable des actions de nos sens, que non seulement nous agissons par eux, mais que nous sentons bien que nous agissons, & que nous sommes assurez des operations qu'ils produisent? Et si cela s'est fait hors du corps & dans l'ame seulement, l'ame estant separée d'auec son corps a-t-elle peu ignorer sa separation, & n'a-t-elle pas aussi reconnu quelle estoit la nature de son action, lors qu'elle voyoit & qu'elle oyoit des objets si émerueillables? A cela, mes freres, on peut respondre deux choses. La premiere est que ce mot de *sauoir*, & celuy de *ne sauoir pas*, se prennent également en deux significations differentes. Car ordinairement *sauoir* signifie auoir la connoissance de quelque chose, & *ne sauoir pas* l'ignorer: & c'est la plus propre & la plus commune intelligence de ces termes. Mais quelquesfois on employe ces mots

de *savoir* & de *ne savoir pas*, non pour signifier la connoissance ou l'ignorance, mais la resolution qu'on a faite de ne dire & de ne découvrir pas vne chose dont on n'est pas ignorant. Pour exemple, quand l'Apostre escriuant à ces mesmes Corinthiensicy, dit qu'il *ne veut point savoir entr'eux sinon Iesus Christ & iceluy crucifié*, il ne veut pas dire qu'absolument il a resolu d'ignorer toutes autres choses. Il auoit beaucoup d'autres connoissances que celles qui concernoyent la Croix de nostre Sauueur, & il paroist par ses Escrits qu'il estoit mesmes bien versé dans la lecture des Poëtes. Et quand il est venu à la connoissance de nostre Seigneur, il n'a pas oublié ce qu'il auoit appris avec Gamaliel, aux pieds duquel il auoit esté nourri, pour y entendre, non pas seulement les choses de la Loy, & les interpretations que les Iuifs, & nommément les Pharisiens auoyent accoustumé d'y donner, mais mesmes les choses qui regardent la Philosophie. Il veut seulement dire qu'il a resolu de n'enseigner aux Corinthiens sinon l'Euangile du salut, & que de toutes les autres choses qu'il sçait il ne leur parlera non plus que si elles luy estoient entiere,

de la II. aux Cor. v. 1. 2. 3. 4. 5. 101
ment inconnuës. Et quelques vns pren-
nent à peu près en mesme sens ces paro-
les de nostre Apostre, au chapitre 6. de la
I. à Timothée. *Si quelcun enseigne vne do-
ctrine diuerse, & n'adhere point aux saines
paroles de nostre Seigneur Iesus Christ, & à la
doctrine qui est selon pieté: vn tel est enflé, ne
sachant rien.* Dans les Poëtes Comiques
on rencontre quelquesfois cette façon de
parler, *ce que tu fais, tu ne le sçais pas, ou il
ne faut pas que tu le saches*; c'est à dire, don-
ne-toy garde d'en parler non plus que si
tu n'en sauois du tout rien. Et la raison de
cette façon de parler est qu'en toutes lan-
gues on met souuent les choses qui prece-
dent pour celles qui suivent, & les choses
qui suivent pour celles qui precedent. De
sorte que l'ignorance estant la cause du
silence, parce que l'on ne sauroit parler de
ce qu'on ne sçait point du tout, des choses
desquelles on se tait absolument, on ne
fait pas difficulté de dire qu'on les ignore.
Quand donques l'Apostre auroit icy em-
ployé ce terme en cette signification, il
n'auroit rien fait que ce que nous faisons
assés souuent, lors que voulans reprimer
ou l'importunité des enfans, qui nous de-
mandent des choses qu'ils ne sont pas en-

core capables d'entendre , ou celles des gens trop curieux , qui s'enquierent de ce qu'ils ne doiuent pas sauoir ; nous leur disons , *ie n'en scay rien* , ce qui n'a point d'autre signification sinon , *ie ne veux pas vous le dire*. Et de fait , eu egard à la curiosité naturelle de l'esprit humain , il est à presumer que les Corinthiens auoyent besoin que l'Apostre mist ainsi vne barriere au deuant de leurs demandes. Car autrement ils n'eussent pas manqué de luy faire mille questions ausquelles il n'eust esté ny de sa grauité ny de leur edification de satisfaire. La seconde chose qu'on peut respondre est , que dans les choses qui d'un costé sont impreueuës & surprenantes , & qui de l'autre sont grandes extraordinairement , bien que nous les voyions ou que nous les entendions , siest-ce que nous n'y reconnoissons & ny sentons pas bien distinctement les operations de nos puissances. Ainsi voyez-vous en quelcun des Pseaumes , que les fidesles parlans du retour du peuple d'Israel hors de la captiuité de Babylon , disent , *Quand l'Eternel ramena & mit à recoi ceux de Sion qui retournoyent de captiuité , nous estions comme ceux qui songent*. C'est à dire , que cette deli-

urance fut si grande, si surprenante, si pleine d'une ioye incomparable & d'un contentement non attendu, qu'à peine s'en pouvoient ils assurer, ne sachans presque si c'estoit vne verité ou l'illusion d'un songe. Quand l'Ange tira S. Pierre de prison, & qu'il luy fit tomber les chaînes des mains, il est dit expressément que S. Pierre ne sauoit pas que *que ce qui se faisoit fust vray*, tant l'action estoit merueilleuse. Et dans les grandes emotions de cette nature, on a accoustumé de dire, *ie suis ravi, ie suis hors de moy, ie ne me sens pas moy mesme*. La raison de cela est que pour sentir nous-mêmes nos propres operations, & pour bien reconnoistre quelles sont les facultez par lesquelles elles s'exercent, il faut que nous retirions en quelque façon nos esprits de dessus les objets à la contemplation ou à la iouissance desquels ils estoient occupés, pour les ramener & réfléchir sur nous, & pour contempler comment nous auons agi, & quelles sont les puissances que nous y auons desployées. Quand donques l'objet est si surprenant qu'il rait absolument les facultez à soy, & sans, par maniere de dire, qu'elles ayent le loisir de s'en aduiser; & quand il est si

grand, si extraordinaire, & si touchant, qu'il remplit les facultés toutes entieres, de sorte qu'il n'y en peut entrer d'autre qui leur face venir la pensée de se considerer elles-mesmes & de se retourner sur soy, alors, cōme si elles estoient en quelque espece d'exstase, elles ne se connoissent pas elles-mesmes, & ne iugent pas distinctement de leurs propres actions. Or voyés-vous, mes freres, quelle estoit la nature de l'objet qui se presentoit alors à S. Paul. Iamais homme mortel n'en vid vn si grand ny si glorieux, ny si capable de remplir toute l'estenduë de ses facultez pour si vastes qu'elles peussent estre. Et pour ce qui est de la surprise, soit que ce ravissement se soit fait en corps, soit qu'il se soit fait en ame seulement, outre qu'il est à presumer qu'il a esté fort subit & fort impremedité, la merueille de ce que S. Paul a veu & ouï, luy a esté si nouvelle, & luy a donné d'abord vne si grande admiration, qu'il a esté aisé de s'imaginer qu'il en sentit vn transport inconceuable. Et si vous vous figurés vn paysan, qui n'a iamais passé plus loin que les environs de sa chaumine, estre enleué par vn Ange, & transporté dans la ville de Paris, &

que l'Ange le met tout endormi dans le plus beau lieu du Louure, au milieu des plus grandes magnificences de la Cour, & en commodité d'ouïr & les propos qui se tiennent dans les Cercles, & la Musique qui s'entend dans les concerts, vous n'aurez point besoin de vous mettre dans l'esprit l'idée des Palais enchantez dont parlent quelques Romans & quelques Poëtes, celle-là, si vous vous figurez que ce pource homme se réveille, & que tous ces beaux objets frappent en mesme moment ses sens, suffira pour vous faire concevoir qu'en telles occasions on se trouue si estonné qu'on ne sçait si on est viuant ou si on est mort, si on dort ou si on veille. A cela vous poués encore adjoûter que quand les facultés de S. Paul eussent esté moins déterminées d'elles-mesmes par la nature de l'objet, si Dieu a iugé à propos ou nécessaire, que S. Paul ne sceust pas exactement comment ce miracle se faisoit, si dije, c'estoit ou en corps ou hors du corps, il aura bien peu tellement attacher ses facultez sur les choses qu'il luy presentoit & à voir & à ouïr, que leurs operations fussent absolument en dehors, & que quand il l'eust voulu il n'eust pourtant peu en fai-

re reflexion sur soy-mesme. Tellement qu'il voyoit & oyoit ce qui se presentoit à luy exterieurement ; mais il y estoit tellement fixé & déterminé par la puissance de Dieu, que ne repliant aucunement ses facultés ny leurs operations sur soy, il ne pouuoit, quand le ravissement fut passé, auoir aucune certitude de la constitution en laquelle il estoit à l'heure que ces merueilleux objets remplissoient ainsi toutes ses puissances. Voila pourquoy il dit qu'il ne sçait quant à luy comment cela se fit. Mais quelle raison a-t-il d'adjouster, *Dieu le sçait* ? Car qui peut douter que Dieu ne le sceust, luy de qui la connoissance est infinie comme l'essence ? Certainement, mes freres, ny les Corinthiens ny aucun autre ne pouuoit pas douter que Dieu ne sceust exactement comment tout cela s'estoit passé. Les choses anciennes, les presentés, celles qui sont à venir, sont nuës & descouuertes deuant ses yeux. Ses connoissances mesmes ne se bornent pas à cela : il sçait encore toutes les choses possibles, bien qu'elles n'ayent point, & qu'elles ne doiuent iamais auoir aucune actuelle existence. Cōment donques ignoreroit-il les choses qu'il a faites luy-mesme, & qui

ont esté executées par l'efficace de sa main ? Mais aussi n'est ce pas ce que l'Apostre S. Paul veut dire: il entend qu'il n'y a que Dieu qui le sache, & que si on veut en auoir la connoissance, c'est à luy qu'il se faut adresser pour le demander. De sorte que n'ayant point establi de lieu d'oracle, ny ordonné d'Ephod, ny institué d'autre moyen, pour s'aller enquerir de luy touchant les choses abstruses & cachées à l'intelligence humaine, ny donné de promesses de satisfaire à la curiosité de ceux qui s'en enquerroyent, ce qui resulte de cela c'est qu'il en faut demeurer-là, & ne porter pas plus auant la curiosité de son ame. A peu prés comme au vingt-quatrieme de S. Matthieu, Christ interrogé par ses disciples touchant le iour du Iugement, leur dit, *Quant à ce iour-là, & à l'heure, nul ne le fait, non pas les Anges du Ciel, mais mon Pere seul.* C'est à dire qu'il ne faut pas s'en enquerir, & que ny luy ny qui que ce soit n'a charge de le reueler aux hōmes. Tellement que si on le desire sauoir, c'est au Pere qu'il se faut adresser. Ce qui est tout autant que s'il disoit, Ne vous en enquerez point du tout, parce que vous ne sauriez monter au Ciel pour vous

en enquerir de Dieu, & il n'a point ordonné de moyẽ de le vous reueler en la terre. Ce qu'il est plus permis de rechercher, & qui peut estre n'est pas si difficile à trouuer, c'est où & quand s'est fait ce miracle. Pour ce qui est du temps, nous vous auons desia dit en gros, qu'à supposer ces quatorze ans en retrogradant, cela est tombé en l'année que S. Paul fut conuerti à nostre Seigneur. Et pour ce qui est du lieu, nous auons au commencement de cette action déclaré que nous ne pouuions consentir à l'opinion de ceux qui rapportent ce rauissement à l'histoire qui nous est recitée au neuuiesme chapitre des Actes. De sorte qu'il y a beaucoup d'apparence que cela est arriué au voyage que l'Apostre fit en Arabie, apres auoir fait quelque sejour à Damas. Car voicy la suite de l'histoire, comme elle se peut recueillir du liure des Actes, & du premier chapitre de l'Epistre aux Galates, ou S. Paul mesme supplée ce que S. Luc a laissé. Il partit de Ierusalem avec commission du Souuerain Sacrificateur, pour s'en aller à Damas y persecuter l'Eglise. Nostre Seigneur luy estant apparu sur le chemin, & luy estant demeuré auueugle pour les causes que ie vous ay

rapportées cy-dessus brièvement, on le conduit à Damas, où il est trois iours sans voir, & sans boire, & sans manger. Ce temps-là étant passé, Ananias le va trouver par le commandement de Dieu, & luy impose les mains, & apres que les écailles luy furent tombées des yeux, & qu'il eut esté baptisé, il se mit incontinent à prescher le nom de nostre Seigneur Iesus Christ dans les Synagogues. En suite de cela il alla en Arabie, & quel fut le sujet de son voyage, & combien de temps il y séjourna, c'est ce qu'il ne nous dit point. Quelques grands personages sont de cette opinion qu'il y demeura environ trois ans. Mais ie ne sçay s'il y a beaucoup d'apparence. Car s'il y est allé prescher l'Evangile, & qu'il l'ait fait environ trois ans durant, ce n'aura pas esté sans y faire beaucoup de fruit, & sans y fonder beaucoup d'Eglises. Or comment se pourroit-il faire qu'il auroit planté quantité d'Eglises en ce pays-là, sans que luy-mesme nous en eust parlé ailleurs, ou sans que S. Lucau moins nous en eust dit quelque mot dans l'histoire qu'il nous a faite de la naissance du Christianisme? Quelque séjour qu'il ait y fait, il reuint quelque temps

apres dans la ville de Damas, & apres y
auoir presché, persecution s'estant émeue
à cette occasion contre luy, pour en es-
chapper, on le descendit du haut en bas
de la muraille de la ville par vne fenestre
en vne corbeille. De là il vint en Ieru-
salem pour visiter Pierre, & demeura
avec luy quinze iours; & puis il en partit
pour venir prescher l'Euangile dans les
contrées de Syrie & de Cilicie. Puis
donc que ce n'est pas à Damas que ce
merueilleux accident luy est arriué, & que
neantmoins il ne peut estre arriué sinon
en cette année-là, il faut necessairement
que cela se soit fait en Arabie, & peut estre
que Dieu a choisi les lieux deserts de cet-
te region-là, pour executer ce rauisse-
ment hors de la veuë & de la presence des
hommes. Car quand il transporta He-
noc, ce ne fut pas deuant les yeux de la
multitude, mais en quelque lieu écarté.
Et quand il enleua Elie, ce fut en la pre-
sence de son seruiteur Elisée, mais neant-
moins en tel endroit qu'il n'y auoit per-
sonne qu'eux deux. Enfin, quand nostre
Seigneur monta au Ciel, ce fut bien à la
verité en la presence de ses disciples, parce
qu'ils deuoyent estre les témoins de son

de la *II. aux Cor. v. 1. 2. 3. 4. 5.* *III.*
ascension au Ciel, aussi bien que de sa mort
& de sa resurrection. Mais il ne fut veu que
d'eux en cette occasion-là. Et puis que
Dieu ne vouloit pas que ce transport de
S. Paul fust connu sinon quatorze ans
apres, il y auoit, outre les causes genera-
les pour lesquelles ces actions ont deu se
faire en quelque secret, vne raison parti-
culiere pourquoy celle cy se deuoit exe-
cuter en des lieux deserts & hors de la
connoissance des hommes. Or est-ily à
remarquer, mes freres, pour nous appro-
cher de la conclusion de cette action, qu'il
est sans doute arriué des choses fort me-
morables aux autres Apostres. Puis qu'ils
estoyent destinés pour estre les herauts de
l'Euangile de Christ, & pour conquerir
les Nations à sa connoissance, ils ont deu
auoir d'admirables reuelations, faire des
miracles signalés, & estonner de la mer-
ueille de leurs actions toute la terre habi-
table. Neantmoins il nous est en la Parole
de Dieu dit peu de choses de la predication
de tous les autres, en comparaison de deux
d'entr'eux, à sçauoir S. Pierre & S. Paul,
dõt l'histoire est remarquable par des mer-
ueilles extraordinairement signalées. Car
quant à S. Pierre, outre les autres merueil-

lesqui nous sont rapportées de luy au liure des Actes, il y en a deux entre les autres qui donnent vne singuliere admiration. La premiere est cette vision qui luy fut adressée en la ville de Ioppe. Car luy estant suruenu vn rauissement d'esprit comme il prioit, il luy fut aduis qu'il voyoit descendre du Ciel vn grand linceul lié par les quatre bouts, ou estoient contenuës toutes sortes d'animaux, & qu'en mesme temps il oyoit vne voix qui luy disoit, *Tu es & mange*; pour luy donner à entendre par cet embleme allegorique, que desormais il ne falloit plus mettre de difference, en ce qui touche l'esperance du salut, entre les Iuifs & les autres Nations. Ce qui fut suivi d'autres circonstances qui rendent l'histoire de cette reuelation souuerainement remarquable. L'autre est, quand il fut mis en prison par le commandement d'Herode, & que l'Ange de Dieu l'en tira miraculeusement. Car c'estoit bien certes vne chose admirable tout à fait, qu'il luy fist tomber insensiblement ses chaines des mains; qu'il le tira d'entre les soldats au milieu desquels il dormoit; qu'il fist que les portes s'ouuerissent d'elles mesmes deuant luy; qu'il le fist

passer

passer au trauers des corps de garde sans qu'ils s'en apperceussent, & qu'il le deliurast ainsi de la main de ce tyran & de l'attente du peuple des Iuifs. Pour ce qui est de S. Paul, son histoire est toute miraculeuse. Il est appelé d'une façon extraordinaire, & par des voix des cieux & des apparitions du Seigneur. C'est l'oracle du S. Esprit qui luy donne son departement en la predication de l'Euangile, & qui declare hautement entre les fidelles qu'il a esté mis à part pour cela. C'est la Prouidence extraordinaire & particuliere de Dieu qui dirige tous ses voyages, & ses commandemens exprés, ou les mouuemens du saint Esprit, sont ceux qui ordonnent des lieux où il doit & où il ne doit pas prescher. Il luy apparoit des visions, comme de cet homme habillé à la mode des Macedoniens, qui luy dit, *passé en Macedoine & nous aide*, pour l'aduertir des endroits où l'Euangile du Seigneur peut estre annoncé avec succès. Les fondemens des prisons tremblent, & leurs portes s'ouurent au son de sa voix, quand il y inuoke son Sauueur, & qu'il y chante ses loüanges. Les Prophetes que Dieu suscitoit en ce temps-là reçoient des

visions & des inspirations pour luy, afin de predire les accidens qui deuoyent arriuer à sa personne. En vn mot, sa vie, depuis qu'il partit de Ierusalem pour venir à Damas, est vne tapisserie variée d'vne infinité de remarquables euenemens, & rehaussée çà & là de l'imcomparable éclat de diuerses choses miraculeuses. Mais en tout cela il n'y a rien de si merueilleux que ce glorieux rauissement dont il est parlé en ce passage. Et s'il estoit arriué à S. Pierre, bon Dieu, comment est ce que ceux de la Communion de Rome en triompheroient ! Ils diroyent qu'il auroit esté le seul d'entre les Apostres à qui Dieu auroit communiqué cet auantage que de l'admettre à entrer dans le Sanctuaire des cieux. Que ce seroit là qu'il luy auroit fait receuoir l'investiture de cette grande puissance qu'il luy a donnée, d'estre le Vicaire de nostre Seigneur en tout l'Vniuers. Qu'en ce transport il auroit mis en depost en son bien-heureux sein tous les secrets de sa sâpience, pour estre capable de ce grand & incomparable gouvernement. Qu'encore qu'il ne les eust pas reuelés alors, pour quelques raisons qui concernoyent ce temps-là, si est,

de la II. aux Cor. v. 1. 2. 3. 4. 5. Il s'
e qu'il en a depuis tousiours laissé couler
quelques rayons dans l'esprit de ceux qu'il
a establis ses Lieutenans, d'où est venu
qu'ils n'ont iamais peu errer quand il a esté
question de decider les choses qui concer-
nent la Religion Chrestienne. Car vous
saués, mes freres, qu'ils tirent profit de
tout, principalement lors qu'il s'agit
d'amplifier & de confirmer l'autorité de
leur souuerain Pontife. Pour ce qui est de
S. Paul, ils font fort peu de reflexion sur
tout ce qui l'a concerné, & s'ils vouloyent
dire la verité, ils ont contre luy quelque
tacite mécontentement, & quelque chose
sur le cœur, qu'ils n'osent dire tout ou-
uertement, de peur que nous ne criions
Au blaspheme. En effect quelques vns de
leurs Docteurs, & mesmes de leurs Car-
dinaux, ont osé dire qu'il eust esté plus ex-
pedient qu'il n'eust iamais escrit, parce
que ses Epistres fauorisent les opinions de
ceux qu'ils appellent heretiques. Pour
nous, nous ne preferons point l'un à l'autre
ces grands seruiteurs de nostre Seigneur.
Ils ont esté tous deux Apostres de Iesus
Christ, tous deux excellens en dons, tous
deux egaux en autorité, tous deux illustres
en miracles, & ç'a esté à eux deux prin-

cipalement que Christ a partagé la conquête qu'il vouloit faire du monde, assignant à l'un le Prepuce, & à l'autre la Circoncision. Car encore qu'il ait esté permis à l'Apostre S. Pierre de prescher entre les Gentils, si est-ce nommément aux Juifs, & encore à ceux de la dispersion, que sa predication estoit destinée. Et bien qu'il fust permis à S. Paul de prescher entre les Juifs, comme de fait il a presque tousiours commencé par eux à annoncer la Verité, ç'a neantmoins esté enuers les Gentils que les fonctions de son Apostolat ont deu estre principalement employées. Et dans les paroles par lesquelles Dieu declara à Ananias quelle estoit la Commission qu'il vouloit donner à S. Paul, il fait bien mention des *enfants d'Israel* à la verité, mais c'est plus spécialement à l'occasion des *Gentils & des Rois* deuant lesquels il deuoit porter son nom, qu'il l'appelle vn *vaisseau d'election*, ou vn instrument qu'il a choisi entre tous les autres hommes du monde. Aussi s'appelle-t-il luy-mesme l'*Apostre des Gentils*, & se glorifie de ce tiltre. Pour nous, qui sommes issus de ces Nations que Dieu auoit abandonnées, & que la predication de ce

grand S. Paul a conuerties à l'esperance du salut, nous deuons aussi nous glorifier de nostre costé de ce que nous auons eu pour Docteur vn si illustre seruiteur de Dieu, & dont l'Apostolat a esté seellé par des miracles si authentiques. Qui est-ce d'entre les Philosophes qui se puisse glorifier à telles enseignes d'auoir esté suscité de Dieu, comme Socrate s'en est vanté, pour enseigner la vertu aux miserables mortels? Qui est-ce d'entre les Prophetes, bien que ce fust à iuste titre qu'ils se glorifiasent d'auoir esté suscitez de Dieu, qui puisse mettre en auant des preuues de sa vocation qui soyent aussi glorieuses? Ils ont veu des visions, ils ont songé des songes, ils ont senti d'admirables mouuemens, quelques-vns d'entr'eux ont ouï des voix des cieux, & ont esté honorez de quelques oracles. Mais cela n'approche point d'auoir esté ravi iusques au troisieme ciel, & d'y auoir ouï, comme nostre bien-heureux S. Paul, des paroles inenarrables. Moysse mesme, ce grand Moysse, que Dieu a mis si haut au dessus des autres Prophetes de la dispensation de la Loy, bien qu'il ait esté esleué sur le coupeau de la montagne de Sinai, n'a pas esté ravi au troisieme

ciel pourtant, & quoy qu'il ait esté receu de fort estroittes & fort familières communications avecque Dieu, si est-ce qu'il n'a ny veu ny ouï les merueilles du sanctuaire celeste. Enfin, les Apostres, encore que leur ministere ait esté si glorieux que celuy de Moysé ne leur ait point esté à comparer, sont en cela en quelque sorte inferieurs à S. Paul, qu'ils n'ont rien veu de semblable à son ravissement dans les lieux celestes. Puis donc que ce grand Apostre est tel, receuons ses instructions, & profitons de tant de diuins enseignemens qu'il nous a laissez dans ses Epistres. Il ne nous a pas à la verité raconté les choses qu'il a veuës & ouïes dans le Ciel : il n'en auoit pas receu le commandement ; il ne luy auoit pas mesmes esté permis ; & puis qu'il ne l'a pas fait, il faut croire que cela n'estoit pas d'edification pour nous tandis que nous sommes en la terre. Mais il nous a estallé deuant les yeux vne infinité de belles choses qui sont plus proportionnées à nostre capacité. Soyons soigneux, freres bien-aimés en nostre Seigneur, en les lisant & en les meditant, d'en acquerir vne solide & lumineuse connoissance. Tout ce que l'on peut ap-

prendre dans les disciplines humaines, toutes les parties de la Philosophie, quelles qu'elles soyent, tout ce qu'il a de beau & de releué dans les auteurs de ce present siecle, tout cela n'est rien en comparaison de l'excellence des choses que nous pouvons voir dans S. Paul, & quelque recreation ou quelque vtilité qu'on en puisse recueillir, ce n'est que pour la vie de maintenant, & elle ne passe pas le bord du sepulcre. Au lieu que l'intelligence des mysteres de la Foy, accompagne l'ame des fidelles iusques au delà de la mort, & ce qui en est commencé icy, car nous n'en possedons encore icy que les rudimens seulement, s'acheuera dans les lieux celestes. Il nous a entr'autres choses inculqué la doctrine de la Croix & de la resurrection de Christ, nous enseignant que le Seigneur a esté liuré pour nos offenses, & qu'il est ressuscité pour nostre iustification. Embrassons estroittement cette doctrine comme la cause de nostre salut, & comme l'vnique fondement sur lequel nos esperances sont establies. Le Diable, le Monde, la Chair, font tout ce qu'ils peuuent pour esbranler la creance de cette diuine verité dans nos entendemens. Resistons à

toutes tentations d'incredulité, & de mandons à Dieu qu'il engraue de plus en plus en nos cœurs le saint portrait de la Croix de nostre Sauueur, & la persuation de sa resurrection glorieuse. Il nous a mis deuant les yeux la mesme mort & la mesme resurrection de Christ, pour patron de la mortification du Vieil homme en nous & de la viuification du Nouveau, & nous a exhortés à la pratique de la sanctification par toutes sortes de motifs; deferons à ses exhortations, & raschons de nous conformer à ce beau modelle. Il s'est proposé luy-mesme à nous, afin que nous l'imitions, en nous disant, *Soyés mes imitateurs, comme aussi ie le suis de Christ*: efforçons-nous de respondre à l'excellence de cette copie, comme elle a excellemment representé son original, de sorte que nous puissions dire comme il a dit autrefois: *Ie suis crucifié avec Christ; & vi, non point maintenant moy, mais Christ vit en moy: & ce que ie vi maintenant en la Chair, ie vi en la Foy du Fils de Dieu, qui m'a aimé, & qui s'est donné soy-mesme pour moy*. Il a eu diuers combats à soustenir, mais il s'y est tousiours comporté vaillamment, marchant parmy honneur & ignominie, parmy diffame &

bonne renommée, exposé à la contradiction des hommes, mais y opposant vne fermeté inuincible, & la consolation qu'il tiroit de ses diuines réuelacions. Suiuons constamment & courageusement ses traces, & nous munissons de toutes sortes de bonnes pensées contre les attaques de nos ennemis: opposons au chagrin & à la tristesse de nos ames, s'il nous en vient des mauuais traitemens que nous receuons, la ioye inenarrable qui nous reuiet d'auoir conu le Sauueur du Monde. Enfin, bien qu'il ne nous ait pas desployé les merueilles de là-haut, il nous en a fait assés entreuoir en nous disant qu'il ne vouloit pas les nous monstrier, pour en exciter le desir en nous, & pour en viuifier l'esperance. Tendons donc perseueramment à son imitation vers le but de la bien-heureuse immortalité, & demandons continuellement au Seigneur Iesus qu'en fin il nous en donne la iouissance. A luy, comme au Pere & au S. Esprit, vn seul Dieu benit eternellement, soit gloire, force & empire dès maintenant, & à tous les siècles.
AMEN.





S E R M O N

QVATRIEME.

S V R C E S M O T S,

*D'un tel homme me vanteray-ie, mais ie ne
me vanteray point de moy-mesme, sinon en
mes infirmitéz.*

F R E R E S B I E N - A I M E Z E N N O S T R E
S E I G N E V R .

Vous voyés quelle est la disposition de la face de la terre. Il y a des contrées au trauers desquelles il passe de grandes riuieres, qui outre l'humeur & le rafraichissement qu'elles portent dans les prairies & dans les campagnes, fournissent encore abondamment le breuuage aux hommes & aux animaux. Il y en a d'autres où l'on ne void point de si grands fleuues: mais tant y a qu'il y sould d'elles-mesmes des fontaines viues & fecondes, qui produisent des ruisseaux considerables, & qui donnent de l'eau suffisamment aux habitants de ces regions là. Il y en a d'autres

où il ne paroist point de sources sur le panchant des collines , & où vous ne voyés point couler ny serpenter de ruisseaux. Mais neantmoins elles sont pleines d'humiditez sousterraines , qui sont si proches de leur surface , qu'il ne faut que fort peu creuser pour les trouuer , & pour en tirer les vsages dont la vie des hommes à besoin. Enfin , il s'en trouue quelques-unes si arides & si sablonneuses, qu'il ne semble pas d'abord que quelque industrie qu'on y apporte , ou quelque trauail qu'on y prenne , on en puisse tirer aucune humeur. Et toutesfois , pourueu que l'on y creuse bien auant , encore se trouuent-il des veines d'eau dans les entrailles de la terre , qui estans bien mesnagées & bien conseruées , peuuent desalterer les passans. L'Escripture sainte , mes freres , est à peu près de mesme , pour ce qui regarde les instructions qui peuuent seruir à salut. Si vous y tombés sur vn de ces endroits où l'Apostre S. Paul traite quelcun des articles de la Religion Chrestienne comme est celuy de la Iustification de l'homme deuant Dieu , & de l'efficace de la Loy & de l'Euangile à produire la vraye sanctification , & de la resurrection des

24 *Sermon III. sur le chap. 12.*

corps, c'est comme vn fleuve de doctrine qui s'espend au long & au large, & qui remplit nostre intelligence d'admirablement belles instructions. Si de là vous passez aux lieux où luy & les autres Apostres nous expliquent les preceptes qui concernent la moralité, ce sont des sources abondantes, d'où vous puisez liberalement les choses qui seruent à la regeneration de vos ames, & à vous rendre dignes de l'excellence de vostre sainte vocation. Quant aux histoires, il y en a quantité nommément dans les liures de l'ancienne Alliance, d'où d'abord il ne semble pas qu'il y ait aucun fruit à recueillir, qui serue à l'œuvre de nostre salut. Et neantmoins, si vous venés à les considerer vn peu attentiuement, elles vous fournissent incontinent l'occasion de faire dessus des considerations & des reflexions fort vtilles. Enfin, il y a certains endroits qui semblent vous retrancher absolument l'esperance d'en retirer aucune considerable vtilité, & qui sont comme des lieux deserts, sur lesquels on passe sans s'arrester, parce qu'on n'y trouue d'abord aucun sujet d'esperer que si on se met à les mediter, on en puisse remporter la recompense de

de la 11. aux Cor. v. 1. 2. 3. 4. 5. 125

la peine. Et neantmoins il est certain qu'il n'y a aucun lieu si sterile en bonnes instructions, d'où on ne puisse tirer, si on y apporte quelque attention & quelque application de l'ame. Et le passage que ie viens de lire en vostre presence, nous peut fournir vne preuue de la verité de ce que ie dis. Car, comme vous voyez, il n'y a aucun Point de doctrine à expliquer, ny aucune ~~de~~ controuerse à traiter, ny ce semble, aucunes grandes moralitez à recueillir de la meditation de ces paroles. Ou s'il y auoit quelque reflexion à y faire, elle a desia esté faite sur la preface de cette diuine histoire, & il seroit ennuyeux de vous repeter ce que nous en auons dit alors. Neantmoins, nous esperons moyennant la grace de nostre Seigneur, & l'assistance de son bon esprit, qu'apres que nous les aurons examinées vn peu attentiuement, vous trouuerez que le dire de de nostre Apostre est veritable: C'est que *toutes les choses qui ont esté escrites, ont esté escrites pour nostre endoctrinement: afin que par la patience & par la consolation des Escritures nous ayons esperance.* Escoutez donc encore cette fois patiemment ce que nous auons à vous dire sur cette clo-

sture du Rauissement de S. Paul, où il y a trois parties principales. La premiere est qu'il dit qu'il se vantera d'un tel homme, c'est à dire, d'estre celuy a qui ce rauissement est arriué. La seconde est, la declaration qu'il fait qu'il ne se vantera point de soy-mesme. Et la troisieme finalement est l'explication qu'il adjouste à cette declaration, c'est qu'il ne se vantera point sinon en ses infirmités.

Or quant à la premiere de ces choses; *d'un tel homme me vanteray-je*, dit l'Apostre, ou si cela sent un peu mieux l'air de nostre langue Françoisse, *ie me vanteray d'un tel homme*. C'est à dire, si ie voulois me glorifier, ie pourrois dire en toute verité que ie suis le personnage à qui vne chose si extraordinaire & si miraculeuse est arriüée : & si ie le voulois faire, ie pourrois bien défier mes aduersaires de produire, ie ne diray pas aucun d'entr'eux : car qui est-ce de leur nombre qui ostant mettre de telles choses en auant ? Je ne diray pas aucun de ceux qui sont maintenant viuans ; car ie sçay bien qu'il n'y en a point qui ait rien veu de tel ; mais de ceux mesmes des siecles passez, à qui Dieu ait iamais fait experimenter, en telle sorte qu'il s'en

peust vanter entre les viuans, aucune chose comparable? En effect, mes freres, si nous parcourons briuelement les accidens les plus memorables dont les histoires facent mention, nous ne trouuerons rien de semblable. Et ie ne parleray point icy des choses contenuës dans les Poëtes, & dans les autres auteurs Payens, où il est parlé de gens qui ont esté ramenés d'entre les morts, ou qui sont descendus dans l'antre de Trophonius. Ce sont choses vaines & fabuleuses, d'où on ne sauroit tirer aucune lumiere de verité, ny aucun suc d'instruction qui soit tant soit peu raisonnable. Je feray mention seulement des choses qui sont recitées dans le Vieil & dans le Nouveau Testament, & où il ne nous est rien rapporté de miraculeux qui ne soit souuerainement veritable. Et il me semble qu'on y trouue de trois sortes de choses extraordinairement remarquables, qui peuuent donner quelque lumiere à nostre propos, & illustrer celuy de S. Paul. Car il nous y est parlé de gens qui ont esté transportés au ciel auecque leurs corps: & d'autres qui sont ressuscités d'entre les morts: & enfin d'autres qui sans mourir ont veu des visions & des reuela-

riens admirables. Pour ce qui est des premiers, il nous est parlé d'Henoc, & d'Elie, & de nostre Seigneur, dont les corps mesmes ont esté transportés dans les lieux celestes. Et ie ne nie pas que ce qui est dit d'eux ne soit plus glorieux que ce qui nous est dit de S. Paul. Car c'est vne chose indubitable, qu'ils y ont esté esleués en corps, & S. Paul nous laisse icy en doute de la façon de laquelle ce miracle a esté executé en sa personne. Et leurs corps, pour estre esleués-là, ont souffert quelque transmutation, par le moyen de laquelle ils ont laissé les qualitez terriennes & sensuelles qu'ils auoyent auparauant, pour en reuestir de nouvelles : au lieu que quand le corps de S. Paul auroit esté rai-là-haut, il est certain que ce seroit sans auoir perdu ses qualitez naturelles. Car dans la conuersation qu'il a eüe depuis avec les hommes, par l'espace de tant d'années icy bas, on n'a rien remarqué en son corps qui fust different de la condition des autres mortels, & les persecutions qu'il a souffertes en la predication de l'Euangile de Christ, le luy ont fait à luy-mesme experimenter possible. Mais aussi S. Paul ne pretend-il pas que l'on face icy comparaison de luy

avec

avec Henoc, ny avec Elie, ny avec nostre Seigneur Iesus Christ en cet egard : mais seulement avec les hommes, qui estans reuestus d'infirmités icy bas, & conuersans entre les viuans, ont neantmoins moyen de se vanter de quelques choses glorieuses. Pour ce qui est de ceux qui sont ressuscités d'entre les morts, il y en a de deux sortes. Car il y en a eu quelques vns dont la resurrection nous est bien rapportée en la parole de Dieu : mais c'est en telle façon qu'apres cela il ne nous est plus parlé d'eux, de sorte qu'il est assés clair qu'ils ont esté ressuscités, non pas pour demeurer & pour conuerser icy bas en cet estat d'infirmité auquel nous nous y voyons, mais pour estre recueillis dans les lieux celestes. Et tels sont ces saints dont il est parlé dans l'histoire de la passion & de la resurrection de nostre Seigneur, dont les sepulcres s'ouurirent alors, & qui apparurent en Ierusalem à plusieurs apres qu'il fut ressuscité, comme S. Matthieu le nous rapporte au chapitre vingt-septième de son Euangile. De ceux-là, sans doute, on peut dire, qu'apres auoir ainsi serui par le miracle de leur resurrection à rendre témoignage à la gloire de nostre Seigneur,

ilsont esté enleués au Ciel, pour y iouir avec Elie & avec Henoc de la beatitude éternelle. Et ce n'est pas encore l'intention de l'Apostre que l'on face comparai-
son de luy avec eux : parce qu'ils doiuent estre considerez comme bien-heureux, & de la mesme condition que nous serons apres la seconde apparition de nostre Sei-
gneur; au lieu que quant à luy il se consi-
dere comme du nombre de ceux qui ont encore à lutter icy bas contre les infirmi-
tez de la vie animale & naturelle. Pour ce qui est des autres ressuscitez, ils sont demeurés au monde apres leur resurre-
ction, & ont en ressuscitant repris leurs corps avec toutes les foibleesses de la Natu-
re. Tel a esté ce ieune enfant qui fut ra-
mené en vie par le Prophete Elisée : tel le fils de la veufue de Naïn, que nostre Sei-
gneur ressuscita : tel a esté encore Lazare, que nostre Seigneur tira du tombeau qua-
tre iours apres qu'il y eut esté mis: tel Euty-
che que S. Paul remit au monde apres qu'il se fut tué en tombant d'une fenestre; & s'il y a encore, comme il y en a certes, quelques autres histoires de cette sorte dans le Vicil & dans le Nouveau Testa-
ment. Or ie dis, mes freres, que quant à

ceux-là, ils ont bien esté à la verité des
sujets choisis de Dieu pour y manifester sa
puissance, & ie ne doute pas qu'ils n'ayent
esté considerez par les hommes avec vne
souueraine admiration. Car dites moy
combien est-ce qu'on courroit loin à cette
heure pour voir vn homme ressuscité, si
l'on pouuoit estre asseuré qu'en effect sa
resurrection fust vne chose veritable? Et
neantmoins, ie croy que le rauissement
arrivé à S. Paul a quelque chose de plus
admirable. Parce que premierement ce-
la est plus singulier, n'y ayant eu que ce
seul exemple d'une telle sorte de miracle
dans tous siecles passés. Et puis il n'est pas
certain que leur ame, bien qu'elle ait esté
separée d'auecque le corps, ait esté re-
cueillie dans les lieux celestes. Car elle a
peu estre conseruée en quelque lieu pro-
che de là, par quelque sage dispensation,
en attendant qu'elles fussent réunies avec-
que le corps, comme Dieu l'auoit ordonné;
& de celle d'Eutyché il est dit expresse-
ment qu'elle estoit encore en luy, apres qu'il
eut esté leué mort. C'est à dire, non qu'el-
le l'animoit, & que comme on parle dans
les Escoles de Philosophie ^{qu'}elle l'infor-
moit, comme elle faisoit en viuant. Car ce

seroit vne chose contradictoire qu'il eust esté leué mort, & que son ame fust encore en luy de cette sorte. Mais c'est qu'encore qu'elle se fust separée des organes où elle habitoit, & où elle faisoit ses fonctions auparauant, elle auoit esté conseruée dans quelque partie du corps, comme elle eust esté en vn autre lieu, seulement pour y séjourner, & non pour estre la forme d'aucun sujet, ny vn principe de vie. Quand il seroit certain que ces ames auroyent esté receuës là-haut dans le Ciel, & puis apres ramenées icy bas, si est-ce que venans à estre replongées dans la matiere, & attachées tout de nouveau aux organes corporels, Dieu auoit voulu qu'elles perdissent le souuenir des merueilles qu'elles auoyent veuës là-haut: ou que s'il leur en estoit demeuré quelques images dans la memoire, elles y fussent extrêmement sombres & confuses: parce qu'elles ne les auoyent pas veuës afin d'en garder les idées dans la vie qu'elles auoyent à recommencer. Au lieu qu'il paroist bien en l'air & en la façon dont parle S. Paul, qu'encore qu'il ne luy fust pas permis de les declarer, si est-ce que les choses qu'il auoit veuës, & les paroles qu'il auoit ouïes,

luy estoient demeurées profondement
empraintes en l'entendement, pour les y
auoir viues & recentes pendant tout le
cours de sa vie. Car de la façon de laquel-
le vous voyés qu'il parle icy, il est aisé de
recueillir qu'encore qu'il y eust desia qua-
torze ans passez que ce miracle fust arriué,
neantmoins il luy sembloit qu'il auoit en-
core la chose presente deuant les yeux, &
que ces paroles inenarrables resonnoient
aux oreilles de son ame. Quant à ce qui
est des visions qui ont esté adressées aux
hommes viuans, il y en a encore de deux
fortes. A l'égard de quelques-vns, elles
ont consisté en songes, en representations
d'obiets formés dans leur fantaisie pen-
dant quelque exstase, ou tout au plus, en
quelque voix externes, on en quelque
especes visibles présentées aux yeux du
corps, sans que neantmoins il souffrist
quant à luy aucun transport ny aucune
elevation extraordinaire, & sans que
l'ame en fust effectiuement separée pour
quelque temps. Et telles ont esté la plus
part des visions adressées à Esaïe, à Iere-
mie, à Ezechiel, à Daniel, à Zacharie,
& aux autres Prophetes de l'ancienne Al-
liance, avec qui vous poués bien ranger

l'Apostre S. Iean , en ces admirables reue-
lations qui sont rapportées dans le liure de
l'Apocalypse. A l'égard des autres , elles
ont consisté en certaines choses qui ont
tellement esté présentées aux sens exter-
nes , pour les voir & pour les ouïr , que ce-
pendant leurs corps ont esté transportés
en quelques lieux extraordinairement
glorifiés pour y estre hors de la conuersa-
tion des humains , & en quelque sorte
mesme hors de l'enceinte de la Nature.
Et à cela pouués vous rapporter l'histoire
de Moyse , quand il a esté avecque Dieu
sur la Montagne de Sinaï , & celle de quel-
ques disciples de nostre Seigneur , quand
ils ont veu sur celle de Tabor sa transfi-
guration glorieuse. Pour les premières,
elles ont eu sans doute quelque chose de
magnifique & d'éclatant. Mais ie m'as-
seure pourtant que vous m'aduouërés
qu'on ne les peut pas egaler à l'auantage
qu'a eu S. Paul , de voir & d'ouïr effe-
ctiuement les choses qu'il a veuës & ouïes
dans le Sanctuaire de Dieu mesme. Soit
en corps , soit hors du corps que cela s'est
fait , tant y a qu'il a esté dans le Ciel , &
qu'il a ouï & veu à nu les choses celestes.
Ce qui est beaucoup plus auantageux , que

d'estre demeuré icy bas pour y recevoir l'impression de quelques images symboliques, ou de quelques voix par lesquelles Dieu declaroit sa volonté, pour estre puis apres reuelées aux hommes. Quant aux secondes, Moÿse sans doute, en la communication qu'il a eüe avec Dieu sur la Montagne, a receu vn honneur qui n'a point esté fait aux autres Prophetes des temps passés; & Pierre, & Iacques & Iean, en voyant la transfiguration du Seigneur, en ont aussi receu vn qui esleue en cela leur condition au dessus des autres disciples. Mais quoy, mes freres: le coupeau de ces deux montagnes, n'approche point de l'elevation du troisieme Ciel: la gloire de Dieu sur Sinai, & celle de nostre Seigneur sur le Tabor, n'ont esté, celle-là qu'une foible representation de la gloire du Ciel, celle cy qu'un essay de la glorification de Christ, quand vne fois il seroit esleué à la dextre de son Pere. Et quant aux paroles qu'ils ont ouïes, elles ont peu estre exprimées & rapportées. Car Moÿse n'en a rien laissé en arriere qu'il n'ait enseigné au peuple d'Israel en l'establissement de ses loix: & quant à cet oracle, *Celuy cy est mon fils bien-aimé, auquel i'ay pris mon bon*

plaisir, *escontés-le*, il est magnifique tout ce qui se peut : mais tant y a, puis que les Euangelistes l'ont recité, il n'estoit pas inenarrable. Or les paroles que S. Paul a ouïes ont esté telles, qu'il n'a esté ou permis ou possible à homme viuant de les raconter aux autres. De sorte que si nostre Apostre eust voulu se glorifier, il auoit de quoy se preferer en cela à tous les seruiteurs de Dieu qui ont vescu en tous les siècles. Mais c'est ce qu'il ne fait qu'à regret, & mesmes qu'il dit absolument qu'il ne veut pas faire. *Je ne me vanteray pas de moy-mesme*, dit-il; ce qui est le second point de nostre propos, & la seconde partie de cette sentence. Nous ne pouuons, mes freres, parler de nous-mesmes, sinon en l'une de ces trois manieres. Ou bien nous en disons des choses indifferentes, & qui n'emportent ny blasme ny loüange : ou bien nous en parlons en nous blasmant, & en deprimant nos qualitez : ou enfin nous en parlons en termes de recommandation & de loüange. Pour ce qui est de cette premiere façon de parler de nous-mesmes, on ne la trouue point mauuaise en qui que ce soit, pourueu qu'on y excède point, & que cela ne degene point en vain babil.

Mais à la verité cela est importun d'entendre vn homme qui parle perpetuellement de foy, & des choses qu'il luy sont arriuées. Car encore que chaque chose qu'il dit de foy-mesme, prise à part, ne soit pas fascheuse à ouir, si est-ce que comme il est ennuyeux aux yeux d'auoir toujours vne mesme objet, entendre touiours parler d'vn mesme sujet, est vne chose qui lasse extrêmement les oreilles. Et bien qu'on ne se louë pas formellement, il est pourtant malaisé d'euitier, quand on tire de foy-mesme vniuersellement tous ses entretiens, qu'on ne tombe dans le soupçon qu'on s'estime plus qu'il ne faut, puis qu'on ne trouue point de matiere de parler qui soit plus agreable que ce qui touche la personne mesme de celuy qui parle. Quant à ce qui est de se blasmer, on ne le souffre pas volontiers. sinon quand cela se fait à l'heure qu'il faut témoigner qu'on a de l'horreur pour ses mauuaises actions, & qu'on est touché de repentance. Daudid le fait ainsi en quelques-vns de ses Pseaumes d'vne façon extraordinairement emphatique, & en telle sorte que ses plus grâds ennemis n'eussent peu parler de luy plus defauantageusement. Particuliere-

ment au Pseaume cinquante & vnieme il se décrit comme vn grand pecheur, il dit que ses pechez sont continuellement deuant luy comme des fantosmes qui l'es-pouuantent, il se represente comme tout couuert de sang à cause du meurtre qu'il auoit commis, & comme si depuis le sommet de la teste iusques à la plante des pieds, il estoit tout souillé d'iniquité, il demande à Dieu qu'il le laue sans & plus, & qu'il y employe non pas seulement l'eau, mais l'hyssope. Daniel, & les autres Prophetes parlent ainsi, & pour eux-mesmes, & pour le peuple d'Israel, quand il est question de faire paroistre leur repentance deuant Dieu : & quand S. Paul fait reflexion sur sa vie passée auant sa conuersion, il s'appelle vn auorton, & dit qu'il a persecuté l'Eglise de Dieu, & qu'à cette occasion, si on le regarde par là, il ne merite pas qu'on le qualifie Apostre. Hors cela, vn homme ne fait pas bien de se blasmer sans necessité. Car s'il le fait tout de bon, & parce qu'effectiuement il se sent tel qu'il se dit, c'est à dire vicieux, il découure luy-mesme ses fautes sans qu'il luy en reuienne de l'vtilité : il donne occasion aux autres de le mespriser : il se rend inutile

au public & aux particuliers, parce que la bonne reputation aide aux actions de la vertu: enfin, il autorise mesme le vice en autrui, beaucoup de gens estans bien aises qu'on leur fournisse des exemples à mal faire. S'il le fait par ironie, & afin qu'on iuge autrement de luy que selon la description qu'il en fait, c'est vne façon de se louer qui est en quelque sorte plus odieuse que s'il le faisoit sans dissimuler & tout à la découuerte. Et il n'y a peut estre iamais eu que Socrate à qui il ait bien reüssi de se servir de ces ironies. Enfin, quant à ce qui est de se louer, c'est vne chose qui a toujours esté iugée souuerainement odieuse. En effect, si cela procede de vanité, c'est vn vice diametralement opposé à la modestie qui conuient à tout honneste homme, & à l'humilité qui appartient d'une façon particuliere aux Chrestiens. Et si cela vient de legereté, comme il arriue à quelques-vns, c'est vn défaut opposé à cette recommandable qualité qu'on appelle gravité ordinairement. D'où que cela vienne, la louange est bien sans doute la recompense naturelle de la vertu; mais il faut que ce soit d'ailleurs que de soy-mesme qu'on la recoiue. Il est contre la dis-

position de la Nature, & contre la coustume ordinaire des hommes, qu'une mesme personne merite la recompense, & qu'elle se la donne pour ses actions. Et s'il nous arrive de nous recompenser nous-mesmes de la façon, il est bien certes raisonnable que nous ne soyons pas louez par autrui, parce qu'on ne reçoit point deux fois la remuneration d'une mesme chose. Il y a pourtant certaines occasions où il est permis de passer par dessus ces considerations & de se louer. Car premierement il a autrefois bien réussi à quelques-uns de faire paroistre en cela la grandeur de leur courage, & cette vertu que les Philosophes appellent magnanimité. Epaminondas & Pelopidas, Capitaines Thebains, ayans retenu la conduite de l'armée de Thebes plus long temps que ne permettoient les loix du pays, & ayans par ce moyen mérité la mort, si on eust suivi toute la rigueur des loix & des termes esquels elles estoient conceuës, ils en furent accusés devant leurs concitoyens. Et Pelopidas, qui plioit sous cette accusation, & qui s'en defendoit avec quelque espece de foiblesse, y eust peut-estre succombé, si Epaminondas, qui

prit sur sa personne tout le blafme de l'ac-
tion, ne se fust pris d'une autre sorte à
s'en défendre. Mais premierement il ad-
uoüa le fait, & ne nia pas qu'il n'eust en-
frainct les loix de Thebes. Puis il adiousta
qu'il ne refusoit pas d'estre condamné à la
mort, pourueu qu'on mist dans le dicton
de sa condamnation les choses qu'il auoit
faites en retenant contre les loix le com-
mandement de l'armée. C'est, dit-il,
qu'apres auoir vaincu les Lacedemoniens
en bataille rangée, ie suis entré à main
armée dans la Laconie, ce qu'aucun
n'auoit iamais fait auparauant: que i'ay
rebasti & repeuplé la ville de Messene,
que les ennemis auoyent ruinée; & que
i'ay reünì dans vne ligue toutes les villes
de l'Arcadie, & les ay mises dans le parti
des Thebains. Ce qui ayant esté reconnu
vray par tous les assistans, il n'y en eut
pas vn seul qui voulust mettre les balotes à
la main pour proceder au iugement, &
tous s'en retournerent en leurs maisons,
les vns se moquans des accusateurs, & les
autres admirans la magnanimité de ce
personnage. Il arriua de mesme à Scipion
l'Africain d'estre accusé de ne s'estre pas
bien gouuerné dans la guerre qu'il auoit

faite aux Carthaginois : & au lieu de répondre à ce qu'on luy imputoit, il dit magnifiquement aux Romains : Ce ne vous est pas chose si bien seante que vous entrepreniés de me iuger, moy qui par mes actions vous ay mis en tel estat que vous pouués iuger de toutes les autres Nations. Souuenôs nous plustost aujour d'huy qu'à pareil iour ie gaignay la bataille contre Annibal, & nous en allons rendre graces aux Dieux de cette victoire. Et cela fut trouué si bon par les Romains, que luy s'estant en effet acheminé vers le Capitole, ils le suivirent tous en foule, de sorte que cette assemblée, qu'on auoit faite pour condamner Scipion, deuint vne grande procession, ordonnée pour célébrer ses actions memorables. Apres cela, mes freres, quand ce ne seroit pas vn effet de cette haute magnanimité, on le supporte poutant, & mesme on le trouue bon, quand on le pratique pour se defendre. On ne sauroit dire combien les vanteries de Cicéron ont esté ennuyeuses & importunes aux oreilles des Romains, parce qu'à propos & hors de propos, en tout temps & en toutes occasions, il racontoit comment il auoit en son Consu-

lat, sauué Rome & l'empire Romain de la coniuration de Catilina & de ses complices. C'estoit bien certes vne action souverainement digne de toute sorte de recommandation, & qui luy auoit iustement merit  le tiltre de pere & de conseruateur de son pays. Mais de ne laisser, s'il faut ainsi dire, passer iour sans en faire vne solemnelle commemoration, c'estoit veritablement vne chose comme insupportable. Mais il n'y a personne qui trouue mauuaises les louanges que Demosthene se donne dans l'Oraison pour la Couronne, quoy que ce ne soit sinon vn tissu continuel de ses actions genereuses & des auantageux conseils qu'il auoit donn s. Pourquoy cela? Parce qu'il y estoit contraint par l'importunit  de ses aduersaires, & qu'il ne pouuoit pas autrement se maintenir contre les inuectiues de ses accusateurs. Et de fait il a est  bien dit par quelcun qu'il en est de cela comme de ceux qui se guident & qui esleuent leurs corps au dessus de la hauteur qui leur conuient ordinairement. S'ils le font sans necessit , c'est vne contenance odieuse, parce qu'on presume qu'elle procede de sottise gloire & de vanit . Mais si c'est en lut-

tant ou en combattant qu'ils se dressent, pour se garantir des attaques de leurs ennemis, ou pour prendre quelque avantage sur eux, tant s'en faut qu'on les en puisse blasmer, que si cela leur sert à se rendre victorieux, on leur en donne de la gloire. Et ie pense qu'on peut bien mettre en ce rang vne partie des loüanges que le Prophete Dauid se donne en quelques vns de ses Pseaumes. Car parce qu'il estoit accusé d'estre vn broüillon, vn perturbateur du repos public, vn ambitieux, vn homme qui attentoit & à la personne & à la couronne de son Souuerain, non seulement il fait ordinairement son apologie contre ces imputations, mais il parle de soy-mesme fort avantageusement, & s'esleue infiniment au dessus de ses aduersaires. Et c'est aussi certes en grande partie ce qui est cause que l'Apostre S. Paul parle quelquesfois magnifiquement de ses vertus, & des belles choses qu'il auoit executées en la predication de l'Euangile. Car il y estoit contraint pour maintenir l'autorité de son Apostolat, & l'honneur de son ministere, qu'en denigrant sa personne, ses ennemis auilissoient de tout leur pouoir. En troisieme lieu il a esté remarqué

de la 11. aux Cor. v. 1. 2. 3. 4. 5. 146

par les Philosophes, que cela est pris en bonne part, quand il peut paroistre que ce n'est pas nostre propre gloire que nous cherchons en nous vantant, mais que nous auons pour but de seruir à l'vtilité d'autrui, & d'inciter nos prochains à la vertu, en leur proposant de bons exemples. Quelques-vns ont remarqué que c'est ainsi que ce bon vieillard Nestor, louë ses propres actions dans Homere, & qu'il a intention de porter par ce moyen les ieunes gens à imiter sa vertu. On peut dire la mesme chose de Caton le Censeur, qui quand il fut venu sur l'aage, ne s'espargnoit iamais à parler auantageusement de soy-mesme, & des belles choses qu'il auoit faites pour le seruice de l'Estat. Mais il auoit pour but de former les ieunes hommes de la ville de Rome à toutes sortes de loüables qualités: & les Lacedemoniens n'ont pas esté estimés des glorieux, pour auoir fait seruir leur vanteries à cet vsage. Quant à S. Paul, s'il dit, *soyés mes imitateurs comme aussi ie le suis de Christ*: s'il exhorte Timothée à prendre garde de bien prés à toute sa conduite pour s'y conformer, si en diuers lieux il aduertit que Dieu a mis en luy des talens

extraordinaires , & qu'il luy a donné d'avancer tres-vtilement sa gloire, & le regne de son saint Fils Iesus , c'est sans aucune difficulté pour imprimer dans l'esprit de son disciple , & generalement de tous les Chrestiens , l'idée de la vraye sainteté, par la representation de son exemple. Car apres celuy de Christ il n'en auoit point ny de plus prest , ny de plus beau , que celuy qu'il tiroit de ses propres actions & de la recommandation de sa personne. Il y peut encore auoir d'autres occasions dans lesquelles il est permis de se vanter ; mais ie n'en veux pas faire vn Lieu-commun , & il me suffira de donner icy quelques aduertissemens pour le pouuoir faire en telle façon qu'on n'en encoure point de blasme. Et premierement , le moyen d'esloigner de nous tout soupçon de presumption & de vanité , c'est que si nous auons quelques belles qualités , & que par les conjonctures des choses nous soyons comme necessités d'en parler , nous en donnions toute la gloire à nostre Seigneur, & n'en retenions rien pour nous mesmes. Quelques Payens ont eu des pensées qui ne s'esloignoient pas entierement de celle-là. Car Timoleon entre les Grecs,

& Sylla entre les Romains, auoyent accoustumé de rapporter toute la gloire de leurs actions à la Fortune, comme ils parloyent, c'est à dire à quelque secrette conduite & efficace de la Diuinité, & aimoyent mieux se faire appeller heureux que vertueux, parce que la premiere de ces qualités estoit moins sujette à l'enuie que l'autre. Mais ce que ces gens ont fait peut estre par quelque prudence politique, les fidelles seruiteurs de Dieu l'ont pratiqué par vn vray sentiment de pieté. Voyés comment Dauid parle en quelques-vns de ses Cantiques, & particulièrement au Pseaume dix-huitième, où il celebre luy-mesme ses hauts faits d'armes, & ses grandes qualités. Il parle bien de soy mesme comme du plus vaillant homme qui fust alors en Israel, & comme de celuy qui auoit fait des actions qui deuoient passer pour heroïques. Mais il attribuë tout à Dieu, comme à celuy seul qui luy auoit donné d'executer ces grandes choses. *C'est, dit-il, le Dieu fort qui m'équipe de force, & qui maintient entier mon chemin. Il a rendu mes pieds egaux à ceux des biches, & m'a fait tenir debout sur mes lieux hauts eslevés. C'est luy qui a duit mes mains au combat,*

tellement qu'un arc d'airin a esté rompu avec
mes bras : & presque dans tout le reste du
Pseaume , il poursuit de mesme. Et au
Pseaume cent dix-neufieme il se vante
d'estre pieux , d'estre prudent , d'estre plus
aduisé que tous ses conseillers , quelque
vieux. & experimentés qu'ils soyent; mais
il dit que c'est Dieu qui luy donne toute
cette sagesse-là, & qu'il la tient de la grace
de son Esprit, & de la meditation de sa Pa-
role. Et quant à nostre S. Paul, il en vse
toufiours de mesme. Car s'il dit qu'il *peut*
toutes choses , il adjouste que c'est *en Christ*
qui le fortifie. S'il se vante , comme il fait
au chapitre quinzieme de la premiere aux
Corinthiens, d'avoir *travaillé beaucoup plus*
que tous les autres en la predication de l'E-
uangile ; il se corrige & se redresse incon-
tinent en disant , *Toutesfois ce n'est point*
moy, mais c'est la grace de Dieu qui est avec-
que moy. Et ainsi en quantité d'autres lieux
semblables. Apres cela il est vtile , comme
ie le vous ay representé en la premiere de
ces actions , pour esloigner tous les sou-
pçons de presumption & de vanité, de par-
ler de soy en tierce personne , comme no-
stre Seigneur & ses Apostres ont fait. Car
cela n'empesche pas à la verité que l'on

n'entende que vous voulez parler de vous-mesmes ; mais tant y a qu'entant qu'en vous est, vous vous séparés d'avec la loüange qui accompagne vos actions. Et comme quand Moyse mettoit vn voile sur sa teste, il n'empeschoit pas quel'on ne vist bien que c'estoit Moyse, mais neantmoins cela offusquoit vn peu la splendeur de son visage, & faisoit que ceux qui le regardoyent n'en estoient pas esblouis: celuy qui en parlant de soy-mesme se couure en quelque sorte du nom d'un autre, n'oste pas à ceux à qui il parle la connoissance de ses vertus & de ses belles actions, mais il en rend l'eclat beaucoup plus supportable à ceux qui l'entendent, & s'exempte de l'offense qu'elles donneroyent autrement à leurs oreilles & à leurs yeux. Les Philosophes qui donnent des preceptes sur cette matiere, disent que si on est quelquesfois contraint de dire quelque chose à sa propre loüange, c'est prudemment fait que d'y mesler quand & quand les merites de ses prochains. Et veritablement elle passe ainsi beaucoup plus doucement que quand on la propose toute seule, la recommandation d'un autre luy servant en quelque sorte de vehi-

cule, qui la porte dans l'esprit de ceux qui l'escoutent sans y trouuer d'achoppement. Mais pour mettre fin à ce propos, ie dis qu'il n'y a rien de plus efficaceux, pour destremper ce qu'il y peut auoir de vicieux & de choquant dans les louanges que nous nous donnons à nous-mesmes, que d'y mesler la mention de nos propres infirmités, & des choses qui nous rabaisent autant que la commemoration de nos belles & auantageuses qualitez est capable de nous eleuer. Car comme quand on presente diuerses couleurs à contempler à quelcun, apres luy auoir monstré les voyantes, comme on parle, c'est à dire celles qui sont éclatantes & qui ont beaucoup de viuacité, on luy en met deuant les yeux de plus sombres, afin de raffermir sa veüe & d'en rassembler les rayons que la splendeur des autres a dissipés: Ainsi quand vn homme est obligé de deployer ses propres vertus, & de mettre ses grandes & resplendissantes actions en veüe, il est de sa prudence & de sa modestie d'y entremesler quelque chose de ses imperfections, pour empescher que les premieres ne produisent de la haine & de l'enuie, & pour adoucir les esprits que l'é-

de la II. aux Cor. v. 1. 2. 3. 4. 5. 181
clat de ses propres loüanges auroit autrement effarouchés. Et c'est ce que S. Paul fait dans la troisieme partie de cette sentence, quand apres auoir dit que s'il vouloit, il se glorifieroit de tres-grâdes choses, mais qu'il ne se veut vanter de rien, il adjouste ces paroles, *sinon en mes infirmitéz.* Il y a, mes freres, de diuerses sortes d'infirmitéz en l'homme. Car il y en a quelques-vnes qui consistent en vices: qui bien qu'ils ne soyent ny atroces ny enormes, sont des vices pourtant. Mais parce qu'ils semblent proceder de quelque fragilité de nostre nature, & que nous les excusons volontiers & en autrui & en nous-mesmes, nous adoucissons vn peu le terme par lequel on les represente, & les nommons de ce nom d'infirmitéz. Et l'Escripture sainte s'accommode à cette façon de parler: car c'est ainsi qu'il faut entendre ce passage de l'Epistre aux Hebreux, où il est dit que le souuerain Sacrificateur estoit *propre à auoir competemment pitié des ignorans & des errans, d'autant que luy mesme aussi est environné d'infirmité.* Or ne voudroy-je pas asseurer que l'Apostre S. Paul ait esté absolument exempt de cette sorte d'infirmités-là: quoy que ie conçois la sanctifica

cation à vn si haut point , que s'il luy en restoit quelques vnes, elles estoient incomparablement & moindres & en moindre nombre qu'elles ne se trouuent, ie ne diray pas dans le commun des Chrestiens, mais encore entre ceux qui y sont remarquables pour leur sainteté. Quoy qu'il en soit, cette sorte de foiblesses, n'est nullement vne matiere de vanterie, & quelles qu'elles ayent esté dans ce saint Apostre, il ne peut pas tomber dans la pensée qu'il eust voulu s'en glorifier. Il y a vne autre sorte d'infirmités qui sont communes à tous les hommes, parce que ce sont des suites & des dependances inéuitables de la Nature, quand mesmes elle seroit demeurées en son intégrité. Et telle est la sujétion au boire, & au manger, & au dormir, & aux autres choses qui viennent necessairement en consequence, dont ie ne pense pas non plus qu'il soit iamais venu en la pensée d'aucun homme de se vanter. Car nous nous vantons des choses qui nous sont particulieres, ou au moins certes que nous auons communes avec peu de gens; & non de celles qui se trouuent en toutes sortes de personnes indifferemment. Mais outre cela, la nature mesme

de ces infirmités-là obligeroit plustost à s'en plaindre, & à en auoir quelque honte, qu'à en faire quelque parade comme d'un auantage qui nous eleuast. Il y en a encore d'autres qui sont aucunement particulieres ; mais qui parce qu'elles ne sont ny precedées, ny suivies, ny accompagnées d'aucune chose qui les rende recommandables, elles ne peuvent fournir à personne la matiere de se vanter. Car pour exemple, qui est-ce qui s'est iamais aduisé de se glorifier de la goutte, & de la grauelle, & de la colique, & de la migraine, & d'autres telles infirmités, comme s'il auoit en cela quelque sujet de se mettre au dessus de ses compagnons? Il faut donc necessairement qu'il s'agisse icy d'infirmités qui à les regarder en elles-mesmes, peuvent plustost causer de la compassion que de l'enuie, & du mespris plustost que de la gloire ou de l'admiration, comme ie le vous disois il y a quelques iours. Mais d'autant quelles sont accompagnées de quelque autre chose qui merite de la louange, on s'en glorifie en quelque sorte, parce que de ce qu'il y a d'infirme, & de ce qu'il y a de recommandable, il se fait un raisonnable tempera-

ment. Telles sont ces infirmités dont l'Apostre parle dans le chapitre immédiatement précédent : à sçavoir ses battures, ses prisons, ses lapidations, ses verges, & toutes ces persecutions & ces miseres qu'il a endurées pour le nom & pour l'Evangile de nostre Seigneur Iesus Christ. Car à regarder ces choses en elles-mêmes, il n'y a personne qui ne voye que la nature les abhorre, & qu'il faudroit estre tout à fait déraisonnable pour y chercher occasion de se glorifier. Mais à les considerer dans la cause pour laquelle on les endure, qui est le nom de nostre Sauueur, vous sçaués qu'il est dit au liure des Actes, que les Apostres ayant esté fouëtz pour cette cause, ils se resioissoient & se glorifioient d'auoir esté trouués dignes de souffrir cette ignominie pour le nom de Iesus Christ. Adjoustés à cela encore, que de supporter gayement & courageusement toutes ces tentations & toutes ces flestrisures, parce que leur cause les rend honorables, & que c'est pour l'amour de Christ, c'est vne chose digne de recommandation, & en l'exercice de toutes les vertus du Chrestien il n'y a rien de plus louable. Or qu'il soit icy question de cette sorte de

foibleſſes, c'eſt choſe claire par ce que l'Apoſtre en a dit dans le chapitre precedent, & par ce qui ſuit encore immediate-
ment en celuy-cy. Car dans le chapitre precedent, où il dit auſſi qu'il ſe glorifie en ſes infirmités, il raconte ces choſes-là. Et dans celuy cy, il dit incontinent apres noſtre texte, *qu'afin qu'il ne s'eleuaſt pas outre meſure à cauſe de l'excellence de ſes reuelations, il luy a eſté mis vne eſcharde en la chair, vn Ange de Satan pour le buffeter*: ce qui explique admirablement bien le ſens des paroles que ie vous expoſe. Parce que ſi vous regardés l'Apoſtre par cet endroit-là, qu'il luy auoit eſté adreſſé des reuelations ſi admirables, il 'a ſans doute vn grand ſujet d'en triompher: ſi vous le conſiderés par cet autre coſté, où il eſt expoſé à la vexation d'vn demon, cela eſt pour donner de l'horreur: mais ſi vous ioignés ces deux choſes-là enſemble, elles font vne excellente compoſition, où la matiere de ſe vanter & celle de ſ'humilier, ſont admirablement bien temperées. Et l'effect que cela produit merite qu'on le conſidere attentiuement. Car premierement cela ſert à contrebalancer entr'elles, dans l'ame de S. Paul, l'eleuation & l'humili-

ation, & à empescher que son esprit ne s'emporte au delà des bornes. Parce que si Dieu n'y eust point mis ce contrepoids, qui aduertissoit continuellement ce grand seruiteur de Dieu, de l'infirmité de la Nature, & de la fragilité de l'humanité, quelque sanctification qui fust en luy, il n'eust iamaïs peu s'empescher d'auoir de trop magnifiques sentimens de soy, & de sortir hors des limites de l'humilité Chrestienne. Apres cela, il sert encore à retenir l'esprit des autres fideles qui consideroyent S. Paul, & à les empescher d'auoir de luy quelques opinions trop auantageuse. Car quen'eust-on point ou dit ou pensé d'un homme qui auoit tant d'excellentes connoissances, & à qui Dieu auoit fait voir de si rares visions? Veu principalement que cela estoit accompagné d'une incomparable sainteté, & que de ses mains sortoyent à toute heure des miracles, estonnans, & des actions tout à fait extraordinaires & surprenantes? Assurément on ne se fust pas garenti de la superstition, & lon eust pensé voir en luy quelque chose au dessus de l'homme. Mais quand on venoit à considerer qu'il estoit harcellé par tant d'ennemis, & persecuté

de tant de maux, on disoit, il possède vn grand tresor à la verité, mais c'est dans vn vaisseau de terre, qui est mesprisable de soy, & qui au premier heurt, se peut mettre en pieces. C'est pourquoy il ne se contente pas de dire que cette escharde luy a esté mise en la chair pour empescher qu'il ne s'esleuast, mais il adiouste encore qu'il *s'espargne de se vanter, afin qu'aucun ne l'estime point par dessus ce qu'il voit estre, ou par dessus ce qu'il entendoit de luy.* Enfin cela produisoit encore vn bon effect à l'egard de ses ennemis. Parce que s'ils pensoient auoir quelque occasion de le calomnier en ce qu'il se vantoit, cela se rabatoit incontinent quand ils venoyent à penser, ou qu'on leur representoit, qu'il ne se glorifioit sinon en ses infirmités, c'est à dire, en des choses qui donnoyent du mespris & de l'auersion à cause de leur incommodité & de leur bassesse. Chers freres, ie diray quelque chose dauantage. Nostre Seigneur Iesus Christ n'auoit point besoin de contrepoids pour rabaisser la trop haute eleuation de ses pensées. Car son ame estoit si profondement imbuë de toutes sortes de vertus, & particulièrement d'vne incomparable huy

milité, dont il s'est proposé en exemple à
 ses disciples, iusques à leur lauer les pieds,
 qu'il n'estoit susceptible d'aucune pensée
 qui derogeast à cette excellente qualité.
 Il n'estoit pas besoin non plus de meller
 dans le tableau de ses émerueillables con-
 ditions, les infirmités de sa nature hu-
 maine & de ses souffrances, pour empes-
 cher ceux qui le contemploient d'en con-
 cevoir vne trop haute opinion. Car estant,
 comme il estoit, d'vne dignité infinie, on
 ne s'en pouuoit former d'idée, ie ne dis
 pas qui surpassast, mais mesme qui égalast
 la magnificence de l'obiet. Et neant-
 moins il ne laisse pas luy-mesme de tem-
 perer l'eclat que ses propos & ses miracles
 donnoient à sa personne & à sa charge,
 par sa condition abbaissée, & par la
 mention de sa Croix. Car toute sa con-
 uersation a esté souverainement humiliée,
 ayant pris, comme il a fait, la forme de ser-
 uiteur: & à tout propos il aduertit qu'il
 doit souffrir vne mort ignominieuse,
 comme les Oracles l'auoyent predict. Il
 commande mesmes quelques fois à ses di-
 ciples de celer les choses glorieuses qui luy
 estoient arriuées, comme sa transfigura-
 tion, iusques à ce qu'il fust ressuscité, &

defend à quelques autres de publier les miracles qu'il auoit faits en leur faueur. Pourquoy cela sinon qu'il falloit dispenser la connoissance de ce qu'il estoit avecque prudence, afin de ne donner point trop de prise à ses ennemis ? Mais au fonds, quand nous ne mettrions point ces considerations en auant, il estoit ainsi conuenable à la sagesse diuine, de diuersifier la vie de nostre Seigneur de choses dont les vnes sont éclatantes & les autres sombres, les vnes témoignent de la magnificence & de la gloire, & les autres sont accommodées à l'estat de son aneantissement, parce que se preparant à souffrir vne ignominieuse Croix, il falloit qu'il y eust quelque proportion entre sa vie & sa mort, & que sa fin ayant à estre pleine d'infamie & de douleur, le temps de son economie en Chair n'eclatast pas fort souuent de choses illustres & glorieuses. Reuenons donc maintenant à S. Paul : non pour continuër à expliquer ce qu'il nous dit en ce lieu icy ; car desormais ie vous ay representé ce que i'auois à vous dire pour l'interpreter, mais pour tirer quelque nouveau fruit des choses que vous aués entenduës. Je ne vous repeteray pas mes freres, les instructions

que ie vous ay desia données sur les textes precedens, parce que vous en aués la memoire toute fraische, & que cela seroit ennuyeux. Je ne m'arrestéray pas mesme long temps à vous remarquer celles qui naissent de l'interpretation de celuy-cy, parce que vous les poués assés recueillir de vous-mesmes, & qu'elles sont mesmes en quelque sorte meslées dans les propos que ie viens de vous tenir. Car qui ne peut en tirer de soy-mesme cet enseignement, qu'il faut estre humble & modeste, & esloigné de toute presumption & de toute vanité, & ne parler iamais auantageusement de soy-mesme, sinon qu'on y soit obligé par quelque necessité; & enfin que quand on y est necessairement obligé, il y faut apporter tous les temperamens & tous les adoucissements dont on se peut aduiser, pour ne rien faire contre le deuoir, & pour retrancher l'occasion à la calomnie & à la médifance? De sorte que s'il me restoit quelque chose à adiouster icy, ce seroit cette consideration, c'est qu'il ne faut pas trouuer estrange que la condition de l'Eglise, & de la plus part des fidelles qui la composent, soit accompagnée de beaucoup d'infirmités, & com-

de la 11. aux Cor. v. 1. 2. 3. 4. 5. 161
me enuironnée de quantité d'ombres pen-
dant le temps du séjour de nostre Seigneur
icy bas, puis que celle de S. Paul, & mesmes
celle de nostre Seigneur Iesus Christ ont
esté semblables. Dieu nous a sans doute
auantagés, les vns plus, & les autres moins,
mais neantmoins il nous a tous en general
gratifiés d'une infinité de choses qui nous
esleuent comme infiniment au dessus des
hommes de ce present siecle: & quand il
ne nous auroit point donné d'autres reue-
lations que celle de sa connoissance salu-
taire, c'est assés pour nous estimer incom-
parablement plus qu'eux. Mais l'estat de
la vie presente, & la conformité avecque
nostre Seigneur, & nostre sanctification,
requeroyent que la splendeur de nostre
condition fust obscurcie de temps en
temps par diuerses infirmités & par diuer-
ses souffrances. De sorte que nous ne de-
uons point nous offenser, puis que cette
dispensation de la Prouidence de Dieu
enuers nous est fondée sur tant de raisons,
& que nous en auons deuant nos yeux de
si grands exemples. Cela surquoy ie dois
le plus insister, c'est vne obseruation que
i'ay à faire icy contre les profanes. Vous
voyez des gens qui se vantent d'estre es-

prits forts, qui doutent de l'immortalité de leur ame, qui se moquent de l'esperance que nous auons de iouir quelque iour de felicité là-haut au ciel, & qui demandent qui c'est qui est reuenu de là pour nous en apprendre des nouuelles. Miserables! qui se vantent d'auoir plus d'entendement que les autres hommes, & qui neantmoins se reduisent à la condition des bestes, en priuant eux-mesmes leur ame de son immortalité. Car quelle notable difference y a-t-il entre eux & les autres animaux, si leurs esprits s'esteignent avecque leurs corps, comme font les ames des bestes? Et où esperent-ils iouir iamais d'aucune felicité, si Dieu ne nous en a point mis en reserue dans les lieux celestes? Car quant à la trouuer icy bas, c'est vne chose absolument impossible, à cause des miseres qui accompagnent la vie presente, & des trauerses qu'y reçoient ceux qui aiment la pieté & la vertu. Si ce n'est que comme les chiens & les pourceaux, ces gens mettent leur souuerain bien dans la gourmandise, & dans l'yurognerie, & dans les dissolutions, & dans les voluptés infames, ainsi que quelques-vns d'entr'eux font veritablement. Ils demandent qui

de la II. aux Cor. v. i. 2. 3. 4. 5. 163
C'est qui est descendu du Ciel pour nous dire que c'est là-haut que nous devons espérer d'estre bien-heureux. C'est S. Paul, qui soit en corps, soit hors du corps, a esté ravi en Paradis, & qui a ouï & veu des choses inenarrables. Il ne nous en a pas à la verité donné l'explication par le menu: mais il nous en a assez dit pour nous faire concevoir que c'est là qu'il faut que nous aspirions, comme au lieu où nostre souverain bon-heur est en depost entre les mains du Sauveur du monde. Car il ne nous en parle de la sorte que pour maintenir l'autorité de son Apostolat, & pour fonder de plus en plus le témoignage qu'il nous a rendu de la verité de l'Evangile de Christ, & de la certitude invariable de ses promesses. De sorte que c'est pour esleuer nos cœurs & nos esperances là-haut, qu'il nous parle de son ravissement au ciel, & pour détacher nos pensées & nos affections de la terre. Au reste, pourquoy n'adjousterions-nous pas foy à ce qu'il nous a dit? Quel profit luy reviendrait-il de nous allaiter de ces esperances-là, & de nous raconter ces visions si elles n'estoyent veritables? Car alors il n'en auoit autre recompense que les prisons, &

les coups de verges, & les lapidations, & les menaces des feux, des gibets & des tortures. C'estoit-là la recompense qu'il receuoit de la predication del'Euangile de Christ, & les triumphes qu'il se promettoit en cette vie, apres qu'il auroit conquesté les Nations à son nom, & conuertit la terre habitable à sa connoissance. Apres cette vie que luy en pouuoit-il reuenir, puis que son ame ne deuoit pas subsister apres la mort, sinon la honte & l'infamie d'auoir esté vn affronteur, & d'auoir abusé tout le monde par ses impostures? Si l'Euangile n'est point vray, & si les promesses qu'il nous donne de l'immortalité de nos ames, & de la resurrection de nos corps, sont seulement des Chimeres, nostre Apostre, au chapitre quinzieme de la premiere aux Corinthiens, dit que luy & ses compagnons en l'Apostolat, & tous les Chrestiens en general, *sont les plus miserables de tous les hommes*, parce que n'ayans point d'esperance en l'autre vie, ils sont exposez à toutes les miseres & à toutes les persecutions de celle-cy. Et il met cela en auant comme vn argument pour prouuer la verité de l'Euangile de Christ, parce qu'il n'est pas à presumer que luy, & les

autres Apostres, & les autres disciples de Christ, qui en toutes autres choses donnoient toutes sortes de preuues, les vns d'une sagesse incomparable, les autres d'une prudence non mediocre, ou au moins certes d'un sens rassis, eussent esté si destitués d'entendement que de s'abandonner ainsi volontairement à toutes les vexations de cesteiecy, s'ils n'auoyent des asseurances indubitables de leur recompense en l'autre. Mais ie diray de mesmes, mes freres, que si ce que l'Apostre nous dit de soy & de l'Euangile n'est point vray, il a fallu non seulement qu'il ait perdu la honte en affirmant des bagatelles si hardiment, mais mesmes qu'il ait tout à fait abandonné le soin de son honneur & de sa reputation, quand il seroit sorti de la vie. Car ie veux bien qu'il en eust abusé quelques-vns de son temps. Comment eust peu se maintenir en l'Vniuers la creance de ses visions & de ses reuelations dont il se vante icy, si c'eussent esté des extrauagances d'un esprit tombé en déreiglement, ou des choses controuuées de propos deliberé, & affirmées puis apres avec une si prodigieuse impudence? Le temps, disoit autrefois quelcun,

efface enfin de l'entendement des hommes les opinions erronées dont ils ont reçu l'impression : mais il confirme les iugemens de la Nature, & les sentimens de la verité. Si donques ces choses n'auoyent point eu d'autre fondement que l'imagination blessée d'un homme hypocondriaque, ou la hardiesse de quelques imposteurs à les inuenter & à les debiter, il y a long-temps qu'on n'en entendroit plus parler, & elles n'auroyent pas vescu vn siecle. Car les impostures de Mahomet se sont bien épandues en diuers endroits du monde, & s'y sont maintenues il y a desia long-temps. Mais elles ont eu pour appuy, d'un costé les armes & les guerres, à l'aide desquelles elles se sont prouignées çà & là, & de l'autre les attraites & les amorces de la Chair, à l'assouissement des volontés & des passions de laquelle elles estoient destinées. Au lieu que la doctrine de l'Euangile est toute employée à dépouiller l'homme de ses affections charnelles & à le spiritualiser, & qu'elle a eu à soustenir la contradiction de toutes les Puissances de la terre. Non, non, freres bien aimés en nostre Seigneur : ne nous laissons pas émouuoir par les dis-

cours de ces profanes, qui ont iuré la guerre à la piété & à la vertu. C'est la vérité de Dieu que l'Apostre S. Paul a enseignée à l'Vniuers, qu'il a confirmée par mille miracles en la preschant, qu'il a seellée par son martyre & ratifiée de son sang, & qui a enfin glorieusement triomphé de la contradiction de ses ennemis, quelque resistance qu'ils y ayent faite. Car les Philosophes ont renoncé à toutes leurs autres connoissances, & à toutes les subtilités de leurs Escoles pour l'embrasser; & quand ils l'ont eu vne fois goustée, toutes les sciences auxquelles ils s'estoyent auparavant adonnés, leur ont paru en comparaison souuerainement mesprisables. Les Orateurs ont ployé toutes les voiles de leur eloquence deuant des gens qui ne faisoient ny profession ny parade de bien parler; & s'ils ont fait quelque cas de leur Rhetorique puis apres, comme il ne se peut pas nier qu'il n'y ait eu des predicateurs & des defenseurs de l'Euangile extraordinairement eloquens, ils en ont employé les artifices & les beautez, à rendre la Croix de Christ illustre & recommandable. Les Rois & les Potentats de la terre ont apporté leurs sceptres, leurs cou-

ronnes, & leurs diademes aux pieds du Seigneur Iesus, & l'ont reconnu pour le Roy des Rois, & le Seigneur des Seigneurs, à la gloire duquel ils ont puis après consacré toute leur puissance. Les peuples, quoy qu'extremement obstinez, ont esté amenés captifs à l'obeissance de nostre Sauueur, & ont abandonné, pour donner gloire à son Nom, leurs superstitions & leurs idoles. Les demons ont esté contraincts de luy rendre temoignage, quãd ils se sont veus expulsés des corps & des cœurs des hommes, & arrachés des Temples & de dessus les autels qui leur auoyent esté consacrez, de sorte que les enfers mesme, par maniere de dire, en s'entrebâillant, ont aduouié que le Seigneur Iesus les auoit vaincus, & qu'il auoit mis en pieces toute la puissance de leur empire. Croyons donc fermement, chers freres, en la parole de l'Euangile de nostre Sauueur, deferrons de tout nostre cœur au temoignage que les Apostres nous ont rendu de sa mort & de sa resurrection, perseuerons constamment en cette foy iusques à la fin, repoussons toutes les tentations qui nous peuvent venir de la part de l'incrédulité, combattons contre le monde, résistons

aux

aux suggestions du Peché, esteignons par le bouclier de la Foy les dards enflammés du Malin, tendons par la voye de la vraye sanctification à la bien-heureuse immortalité, & soyons asseurez que Dieu nous en couronnera quelque iour. *Et pourtant, mes freres bien-aimés*, dit l'Apostre aux Corinthiens, *soyés fermes, immuables, abondans tousiours en l'œuvre du Seigneur: sçachans que vostre labour n'est point vain en nostre Seigneur: & quelque iour il vous fera voir, & ouïr, & posseder eternellement, ce qu'œil n'a point encore veu, ce qu'oreille n'a point ouï, & ce qui n'est point monté en cœur d'homme.* A Dieu qui nous en a donné l'esperance, Pere, Fils, & S. Esprit, vn seul Dieu benit aux siècles des siècles, soit gloire, force & empire dès maintenant & à toute eternité: A M E N.

FIN.



ERRATA.

page 7. ligne 12. *lisés*, estoient. p. 16. l. 82. ils
 p. 4. l. 3. l. luy il. p. 60. l. 3. l. façon. p. 78.
 l. penult. l. immortelle. p. 85. l. 4. l. est recité.
 p. 112. l. penult. l. s'ouvrissent. p. 125. l. 10. l.
 effacés de. p. 131. l. penult. l. qu'elle l'ifor. p.
 137. l. 3. l. qui luy. p. 138. l. 10. l. tant &. p. 142.
 l. 4. l. choses. p. 157. l. 11. l. qu'elle.








BS2675.8 .A53

Le ravissement de S. Paul : (2. Cor.

Princeton Theological Seminary-Speer Library



1 1012 00072 4510